

دار الكتب

رسول الخطيئة

شريف سالم

دار الكتب

رسول الخطيئة

شريف سالم

رسول الخطيئة

"رواية"

شريف سام

إهداء خاص

إليكما يا أمي وأبي على كل ما قدمتماه لي منذ نعومة أظفري
إليك يا زوجتي الحبيبة هنوه على حب وصدق مشاركتي الرحلة
إلى ابني وقرة عيني عمر الذي أطال الله به عمري
إلى شقيقي وصاحبي رامي وعمر
إلى أصدقائي وائل عبد حلیم، الكابتن مشهور أحمد هندي، مصطفى
حمدي

للمساندة والمشاركة بصدق

إلى الأستاذة دنيا جبرة على ما قدمته من تشجيع ونقد

وفي النهاية

تبقى هبة رياض .. بداية كل رواية ونهايتها

إهداء ..

إلى الذنب الذي لم أرتكبه
و الفضيلة التي فعلتها مرغمًا
و الرب الذي عصيته بغفلي
و الشيطان الذي أدار اللعبة

هل تلعن قصة حياتك؟

هل تشعر في نقطة ما أنك قضيت رحلة من الفشل؟

هل تعتقد أنك لو بدأت من جديد، ستكون قصة مختلفة؟ ستكون قصة ناجحة؟

هل استيقظت يوماً على حلم أن تتغير؟ وهل استطعت؟

هل تشعر بأن الحياة ظالمة؟

وأن السعادة في يد من لا يستحقها؟ الذين هم لا يرتكبون إلا كل ما هو فاسد؟

هل رأيت السعادة في جسد عاري عبر زجاج خمر يرقص بين الدخان؟

هل لمستها في صلاة أو طاعة لله؟

هل تعلم أساساً ما يجعلك تشعر بالرضا؟

هل تعلم من انت؟

هل عندما تنظر إلي المرأة، فتجد نفسك التي تريدها وتعلمها جيداً؟

هل تعلم أي شيء؟

أم أنت من الملايين الذين يعيشون فقط لحرمانية الانتحار؟

هل تمنع أن أريك شيئاً لم تره من قبل؟

إذن

اقرأ

هذه قصتي

اسمي .. خالد حلمي

الفصل الأول الطريق حارة واحدة

صوت المنبه

أغلقه، ثلاثين ثانية من الهدوء وأبدأ في الاستيقاظ، السادسة والنصف صباحًا، صوت أمي تخرج من غرفتها متجهة إلى الحمام ثم المطبخ ثم إلى غرفتها مرة أخرى، ذلك الروتين اليومي الذي يرسم خريطة تشبه خرائط الجغرافيا على البلاط والسجاد ثم السراميك، ما بين مرتبة السرير إلى حوض الحمام إلى رخام المطبخ، كل يوم في ثلاثين عام هي سنوات عمري، أرى نفس المشهد، ثم يبدأ دوري لرسم خريطتي المنزلية، الحمام ثم السفارة لتناول الإفطار الذي أعدته أمي وهو نفس ما أتناوله تقريبًا طوال الثلاثين عام ثم الغرفة لأرتدى ملابسني وأذهب لعملي ...

أرتدى أول ثلاثة أشياء تقع في يدي وأنزل إلى الشارع، لا أتطلع لأناقة ولا أهتم بالتفاصيل ..

أسكن في شارع شهير اسمه باب البحر بجوار ميدان رمسيس إن كنت من رواد وسط البلد وذهبت يومًا لشراء حلوى سبوع أحد أقاربك فمن المؤكد أنك زرت ذلك الشارع.

أتمشى إلى ميدان رمسيس أكثر أماكن المجرة ازدحامًا والمكان الوحيد الذي يضيق كل يوم أكثر وبالرغم من ذلك مازلت تجد فيه مساحة لتمشى مع فرصة كبيرة لتصطدم بشخص يقرر أن تكون أنت الفأل السيء لليوم فيقرر الاشتباك معك، أو لص يجد قوت يومه في عشر جنيهات في جيبك أو هاتفك المحمول الذي بليت الأرقام على أزراره في عصر الهواتف التي تعمل باللمس، أو أن تكون ضحية متحرش من

شخص ينزل اللعاب من فمه كالشلال، و إن هربت من كل ذلك فأهلاً بك مع الباعة
الجائلين الذين إذا أدخلت يدك في جيبك لكى تخرج منديلاً يقطع الطريق أمامك ليقول
"آخرها عشرين ، و النبي يا بيه، نفعا " في النهاية أجد طريقي إلى الميكروबाص
الذى يقلني إلى عملي في شارع جامعة الدول العربية،

أعمل في حسابات أحد المحال الشهيرة هناك، ومن عملي في شارع كهذا يمكنك أن
تتفهم لماذا رجل مثلى يقول إنه قد يتعرض للتحرش، خصوصاً مع نهاية العام
واغلاق حسابات الشركة مما يؤدي بالتالي أن تترك العمل في ساعة متأخرة في
شهر ديسمبر وتنزل لتبحث عن مواصلة إلى المنزل، فتجد على العكس فرصة نادرة
كرجل أن تمشى " مشي بطل " وتجد مصدر رزق جديد قد يجعلك تقضى الليلة
بجوار مكان عملك، فرصة رائعة ولكن لا..... شكراً،

أعود إلى البيت لأشاهد التلفزيون قليلاً وأجلس أمام الكمبيوتر بعده ثم أنام.
يوم الجمعة تجتمع العائلة، أنا بالنسبة للمنطقة ابن حلال " ماشي جوة الحيط "
وليس لي أصدقاء إلا من كانوا معي في المدرسة، وتفرقنا وإن قابلت أحدهم في
الطريق فيكون لقاءً سريعاً في كل شيء على طريقة : " ازيك عامل إيه طمنا عليك "
كلمة واحدة تقال بدون أن نتوقف ثم يجد كل منا طريقه، كما أنا مثالي وحياتي تشرق
بالسعادة..

حتى جاء الخبر ..

عودة عماد بدوي...!

من هو ؟

هل تعرف وأنت في المدرسة، ذلك الشاب المؤذي المدلل ابن الكلب الغنى الذي يجمع مجموعة من أبناء الكلب الآخرين ليكون شيئاً مثل العصابة، لا يفعلون شيئاً سوى جعل أيام الدراسة تحمل ذكريات بغيضة، تتمنى أن تشتت هؤلاء " البهائم اللئيمين " بيخلفوا ويرموا "

يفعل كل ما يجعله رجل في سن تعني الرجولة له سيجارة وشتائم بذينة والذهاب لكي يقف أمام مدرسة البنات لتجد من حظك أنه يترك بنات المدرسة جميعهن ويصاحب أختك لتنفجر غضباً وتتمنى أن تضع الطين فوق رأسك، قبل أن تدرك أنها طريقة جيدة ليرحم أهلك في المدرسة ويكون وقتها الملاك الحارس لك فتضع الإريال على رأسك بكل فخر وتنتهي القصة بأن تنتهي المرحلة الثانوية على خير والجامعة تفرق الجميع.

هذا هو

كان أهله في إحدى الدول العربية و عاد وحده مرة أخرى لمصر و الشارع ليبحث عن ذكرياته أو عن من يساعده في قتل الوقت بصورة مسلية، وكم هذا سهل طالما أنت غني، فأفضل الأصدقاء هم الذين يشترون بالمال، طالما معك هذا المال فأنت تمتلك أخوة وفي بعض الأوقات " بودى جارد" ، أما إذا كنت لا تملك شيئاً فتضع دائماً أصدقائك في اختبارات صعبة كمثل أن يختار الذهاب معك في مشوار هام، بدلاً من متابعة فيلم للفنانة زوزو شكيب، أو بين أن يحضر عزاء أحد أقاربك بدلاً من متابعة مباراة غزل القناة و بلدية بنى سويف، صديق الحق هو صديق مصلحة مادية مشتركة.

ستجد دائماً أقرب أصدقائك يجمعكم شيء مشترك ككرة القدم أو الفن أو المخدرات، ولكن لا صوت يعلو على صوت المال، وكل صديق وله ثمنه.

يعيب شارعنا أنه ضيق، فمهما حاولت أن تتفادي أحد ستجد نفسك في حضنه، وجدته
قادم، تغير كثيرًا، ملامحه أصبحت أكثر حدة وشفته باهتتان بعض الشيء وظهر
بعض الشعر الأبيض في جانبي رأسه، لم يكن يكرهني ولا أتذكر احتكاكي به كثيرًا
لكنني لم أكن أطيعه بأي حال من الأحوال، أتمنى أن يلتزم بقواعد جماعة أصدقاء
المدرسة المقدسة " إزيك عامل إيه طمنا عليك " ثم نرسم طريقنا إلى قدرنا في هدوء
" يااه..... خالد "

أنا بنظرة تمثيلية بلهاء

" عماد إزيك عامل إيه طم..... "

" واحشني يا راجل، لم تتغير نهائي " مقاطعًا كلامي

" أهو بقي، أنت عامل إيه طم..... "

" أنا سألت عليك جمال وقال لي إنك لسه زي ما أنت وكنت عايز أشوفك "

إنه يدمر قواعد مقدسة عندي منذ أعوام،

" أنا موجود أي وقت كلمني وأبقى طمني ع..... "

" أنت معاك موبايل "

لماذا لم ألتزم بالنص، طمنا عليك، طمنا عليك، طمنا عليك

" آه طبعًا خده و كلمني أي وقت، و ابقى طمنا علي..... "

" قشطة يا خالد ماشي حكلمك و نتقابل كلنا بكرة إن شاء الله على 7 أو 8 "

أنا بالتصوير البطئ

" تمام، بكرة "

" ماشي يا خالد "

ثم سكت للحظة

" و ابقى طمنا عليك يا أبو حلمى "

مبتسمًا

ثم سار و هو يلوح بيده الذى تمنيت أن أضعها في..... فمه
ما هذا الذى حدث منذ لحظات، كيف عرفنى، ولماذا لم يلتزم بقواعد جماعة الأصدقاء

المقدسة، و كيف أعطيته رقم هاتفى،

و الأهم من كل هذا

مين جمال ابن المرأة سيئة السمعة دا

هذا العماد هو آخر شخص أتمنى أن أكسر عاداتى اليومية لأجله

و بالتأكيد " نتقابل كلنا بكرة" لا يعنى ملتقى الفكر الإسلامى الحديث

بل مجموعة من اسوأ أبناء المنطقة والكثير من المخدرات و قد يرتقى الأمر إلى ما
هو أكثر ..

والأسوأ من ذلك إننى نسيت أن أحتفظ برقم هاتفه حتى لا أرد على مكالمته

هذا يعنى أننى لن أستطيع أن أرد على أى رقم غريب لمدة يومين على الأقل

ذهبت إلى المنزل، غداء، تلفزيون، كمبيوتر، السرير

أنظر إلى السقف

لما لم أتجاهله

لما لم يتجاهلنى، لما ؟؟؟؟؟؟؟؟؟؟؟؟؟؟؟؟؟؟؟؟؟؟؟؟؟؟؟؟؟؟؟

أذهب كل يوم إلى العمل الذي يبدأ في الثامنة صباحًا كما قلت في مجموعة محلات شهيرة، هي ملك "الحاج" و في عالم البيزنس الألقاب تلخيص لكل شيء، فهناك "المعلم سماح" و "الحاج عبد الهادي" و "عزت بيه" إلى آخره، و يمكنك تلخيص حجم الأملاك من ذلك اللقب، فلقب "الحاج" يتفكك إلى أربع أو خمس "معلمين" و هكذا البية أعلى ثم الأعلى إلى ما تبقى في الألقاب.

المهم أن تلك الألقاب خاصة تعبر عن أن البيزنس " في بيتها " أي أن كل من يعمل في الفروع من أقارب أو أبناء الحاج الذي نظرًا لأن ربنا فتحها عليه، فتزوج خمس وسبعين مرة و يملك حوالي ثمانمائة ابن و ابنة و لا يدري عدد النساء التي على ذمته الآن، و لأن كله " ابن كار و عايز يبقى زي الحاج بياع" فلا أحد يقترب إلى تلك المهنة البغيضة، فالمحاسبة ليس بها خيال أو إبداع، أرقام و أرقام ثم أرقام، ولولا أن الحاج يرى إن في كل شركة كبيرة قسم حسابات لكان أتى بشحته ابن أخته و قام بكل هذه الحسابات بيده في ساعة، لكن لكرم أخلاقه تركها لهؤلاء الغلابة المحاسبين، و للصرامة لم آتي لهذه المهنة بعد " انترفيو" مع الموارد البشرية ثم مقابلة مع الحاج الذي سألتني " أين ترى نفسك بعد 5 سنوات " لكن ووحيد زوج أختي الوحيدة سامية هو الآخر معلم عند الحاج، فرشحتني لتلك الوظيفة حتى لا تخرج نقود المحلات لحد غريب، ووحيد أكبر في العمر من أختي بأكثر من عشرة أعوام، على أي حال من الأحوال أعتبر بشكل أو بآخر جزء من معارف صاحب تلك التكية.

الساعة الواحدة وأنا في العمل، يرن الهاتف، رقم ليس مسجل، إذن عماد، ولكن الخوف أن يكون أحد الفروع يتصل بي للسؤال عن شيء، سأتركه، ولو كان موظف أو شيء يرتبط بالعمل فبالأكيد سيتصل على هاتف العمل، يرن مرة أخرى، أنظر إلى الهاتف أرى في ذهني صورًا لعماد يعرض علي زجاجة خضراء ويضحك أنا أخذها منه.

مستطردًا ...

" أنا جمال يا عم، أنت نسييتي "

" جمال مين ؟ "

محدثًا شخصًا بجانبه

" دة نسيني، أنا يا عم جمال اللي كنت معاك في المدرسة "

ابن المرأة سيئة السمعة،،،، لا أتذكر من هو ولكني أعرف ماذا سيفعل

" عماد والشباب معايا، وكلنا عايزين نشوفك "

بصوت باهت لشخص ميت " وأنا كمان،،،، والله "

" طيب النهاردة سهرانين في بيت عماد وكلنا مستنيينك "

" أنا النهاردة مرتبط بميعاد ويمكن أتأخر "

" مفيش مشاكل معانا حنسه لمتأخر "

يا برود الست الحاجة

" يبقى لو كدة حجيلكوا إن شاء الله "

يرد بكل برود وهو يضحك بكل استفزاز

" طب متتأخرش "

" حاول إن شاء الله "

يسكت ويستمع لشخص ما بجانبه ثم يضحك ضحكة بلهاء

" و.. أبقى طمننا عليك "

ثم فاصل من الضحك الهستيري الأبله

أغلق الهاتف،

أنظر إليه قليلاً،

آجلاً أم عاجلاً كان سيحدث،

لن أذهب، سينزعجون مني، ثم يتركوني لحالي

تلك خطوات بسيطة قد يتخللها محاولة الاتصال بي عدة مرات وقليل من الإصرار
على عدم الرد منى أو عدم الاهتمام،
يأتي المساء، تلفاز كمبيوتر ثم سرير،
هاتف على وضع الصامت
ما أجمل الحياة...

صوت منبه ..

الساعة السادسة والنصف

أنظر إلى الهاتف، ثلاث مكالمات فائتة فقط من رقم ليس ذلك الجمال، أعتقد أنه عماد،
أبدأ اليوم كالعادة مشيًا على تلك الخريطة الأبدية، إذا سألتني كم خطوة ما بين المطبخ
والحمام وغرفة النوم لن أتذكر، وقد يصعب علي رسم خريطة لتحركاتي اليومية في
المنزل، ببساطة مثل أي شخص، عقلي يعرف ما يعمل بدون الحاجة للتفكير، أجد
نفسى أمشى في تلك الخريطة التي لا يمكنني استدعائها في لحظة سؤال عن تفصيلها
ولكن عقلي يعرف تحركاتها بدقة غير متناهية، منذ أيام الجامعة وأنا في نفس تلك
الخريطة، إلى أن رن الهاتف على غير العادة، لأجد نمرة عماد، إنها السابعة إلا ربع،
ماذا يريد الآن، بالطبع لن ابدأ اليوم بالرد على تلك المكالمة، الهاتف يعود للوضع
الصامت، ثم أجد نفسى واقفا، لا أدري ماذا حدث في الخريطة اليومية، كلما وضع
أحد هؤلاء التعساء بصمة في يومي، كافية لتقلب اليوم رأسا على عقب، أذهب لألبس
ملابسي قاطعًا على نفسى مراجعة الخريطة المقدسة، لأجد أمي تذكرني بأن الإفطار
على المائدة

" مش حتفطر ولا إيه يا خالد "

" حالبس واكل يا حاجة "

" اشمعنى النهاردة "

" أصلي مستعجل عايز أروح الشغل بدري "

" طيب ربنا يوفقك يا عنيا "

أجلس لأفطر، ثم أفتح الباب وأنزل متخذاً الطريق إلى ميدان رمسيس، أتوقف لشراء حلوى النعناع من أجل نفس أكثر انتعاشاً وأمضي، وإذا بي أجده أمامي مرة أخرى.

يقف عند المسجد في منتصف الطريق ما بين بيتي وأول الشارع، بالطبع لم يكن يصلى فأى صلاة تلك الساعة السابعة بأي حال من الأحوال،

أمام الجامع بيت أحمد الشيخ، الذي هو بطبيعة الحال ليس شيخاً، بل هو أشهر ((ديلر)) في المنطقة، ولا أعتقد أنه أيضاً كان يشتري منه شيئاً

لم أحاول التملص منه أيضاً تلك المرة، بالطبع لم أكن أستطيع أن أقفز على طاولة العيش فوق رأس بائع الخبز الذي يقود دراجة، أو أن أختبئ في مشنة بقدونس لبائعة الخضرة حتى يمر،

" صباح الخير يا عماد "

كان واضحاً عليه أنه مستيقظ منذ سهرة أمس، ولكن الأكثر وضوحاً هو هدوءه ونظراته الواثقة، ابتسم ابتسامة خفيفة

"كنت متأكد إنني حقابك دلوقتي"

أنا بنظرة متسائلة

"أنت كنت مستنيني"

بهدوء شديد ولم تمحى ابتسامته

" أكيد، كنت عايز أعرف أنت زعلان مني في إيه "

أنا بنظرة من نوع " قال يعنى استغربت "

" أكيد مش زعلان منك، بس رجعت امبارح تعبان وراحت عليا نومة "

" ماشي ححاول أصدقك يا خالد، ممكن أتمشي معاك لحد أول الشارع"
أنا وقد بدأ القلق يظهر على ملامحي مهما حاولت إخفاءه
" أكيد "

أخذنا نمشي بهدوء
هو يسير واضعاً يده حول ظهره واضحاً عليه الاستمتاع بتلك التمشية
" أنت عامل إيه يا خالد، سعيد"
" الحمد لله "

" وإيه أخبارك، وأخبار سامية إيه، جوازها ماشي"
" الحمد لله ماشي"
" خلفت ولا لسة"
" لا لسة، ربنا يكرمها"
" آمين يا رب "

يقف لثانية وقد اقتربنا من نهاية الشارع
" أنا عارف أنك ما كونتش بتحبني وإحنا صغيرين، بس الكلام دا زمان واحنا
صغيرين، أعتقد إن الوضع اختلف دلوقتي"
هو مستطرد

" بس أنا كنت بشوفك مختلف"
أنا بنوع من القرف الغير صريح
" الله يخليك "
هو بهدوء

" أنا مش حعطلك، بس أنا عايز أقعد معاك النهاردة"
أنظر إليه باندهاش لدرجة أن حاجبي الأيمن طار من على رأسي
" كأصدقاء، عادي "

مازال الحاجب لم يعد إلى وجهي

هو متابعًا

"النهاردة، على القهوة الساعة تسعة، مفيش مبررات ولا نمت ولا سافرت"

يلف ليأخذ عكس اتجاهي ويتابع

" يلا عشان متتأخرش على الشغل، وخذ حاجبك معاك وأنت ماشي"

يسير متجهًا إلى ما يتجه إليه..

أمشي وحاجبي كان قد اختفى ما بين السحاب،

لن أسأل نفسي ماذا يريد

نحن الآن قد تعدينا تلك المرحلة منذ خمس أو ثمان صفحات

السؤال هو

لماذا لم يمت في الغربية

لماذا لم تنفجر به الطائرة وهي تقلع

أو " رشقت ببوزها وهي نازلة"

او انهارت المنطقة قبل أن يأتي

لماذا تحدث الكوارث الطبيعية فقط حين لا يحتاجها أحد،

لا أعرف أي شيء

كل ما أريد أن أعرفه

متى سيعود وجهي من رحلة الدهشة تلك ؟

أسير متوجها إلى الميدان ومنه إلى العمل، أجد نفسي أدخل، وأنا في قمة الانزعاج

أجلس لإهدأ قليلا، يأتي الشاي، أرتشف وانظر في الفراغ

لماذا أفعل كل هذا، أحس إنني أعطي الموضوع فوق حجمه، قد يكون يريد فقط

التحدث كأى شخص وحيد لم يجد ضالته في هؤلاء " الصيع" الذين وهبوا حياتهم

للغريزة ..

فلتسر الحياة بشكلها العادي، وسوف يظهر ما يختبئ في صدره
فلننتظر

ونرى الليلة..

أستغرق في العمل حتى لا أفكر في الموضوع، والعمل نعمة لمن يريد أن ينسى بالطبع
إن كان هناك ضغوط فيه، إن كنت تفكر في شيء ما وأردت أن تنساه فانهك في
العمل، أما إذا كان يومك فارغاً مثل يومي، فتجد عماد في كل ورقة وكل وجه تراه
خلال اليوم وتتخيل أنك تقود الطائرة التي أتت به وتقول "لا إله الا الله" في
الميكرفون ثم تدخل بالطائرة في منزل جمال ابن سيدة الأقمار السوداء لتنتهي مأساة
قبل أن تبدأ.

ماذا كان ينقص حياتي ؟ قليل من الإثارة!

لا أعلم .. ربما

ثم أثناء تقلبي في بعض الأوراق، جاء صوت من وراء ظهري

" إيه يا أبو نسب"

"معلم وحيد"

وحيد، في منتصف الثلاثينات، ولكن ملامحه يصعب معها أن تقول أنه شاب، حاد
الملامح بالرغم من كونه طيباً ومسالماً، متزوج من أختي منذ أعوام ولم تشتك منه
قط عندما تأتي ، وهو كأي معلم كريم وابن بلد وقليل المعرفة..

هو " معلم إيه بس، هو في بينا الألقاب دي"

" ماشي يا رياسة، عامل إيه والمدام عاملة إيه، منكدة عليك"

" لا يا عم ربنا ما يجيب نكد"

" استنى لما ربنا يكرمكوا بعيل، وأنت حتشوف"

يرد بنظرة لم أفهمها

" إن شاء الله يجي ونشوف"

ويستطرد...

" وأنت مش ناوى تتأهل وترسى كدة "

" منين يا عم ما أنت شايف الدنيا إزاي "

" اتجوز واقعد مع الحاجة "

" يا عم فين بس، ومنين، ومين اللي تقبل كدة "

" يا عم ملكش دعوة، إنوى أنت وألف من تتمناك، دة أنت أخلاقك الناس كلها بتحلف

بيها "

" الأخلاق مابتجيش نيش يابا الحج "

" أقعد أنت أنبر فيها، قول إنك ناوي، وأنا أجوزك في نفس الأسبوع "

خيال شاسع

" طب إديني وقت أفكر وأقولك، بس دة مش معناه إني بقول آه "

" ماشي يا خالد، أنا ورايا كم حاجة هخلصها مع الحاج وأتكل، تبقى تيجيلنا بقى مرة

نغديك "

" ماشي، أسحب أمي وأجيلكوا "

" اتفقنا يا حلاوة "

" سلام يا معلم "

ثم يتركني ويمشي

أتزوج

يعود حاجبي بعد غيبة إلى وجهي مرة أخرى في شيء ما بين التهكم والاستنكار

للفكرة،

أعود للأوراق

الساعة تشير للثالثة

أجمع أوراقى التي لم أفعل بها أي شيء

أترك المبنى إلى المنزل

ثم

عماد

الفصل الثاني

كل الطرق تؤدي إلى المجهول

الموبايل يرن

الساعة الثامنة، بالطبع هو، أجيب لكي أسمع صوته الهادئ

" أنت فين "

" في البيت "

" طيب مستنيك على القهوة كمان نص ساعة بالضبط "

" تمام "

أرتدي ملابسي، صوت أمي

" رايح فين يا خالد "

" نازل القهوة شوية "

" قهوة، دة من إمتي ؟ "

" أهو تغير يا أمي من القعدة شوية "

" آه والنبي يا ابني اطلع وشم هوا "

وتتابع

" وحتقد مع مين ؟ "

" المنطقة "

" أوعى تكون حتقد مع عماد، أنا سمعت إنه رجع وصيِّع الحتة كلهم اتلموا حواليه "

" وهي حتنا دي فيها حاجة تانية غير صيِّع يا حاجة، أكيد حلاقيه "

" خلى بالك يا ابني أحسن دا أبوه وأمه غلبوا منه، بيقولوا كان خاربها هناك عشان

كدا نزلوه مصر "

"مين اللي قال يا حاجة"

" أم ولاء كانت بتكلم أم حازم جارتهم القديمة، وبتقول إن امه بتقول لها إنها راحت منه"

" الله يطمئنك يا أما، هما كانوا في السعودية؟"

" لا يا أبني، باينها قطر"

" طيب يا حاجة " ..

أرتدي الحذاء، أنظر إلى الساعة، وأنزل، المقهى ليس أكثر من 100 متر من المنزل بالقرب من منزله القديم، كنت قد سمعت أن لديهم بيت جديد من النوع الفاخر ها هو جالس على المقهى وحيداً، أكثر ما يخيفني منه ليس تاريخه، ولكن حاضره، أصبح هادئ وتعلو وجهة ابتسامة ثقة خفيفة دائماً، وهو على غير باقي المنطقة يعرف كيف يختار الكلام المناسب في الوقت المناسب القهوة كأي تصميم قهوة في مصر محل صغير وأمامه مساحة لوضع " الفرشة" وجدته يجلس داخل المحل، شيء رائع هذا سيعطينا قدر من الخصوصية، ولن يعرف أحد إنني كنت معه، أجلس دون أن أصافحه كأني أراه كل يوم " باشا، اتأخرت عليك"

يرد مبتسماً

" لا خالص، أنا لسة جاي"

" طيب هايل، عامل إيه في مصر، مبسوط"

" طبعاً، المنطقة وحشاني والناس وحشاني"

" والجو الزباله والزحمة والقرف، وحشوك برضو "

" ما إحنا اتولدنا فيها وعشنا فيها، معرفناش الكلام ده إلا لما سافرنا برة، وبرضو

تفضل فيها ذكرياتك "

انظر إليه و ليس لي طاقة للجدال

" لا مش مواظب "

يرد مفسرًا

" ما كلنا كدة "

أنظر له شذرا

" مين كلنا ؟ "

" الناس كلها كدة، تصلي شوية آه وشوية لأ "

أرد باستنكار

" ما أعرفش "

" خالد أنت ليه شايف إن العيال اللي بتشرب مخدرات مفيش فيهم أمل "

ويستطرد وينظر إليّ

" أو شايف نفسك أحسن منهم يعني "

" أنا عقلي لسه معايا ومش بايعه، وباقي على صحتي "

أخيرًا تصل القهوة، أتناول كوب الماء لأخذ منه رشفة ثم أنظر له وهو يلقي بطرف عينه على تليفزيون القهوة الذي يذيع أغنية لفنانة من اللاتي تؤمنّ بالنظرية العالمية

القائلة " إن حجم نجاح وشهرة أي فنانة يتناسب طرديًا مع حجم مؤخرتها "

" كلام جميل "

ويلتفت لي

" بس كلام أهبل يا خالد، بتاع عيال إعدادي "

أنظر إليه مستنكرًا

" ليه يا عم الكبير "

" لو بصيت بعينيك بدل مخك، حتشوف إن أغلب الناس الوحشين من نظرك بيموتوا عادي مع الناس الكويسين، إلا لو واحد ضايع خالص، لكن في الآخر البشر كلهم بيعيشوا نفس العمر، وبيعوا بنفس الأمراض، وبيعوتوا من غير سبب محدد"

يلتفت إليّ رافعاً حاجبه

" الحشيش ما بيحبش كانسر يا خالد"

ثم يستطرد..

" الصحة دي حاجة ملهاش مقياس، وما سمعناش عن موت جماعي بسبب المخدرات"

يشرب رشفة من القهوة

" أنا ما بقولش إنها حاجة كويسة، بس مش وسيلة حكم على شخص أبداً "

أنا بصوت عالي

" يا سلاااام"

لهجتي تصبح أكثر حدة

" دة على أساس إيه إن شاء الله، إن المخدرات مش حرام وإن مش أغلب الحوادث أصحابها بيبقوا تحت تأثير المخدرات، وبعدين الحشيش دة بقى نادر، البرشام بقى أسهل من السجاير، بلاش يا عماد الـ أي كلام دة "

" دة لما يكون مجرم ، كان تحت تأثير المخدرات أو لا فهو مجرم أساساً "

ينظر إليّ

" لكن لو أخوك بيشرب مخدرات، أكيد مش حيبقى مجرم، حيبقى تصنيفه شاب طايش وربنا حيهديه إن شاء الله، الاختلافات دي حاجة إحنا اللي بنحطها، شيل المخدرات واحكم على الأشخاص، حتلاقي مافيش فرق الإنسان هو الإنسان، المخدرات خطينة عادية "

ثم ينظر إلى التليفزيون

ينظر إليّ ويضحك
" لو سمعت الكلام حেশيك "
نتمشى حتى نصل إلى الجامع
أنظر إليه بدهشة
" هو أنا ما صلتش من كام يوم بس اللي أعرفه إن ما فيش حاجة نصليها دلوقتي، دة
غير إني مش متوضي "
ينظر إليّ
" أنت فين دلوقتي يا خالد "
أنظر حوله
" أنا معاك يا عماد "
" لا أنت مش معايا "
" لا أنا معاك بس أنت اللي مش شايف بس، ركز حتلاقيني معاك "
يمسكني ويلف جسمي وينظر إليّ
" إحنا حنرقص باليه ! "
" ممكن يا خالد كفاية ألش .. أحسن ما أعب معاك باليه بجد "
أرد بضجر
" حاضر يا سيدي "
يحرك رأسه فيما يعبر عن الرضا عني
" ها، أنت فين ؟ "
" أنا مش فاهم يا عماد أنت عايز إيه، ممكن تسهل الموضوع عليّ "
يرد موضحًا
" طيب "
" بص يا خالد، إيه اللي على يمينك وأنت واقف دلوقتي "

" الجامع "

"كويس في تقدم "

" وإيه اللي على شماك "

انظر متأملا

" بيت ، عمارة "

" أيوة بيت مين ؟ "

" ناس كتير ساكنة أم غالي ، وحمادة فكري "

يكمل لي الكلام مقاطعًا

" وأحمد الشيخ "

" أكيد طبعًا "

يكمل..

" وأحمد الشيخ دة ديلر وبتاع نسوان وكل حاجة "

أرد مستفهمًا

" أيوة وبعدين "

" دة مكانك يا خالد "

يستكمل بنظرة حادة

" خالد أنت في النص، أنت مش جوة الجامع ولا قاعد مع أحمد الشيخ "

يلتفت وهو يمشى حولي في دائرة

" ودة معناه إنك من غير زعل .. فاشل.. أنت في نظر الناس كويس بس عشان

مابتعملش حاجة غلط، وشايف نفسك كويس بس عشان أنت مش مع الوحشين، لكن

دة غلط "

أنظر له

" معلش يا عماد بس دي هرتلة "

" أنا ما أنكرش إني في شوية حاجات غلط فيا بس لو كملت حبقي ناحية الجامع "

يقاطعني

" بس ما كملتش "

استطرد

" بس أنا أقرب من الجامع أحسن من إني أكون ناحية أحمد الشيخ "

يقاطعني

" تفكير غلط برضو "

" أنت فاطر أنك أسهل لك تكون في النص عشان تكون أقرب للجامع، بس دة ما يمنعش إنك قريب من أحمد الشيخ، واللي مانعك مش عشان إنك عايز تروح الجامع، وإلا كنت روحت له، بس عشان أنت بتشوف الجانب الآخر حييوظ سمعتك أو خايف تجرب "

أرد بعصبية

" إنك تكون في النص أحسن ما تروح الناحية اللي فيها أذية ليك ولأهلك، إنك تحاول تروح ناحية الجامع دي سهلة، بس شوية إرادة، ودة حال الناس كلها "

أستطرد..

" كلنا عايزين نبقى كويسين، ناس كتير تتمنى تكون مكاني عشان تبقى أقرب للصح، وبتندم على كونها في الاتجاه الآخر، اللي ببساطة بيروح فيه ما بيرجعش "

اسكت لحظة وهو ينظر إليّ

" أنا عارف إن في حاجات كتير بعملها غلط، بس في النهاية أنا مش وحش أبداً، ومقتنع باللي بعمله، وحبقي أحسن "

ينظر إليّ بعمق ويسكت للحظات، ثم يتكلم

" شوف يا خالد أنا عارف نظرتك ليا وفاهم كلامك، ونييتي إنني أساعدك، لأنني فعلا شايفك محتاج مساعدة "

أنظر إليه متعجبًا مستغربًا مستفهمًا

" عماد أنت شارب حاجة، مين فينا اللي محتاج مساعدة يا عماد، أنت ولا أنا "

يرد بقوة

" لا أنت يا خالد "

ويكررها بحزم رافعا سبابته تجاهي

" أنت يا خالد "

ويستطرد بأسلوب يظهر عليه مزيج من الاهتمام والانفعال

" أنت مش شايف نفسك كويس، ومش عارف أنت فين بالضبط ومحتاج تفوق فعلاً "

يأخذ نفسًا عميقًا

" خالد أنت في النص، أنت ما بتعملش حاجة غلط، بس برضو ما بتعملش حاجة

صح، سايب نفسك للتيار والروتين، ومحدث بيخش الجنة من غير ما يعمل حاجة

كويسة، وأنت نفسك قایل أنت بتعمل حاجات غلط كثير، يعني دلوقتي في النص بعيد

عن أحمد الشيخ، بس في النهاية حتلاقى نفسك على الخازوق اللي جنبه "

" مقياسك للجنة والنار مع الناس مش مع ربنا، إن الناس بيقولوا عليك كويس عمره

ما حيدخلك الجنة يا حبيبي، أنت محتاج تعمل حاجة عشان تبقى كويس فعلاً، مش

عشان يبقى شكلك قدام الناس بس اللي كويس "

ثم يستعيد هدوءه فجأة

" وأنا عارف، أنت ممكن تكون حاولت تكون كويس، بس أكيد فشلت كثير، لأنه

ببساطة صعب عليك "

أنظر له مُستسلمًا نسبيًا لوجة نظره، وأكمل كلامي

" بس أكيد أنا أحسن من إني أكون في الجانب الخاطيء "

ينظر إليّ بتصميم

" أنت أكيد في الجانب الخاطيء "

" ببساطة يا خالد، أنا عايز أساعدك، وعندى لىك عرض كوىس جداً "

أنظر له بلا مبالاة

" أحب أسمع أكىد "

ىنظر إلىّ وىتكلم بهدوء

" ببساطة أنت خامل، غير قابل للتعدىل أو التغيرىر، ودى المشكلة، وحلها بسىط "

أنظر له ممثلاً الاهتمام

" اتفضل "

ىرد بابتسامة

" عشان تبقى شىخ، لازم تروح لأحمد الشىخ "

حواجبى تتكسر على جبىنى

" خالد عشان تتغير لازم تاخذ إتجاه "

أقاطععه وأنا أمشى مبتعداً

" عشان مش عارف أبقى كوىس أروح أبوظ، دة هبل "

ىلاحقتى متابعاً

" هو دة حلك الوحىد، تتغير للأسوأ عشان تعرف تتغير أساساً، بعد كدة حتتغير لىلى

أنت عايزه بسهولة "

أقف ناظرًا إلىه بحزم

" عماد كفاىة قوى كدة النهاردة، أنت شكلك مبسوط وبتعشى علىاً "

والتفت مستكماً طرىقى

ىعلى صوته مستوقفاً إباى

" طب بص، أقف ثوانى بس "

أقف وأنظر له:

" أنت حياتك مملة جداً، بص فيها حتلاقيها تكرر يومي لأحداث عادية ومملة، ركز وشوف يومك بطريقة عقلانية وقولي إيه اللي حلو يا عم الكويس يا أحسن شاب في الشارع "

يمسك كتفي وينظر إليّ

" آخر حاجة حقولها يا خالد "

يثبت عينيه على عيني

" أنا مش حكلمك لمدة شهر، عايزك تبص فيه لحياتك، وتتأمل يومك، وتحاول تكون جوة الجامع، ولو عرفت وواظبت، أنا حكون سعيد ليك جداً "

يستكمل وهو يحرك رأسه ناحية اليمين

" ما كانش، تعالى جرب معايا شهر بالضبط ، حوريك العالم من ناحية أحمد الشيخ ، بس برة المنطقة ومن غير ما حد يعرف خالص أي حاجة حنعملها "

" فكر كويس يا خالد وشوف حتعمل إيه، أنا ما ليش مصلحة في فسادك، ومش حكسب حاجة بإضافة فاشل جديد، أنا عايز مصلحتك "

أنظر إليه نظرة فارغة من أي مشاعر بالسلب أو الإيجاب

" سلام يا خالد، أشوفك كمان شهر بالضبط "

ألوح بيدي على طريقة " بأي حال من الأحوال "

وأتمشى إلى البيت بهدوء وخطوات بطيئة

أنظر إلى الأرض قليلاً ثم إلى السماء قليلاً، أفكر في كلامه

أجد المنزل أمامي أطلع السلام التي أصبحت تبدو كسلام معبد في التبت

أشعر كأنني أسير في مائة عام

ليس كلامه ما أثر فيّ بقدر مدى اهتمامه العجيب بحالي،

أعرف أن كلامه قد يكون به قدر من المنطق ولكن هذا لا يستدعي أن يكون ما يقوله صحيحاً بالمرّة

إنه ناقوس خطر إلى مدى حاجتي لأن أغير صورتني أمام الناس
ما لاحظته عماد قريباً سيلاحظه الآخرون

سأتغير

وسأنجح

ولكن يظل سؤالي

لماذا أنا يا عماد ؟

لماذا أنا ؟

ما الذي جاء بك من وراء الشمس حتى تقف في منتصف طريقي الصغير إلى العمل؟

أصل أخيراً لباب المنزل

أدخل

أغير ملابسي

تلفزيون، كمبيوتر

تفاحة من الثلاجة

السريير

نظرة سرمدية إلى السقف

ثم لا شيء

الفصل الثالث

الإسلام هو الحل

صوت المنبه

الساعة السادسة والنصف .. كما هو معتاد كل يوم
ولكنني قررت ألا أجعله ككل يوم، إنه بداية... وبداية جديدة، إن ما يحدث لي هو
علامات، فقد ابتعدت عن طريق الله طويلاً، وعماد أيضاً علامة إنني ابتعدت بعيداً
استيقظت وأنا لا أتذكر من الأمس سوى العبرة، سوى إنني يجب أن أعود
استيقظت ودخلت الحمام لأتوضأ، ثم بحثت عن سجادة الصلاة وذهبت إلى غرفتي
لأصلي، أسمع صوت خطوات أمي تمشي خلفي وتتمتم
" ربنا يهديك كدة يا ابني على طول"

أذهب للإفطار، فأجد أمي تضعه لي والابتسامات تملأ وجهها، فأشعر بالرضا من
داخلي، إن عمل الصواب في النفس الغافلة له أثر السكر في الحلق المرير، انتهى من
الإفطار لأشق طريقي إلى العمل ككل يوم، أشعر بشيء غريب، إحساس بالإيجابية،
أعود إلى العمل وأنهمك فيه، يؤذن الظهر ثم العصر فأصليهما في موعدهما، مع
زملائي من العمل، من السهل أن تقوم بشيء يتم في جماعة، فكلما كان قريب منك
جامع وأنت ترتبط برواده، فمن السهل المواظبة على الصلاة به، فما بالك بالعمل!
أنتهي من العمل لأجد طريقي إلى المنزل، وأنا متجه أنظر يميني ويساري، لعلي أجد
عماد أو أحد أفراد شلة الأتس، لكني لا أجد أيًا منهم ، ولا حتى القهوة بها أحد، إنها
هجرة جماعية لوباء الإيبولا من وسط القاهرة التعليمي
في المنزل، أصلي المغرب، تليفزيون، كمبيوتر ثم أنام

ليس صوت المنبه

ولا ضوضاء الشارع

استيقظ بهدوء، إنها التاسعة، بالطبع يوم الجمعة،

يوم الإجازة، مر 4 أيام و أنا مواظب على الصلاة و متحدثاً كل عقبات و سلبيات حياتي، دعك إنني لا أعرف لماذا أفوت صلاة العشاء، و الظهر يدخل في العصر أحياناً ولكنني ما زلت أحاول الثبات و أقوم بعمل غير سيء على الإطلاق مقارنةً بما قبل ذلك، لكن أهم ما في الموضوع الثبات، الإرادة، بالطبع لن أتجه إلى البحث عن عمرو خالد أو شيخ من شيوخ التلفاز الذي لا تفهم من الصفيق الذي جعله يظهر في التلفاز ليبحث عن الفتاوى المجهولة، و لكنني سأقوم بعمل شيء جديد لم يفعله أى إنسان مصري مسلم من مواليد 1915 فيما فوق ذلك، عادة انتهت منذ سنوات سأضع نفسي في السبق كأول مواطن يضع حجر الأساس في ذلك التقليد العريق الذى تناسته الأجيال السابقة ..

سأحضر خطبة الجمعة منذ بدايتها

منذ ولدت وأنا أجد أبى يقول لي، " يلا يا ابني الصلاة حتفوتنا"
لأذهب معه إلى الجامع والشيخ كان قد بدأ بالدعاء الذي قبيل الصلاة فكانت تلك الصلاة على ما أعرف، هو أن تلحق الصلاة قبيل بدايتها أما ما هي الخطبة وعن أي شيء تحكي، لم يكن مهماً أبداً في رأي معظم الناس، فالشيوخ مكررون، كلما اقتربت مناسبة دينية يبدأ لإعداد خطبتين ليحكي عن أهمية تلك المناسبة، ويحفظ الخطبة للعام القادم لنفس الاستخدام، فيما عدا خطب المناسبات، كنت دائماً أتخيل الشيوخ يفتحون كتاب مثل " زاد الميعاد لهدى خير العباد" ويبدأ في فرز صفحاته بعشوائية والصفحة التي سوف يقف عندها هي موضوع الخطبة القادمة..

ولكن ماذا لو استمعت تلك الخطبة من بدايتها كل مرة كل عام، على الأقل سوف تكون عالمًا بعض الشيء بأمور الدين، هذا إذا وضعنا الملل جانبًا لدى بعض الشيوخ وعدم التجديد، فبالأكيد للخطبة منفعة ما، وقد تحمل خطبة اليوم لي علامة جديدة تساعدني على الثبات أكثر وأكثر

أدخل الحمام لأتوضأ، أصلي الصبح، أتناول إفطاري بهدوء شديد وأنا أشاهد فيلم لإسماعيل ياسين، أدخل لأستحم، واستعد نفسيًا لصلاة الجمعة ..

أنظر في الساعة، خمس دقائق على آذان الظهر، ارتدى ملابس لي وأتأهب للنزول، صوت أمي

" رايح فين بدري كدة يا ابني "

" نازل أصلي يا حاجة "

ترد والتعجب يرفع حواجبها إلى جزء في الجبهة لم تلمسه من قبل

" ما لسة شوية على الآذان "

أرد باسمًا

" ما أنا صاحي بدري قولت أحضر الخطبة من أولها "

ألتفت وأتجه إلى الباب

" سلام عليكو يا حاجة "

ترد السلام مع وابل من الدعاء السخي الذي لن يقوم به شحاذا أعطاه شخص ما 200 جنيه ورقة واحدة،

أنزل أتمشى خمس دقائق لأجد نفسي أمام الجامع الخاوي، وحينما أقوم بخلع حدائي،

يرفع الآذان داخل الجامع، فأبدأ بالدعاء، ثم أمشي لأخذ مكانًا في أول الصفوف

وأجلس مستحضرًا هيبة الله والمكان، لأجد الشيخ قد اعتلى المنبر، يبدو في أوائل

الثلاثينات يميل إلى السمار وله لحية كثيفة تعطيه عشرة أعوام فوق عمره ، ولكن

وجهه ليس به كثير من التجاعيد مما يظهر أنه ليس كبيرًا كما يبدو عليه،

يقف على المنبر وينظر إلى الناس بوجه أصم، خالي من التعبير لكي يزيد الهيبة التي يرتديها، وتبدأ الخطبة البداية الطبيعية بالصلاة والسلام على سيد الخلق ثم يبدأ موضوع الخطبة..

" أحبائي إخوتي، خطبة اليوم عن حكم أئمة الإسلام على تارك الصلاة"

ويبدأ في الشرح والاستفاضة

لا أعلم من أين يأتي شيوخ الجوامع ولكن أغلب الظن من الأزهر، والمشكلة إنهم جميعًا " اسطامية " واحدة

فالشيوخ يبدأ بهدوء ويجب أن يؤكد على كلمة " أحبائي وإخوتي " وينظر إلى الجميع بوجه خالي من التعبير، حتى يأتي مثال، وهنا يختلف الأئمة فهناك أغلب الوقت فنتان من الأئمة

الأولى عندما يتحدث عن الجنة أو آية تصف المؤمنين ببسط وجهه ويصبح بشوشًا " يفرد وشه " وعندما يأتي ذكر الكفار أو النار أو أي عمل سيء، ينظر إليك نظرة نيرون و هو يشاهد حريق روما، ويبدأ يحرك عينيه على المصلين واحدًا تلو الآخر حتى تلتقي عيناه مع عين شاب غلبان كل جريمته أن شعره كنيش مثل كل أقرانه من أبناء جيله، و جاء ليصلي كباقي المسلمين، و لكن عندما تلتقي عيناه مع الشيخ وهو يعظم نهاية الكفار فيقول " كلهم في النار " و تنتظر ضحكة شريرة متقطعة، و تلك الفئة تبحث عن الأداء الذي قد يدخل الرهبة في قلوب بعض الناس، في عصر أصبح الجميع يستخدم عقله،

النوع الثاني وهو الأصعب، هو الذي جاء ليحكي حكاية، ويظل يتحدث بدون انقطاع ويدخل من موضوع لمثال، ومن مثال لقصة، ومن قصة لفتوى، وهكذا لتجد نفسك في نهاية الخطبة لم تتذكر أو تصل لقلب الموضوع ..

وشيخ الجامع من النوع الأول، الذي يحاول أن يتحول إلى شكل الثعبان الأقرع ليجعلك تخاف من مواجهته، المهم مدة الخطبة عشرون دقيقة، لخصت في بعض الانفعالات،

وخمس كُحات من فرط الصراخ، وإن من تفوته صلاة أفضل له إنه ما يصلح لأن
مفيش فايده، وفي النهاية مازال لدينا وقت للتوبة والعودة، ودعاء على أعداء الإسلام
وأقم الصلاة ...

بالطبع كان بعض ما ذكر في الخطبة مفيداً بغض النظر عن أسلوب الخطيب، لكن
المعضلة بالنسبة لي دائماً هي موضوع الصلاة، فالصلاة عادة لذلك أمر آباننا بتعليمنا
إياها منذ الصغر والمواظبة عليها، ربما ونحن أطفال لأننا لم نكن نعلم بقدر ما علينا
من مسئولية، فكنا نحتاج أن نتعلمها، ولكننا كبرنا، ونعلم كل شيء الثواب والعقاب،
والجنة والنار، هل فقدنا رهبة الآخرة من قلوبنا لكي نعلم المصير ونعيش متجاهلين
النهاية وما بعد النهاية، هل فقدنا عقولنا لنردد في كل مناسبة دينية و صلاة آيات عن
الأمر بالمعروف والنهي عن المنكر ونحن نجهل أن ما نقوله وقد لا نعيه هو الطريق
للهرب من نهاية مخيفة تنتظر الجميع، هل فقدنا إيماننا و حصرناه أن الله سبحانه
وتعالى لا يأتي إلا بالخير، وأن قضاء الله لا راداً له في السوء، إيماننا بالله في أحداثنا
اليومية، أما المجهول المخيف الذي نرى الناس تزوره كل يوم تحت التراب، نؤجل
مواجهته حتى نكون أمامه وجه لوجه، و ندعو الله لفرصة أخرى، وإذا كان المؤمن
هو من يرى الله في كل أفعاله، إذن هو شخص لا يفعل أى شيء خاطئ، هذا يعنى إننا
في عصر بلا مؤمنين، ماذا فعلت الخطبة في نفسي؟! أخرج من الجامع أنفخ زفيراً
قويًا، سأظل على ما أنا عليه حتى الجمعة القادمة، سأذهب إلى جامع آخر، و أحضر
الخطبة منذ بدايتها أيضاً، لن أجعل شيء يصد إرادتي ...

تمر الأيام ..

أحاول أن أقرب نفسي من كل شيء جيد، أحيط نفسي بكل ما هو إيجابي، أصلي،
أخرجت صدقة وهي عادة كنت قد نسيتها منذ فترة بعيدة، الجمعة القادمة في الطريق،
وأختي وزوجها قادمين، كنت قد سمعت أنه مسافر قريباً، هذا يعنى عودة أختي للبيت
في فترة سفره، أختي سامية حنونة جداً رغم إنني دائماً في اختلاف معها، لعل لحبي

للمنطق ورفضى للتفكير العاطفي الخالص الخاص بها، فالنساء مشاعر من لحم ودم،
يجدون في كل شيء مبرر درامي، لا يؤمنون بمبدأ الأبيض والأسود...

ثم تأتي الجمعة

اختار جامعًا جديدًا

وشيخًا جديدًا

لكن لا شيء جديد

الكثير من الكلام الجميل كالألوان، به اللون الهادئ واللون الفاقع، كل لون على حدى
جميل ولكن إذا ادخلتها جميعا في لوحة واحدة تنتهي بلوحة من " البظراميط"، لا
أخفى خيبة الأمل، وبطبيعة الحال لن أبحث على الإنترنت على الشيوخ المعلبة، هؤلاء
الذي يجرى أسفل ذقونهم إعلانات المقويات الجنسية ولا يبحثون إلا عن الجدل حتى
لا يقدموا بضاعة مستهلكة ..

أعود إلى المنزل، بعد ساعة أسمع جرس الباب، سامية وزوجها "المعلم"

وكعادة أى بيت مصري وأنا أهم أن أرحب بهما، تقطع أمي عليا الطريق ويدها
مبللتان علامة أنها في المطبخ تطبخ أهم وجبة طبختها منذ 1990" وتسلم على
وحيد بذراعها طبعًا لأن يدها مبللة، أعلم أن وحيد لا يأتي كثيرًا لكن ما تفعله أمي
لتثبت أنها تطبخ " من أول امبارح" هو شيء تمثيلي لا يحتمل ..

يجلس وحيد وهو يحمل " شيء وشويات " ليضعهم على المائدة " ولازم طبعا دة
كله فضلة خيرك يا حاجة" وهي ترد طبعًا بأن أفضل ما حدث لها في الدنيا بعد
زواجها من أبى هو زواجه من ابنتها، وفي النهاية تعود أمي للمطبخ
نجلس ثلاثتنا في الشرفة التي تطل على الشارع القديم ..

" إيه يا عم وحيد، خلاص مهاجر"

" مهاجر إيه يا عم، دي كلها عشرين يوم أو شهر بالكثير"

أرد ناظرًا لأختي

" آه، نقول ألف مبروك العروسة الجديدة يعني "

طبعا مصر كلها تتوقع ذلك التعليق، فالغتاتة ما يوحد ذلك الشعب العريق
يرد ضاحكًا قال يعني اتفاجيء

" بلاش الكلام دا الله لا يسينك، حتسخن الموضوع في دماغ المدام"
أنظر له واضحك

" يا سيدي دي حتفرح لك"
تنظر لي أختي بقرف

" ما تخف يا خفيف "
أضحك ضحكة بلهاء مستفزة

" طيب قومي ساعدى أمك يلا "
تغادر لتتركني معه

" يا ابني بلاش الكلام دة، النسوان مخهم صغير "

" يا سيدي، أختى عاقلة ما تخافش، بس إيه السفرية الطويلة دي"
رايحين الصين نلف لفة كبيرة، نجيب بضاعة جديدة لكل الفروع عشان خاطر

السنة الجاية، والحج نازل بتقله وخصوصا حاجات رمضان"
طيب ماتساناش معاك في شوية ياميش"

" هزر أنت مش فالح غير في الهزار"
أتحدث معه قليلاً حتى ينتهوا من تحضير الغداء، لنجلس ونأكل، لن أحكى طبعا عن "
خد الحطة دي بس يا وحيد، دي ضاني والمصحف" وأيضا " أكلك زي العسل والله يا
حاجة " والإسفاف والمهاترات وأشياء أخرى

ينتهي الغداء وتقوم سامية بتجهيز الشاي بينما نجلس في الصالة أمام التلفزيون
" إيه يا عم خالد، مافكرتش في اللي قولتلك عليه"
" اللي هو إيه "

" موضوع الجواز "

" جواز مين ؟ "

" جوازك أنت يا عم بلاش هزار "

" أنا أتجوز مين بالضبط ؟ "

" أنا عندي عروسة هايلة، بس أنت ماتكسفنيش قدام الناس "

" دة أنا أكسفك وأكسف اللي يتشدد لك "

" يا ابني ماتبقاش قفل دي جوازة مستريحة جدًا "

" لا يا عم، أنا لسه بكون نفسي "

" يا خالد بلاش هزار، مش حتتكلف حاجة والنعمة "

" والنبي يا وحيد فكك مني، أنا مأجل القصة دي كلها "

تدخل سامية وهي تحمل صينية الشاي وتقاطعنا

" إيه يا خالد قصة إيه، وحيد عايزك تسافر معاه ولا إيه "

وحيد يرد

" يا سيدتي ليه عندي جوازه سقع، وعايز أرسقوا فيها "

ترد وهي تضع الشاي أمامه

" سيبه ودماعه يا وحيد، هو أدري بمصلحته "

وحيد متناولاً الشاي

" أنا عايز مصلحته، والموضوع كله فوايد "

تنظر إلى نظرة ذات معنى

" اللي يأكل على ضرسه ينفع نفسه "

أنظر إليها ساكنًا مبتسمًا ابتسامة تعجب بمدى الحكمة التي وصلت لها

فترد إلى النظرة بابتسامة لم أفهمها، ثم تلتفت إلى أمي

" شفتي يا ماما قابلت مين من يومين في الشارع ؟ "

أمي وقد أتت بعد الانتهاء من أعمال المطبخ

" مين يا سامية ؟ "

تنظر إلى بطرف عينها

" نادية بنت الحاج توفيق "

أتجمد في الكرسي للحظة ناظرًا إلى سامية، محاولاً ألا أبدى أى انفعال، ومن واقع

إنني تجمدت مكاني فأنا ناجح حتى الآن

ترد أمي

" نادية "

وأردد أنا داخلي تلك الكلمة ألف مرة

نادية

نادية

الفصل الرابع

نادية

رسالة

.....

رسالة مني إليك

فأنت مني وأنا إليك

أبحث عن رسائل الحب في الأغاني

فلا تسعفني

أبحث عنها في الأفلام

فلا تنجديني

فأبحث عنك

فلا أجد سوى صورتك

ولا أزال لا أجد كلام للحديث عنك

كل ما أجده ... قلب وجسد وعينان

قلب

تزداد دقاته

كلما سرحتُ بك

وجسد

تأكله القشعريرة كلما سمع صوت خطواتك

وعينان

تتسعان إن أشرق نور وجهك

أنتظرك

حبيبتي أنتظرك

.....

لا زلتُ متجمداً مكاني
نادية
قصة حبي الوحيدة
الفاشلة بالطبع
أحببتها
وأى حب هو !
أعوام عديدة من طرفٍ واحد
وستة أشهر من طرفين
وتنتهي القصة
كانت جميلة، لا ، لم تكن
فأنا لا أجيد حتى وصفها
بيضاء كالرخام، شعرها أسود كالليل، عينها عسلية
كنتُ أنظر إليها حتى يخال لي أنني أرى نخاع عظامها
أحفظ شكل خطوط وجهها
وأحفظ عن ظهر قلب استدارة وجنتيها
وحدة ذقتها
وطول أصابعها
وتلك الشفتان، كنتُ أسميهما بوابة الجنة
صوتها ليس بعالٍ، لكنه واضح
كصوتِ كمانٍ في قاعة مسرح خالية

إلا من مستمعٍ واحد
كنتُ وكانت
وصرتُ وصارت
لم أكن أدري أن كلمة واحدة تأخذني من عالمي لتلقيني إلى هذا الانفجار الصامت
ماذا إذن إذا رأيتها
لا أعلم،
اسحب نفسي من ذلك العالم البعيد
لأعود إلى الأرض مرة أخرى
أمي تقاطعها
" ياااه، ودي إيه اللي رجعتها، هي مش أتجوزت "
أختي ترد
" آه وراحت سكنت مع جوزها في التجمع "
" مش جوزها دة كان جواهرجي "
" أيوة يا ماما، هو أبوه اللي كان جواهرجي، وكان صاحب الحاج توفيق "
وتنظر إلى بهدوء
" بس جوزها مات من فترة، وبترجع كل فترة تعد عند أمها شوية "
لا أعرف ماذا أقول
لست سعيد، ولكني أيضاً لست حزين
فكل الاختيارات تؤكد شيء واحد
أن لدي فرصة أن أراها مرة أخرى
لتعود إلى جسدي تلك الرعشة
ولقلبي تلك الانقباضة
يا الله

أقاطعهم

" إنا لله وإنا إليه راجعون، ومات إزاي "

" والله مقاتتش "

" وهي خلفت منه كام عيل "

" ماخلفتش منه أساسا "

وحيد يقاطع

" ودي صاحبتك يا سامية "

" آه طبعاً، وإحنا صغيرين، لحد ما إتجوزت، بس هي بت جدعة قوي "

أنظر إلى السقف قليلاً .. أفكر

هناك لفظ يعبر عن الحالة التي أنا بها الآن، " شقلبت حالي "

ماذا أفعل، لا أعرف

ساعتين من التلفاز والشرب والحلويات، ثم يغادران

أذهب إلى غرفتي،

السقف

المروحة

لا شيء آخر

ونادية

.....

صوت المنبه

الساعة السادسة والنصف

لا صوت يعلو على صوت القلب الجائع والعقل الهائم، لم أنم جيداً، ولكنى استيقظت بسهولة، لأنني لم أستطع النوم من فرط التفكير
لا أدري

وكان لم يحدث أي شيء من قبل،

لم أعد أصلي ... الصلاة تصلح لقلب مستقيم، أما أنا، فمرضت بناادية
أذهب للعمل هائماً على وجهي، أنزل بعيداً عن العمل وأمشي إليه، وبعيداً عن المنزل
أيضاً

أرى وجهها في كل وجه، أمنية تتقد داخلي أن ألقاها

تقتلني تلك الأمنية حتى إنني أتخيلها في انعكاس الماء في الكوب،

هل هو حب إلى هذا الحد لها، أم اشتياق لرفيق لتلك الوحدة التي تجتاح الروح

هل أحتاجها إلى هذا الحد، أم هو فراغ تستطيع أن تشغله أي امرأة

والأهم من ذلك

هل مازالت تتذكرني ؟

عندما كنت صغيراً أحببتها في صمت، كانت سعادتي أن أكون في نفس المائة متر

التي تحيط بها

أن أراها حتى لو من بعيد، وأظل مثبتاً عيني عليها

ثم حدث ذات يوم...

زفاف ابنة عمها

كنتُ مدعوًا إليه، وبالطبع كانت هي

الجميع يتحدث مع الجميع، لن يلتفت أحد إليّ، ولكنني لم أخف من أحد، إلا هي

وجاءت الفرصة للوقوف معها قبل الزفة بدقائق

كانت تعرفني بحكم اقتراب السكن، وكنت أعرفها بحكم اقتراب القلب

" إزيك يا خالد "

" أهلاً"

" أنت عارفني ولا ... "

أقاطعها

" طبعًا ... نادية "

" أنا قولت يمكن متعرفش الاسم مثلاً "

خفيفة كالحرير على الجسد، عذبة كماء النيل قبل أن يظهر المصريون على وجه الأرض

كانت تبتسم وهي تداعبني، هي تعلم إنني أعرفها عن ظهر قلب،

" لا إزاي، أكيد أعرفك "

" ما أنا عارفة أكيد، إزي سامية "

" كويسة الحمد لله "

لا أعرف لماذا أشعر بتلك " اللبخة"، أقرر أن أتحدث

" عقبالك يا نادية "

تضحك فترتعش أصابع قدمي التي تحاول أن تتشبث بالأرض حتى أحافظ على اتزانني أمامها

" لسة كتير، الجواز دي قصة كبيرة وأنا لسة، مش وقته "

" إن شاء الله خير "

" غريبة يا خالد "

أتعجب طبعًا، ما هي قالت غريبة

" أنا بشوفك كتير، ومع ذلك عمرك ما اتكلمت معايا "

" لا عادي، يمكن محصلش موضوع مشترك "

" مفيش حاجة مشتركة بيني وبين ولاد كثير في الحنة ومع ذلك بيجو يتكلموا عادي "
" لا عادي والله "

" مش فارقة معاك يعني "

تقولها وهي تبتسم، بينما أنا أشعر بالغرغرينا تضرب أطرافي
سنوات وأنا أنظر إليها وأحبها بالواي فاي، وعندما بدأت الكلام لأول مرة، أدمر كل
ما في خيالي قد بنيته

" لا والله، أنا بس يمكن أول مرة أتكلم معاك، فمش عارف "
واستطرّد قائلاً

" بس أنت متعرفيش أنا قد إيه سعيد بأني بتكلم معاك دلوقتي "
تنظر إلى بشيء من الخجل وتبتسم

" شكرًا يا خالد، أنت ذوق فعلاً ومؤدب زي ما كل الناس بتقول عليك "
يقاطعنا صوت زمارة الزفة فتحيني برأسها وهي تبتسم وتسير مبتعدة، وأظل أنظر
إليها حتى تختفي بين جمهور المعازيم

تلك ذكريات الحديث الأول في قصة حب

القصة التي انتهت نهاية عادية جدًا

بداية النهاية كانت كلاسيكية للغاية، تلك القصص التي تبدأ بالحديث الشهير

" خالد، أنا متقدملي عريس غني وأهلي وافقوا عليه "

فقط ...

باتتهاء الجملة أعتقد أن كل الأحداث التالية معروفة

كل ما حملته في قلبي رحل

كل الحب

كل ما جمعته من مشاعر في سنين، كل ما تمنيته في حياتي

لا تزال لتلك الغصة في حلقي بقايا حتى وقتنا هذا كلما تذكرت اسمها
ثم محوت كل شيء، وأكملت حياتي، وليس لدي نية أن أتوقف لديها مرة أخرى
تلك الألفة الدامية

ذلك النزيف الداخلي الملصم

كجندي في حرب خاسرة، استقبل طلقة في صدره ويسير واضعاً يديه كاتمًا الجرح،
تلك الطلقة التي هي سبب موته، هي ذاتها الآن كل اهتماماته، فهي التي تكتم النزيف
داخله، وإن خرجت من جسده سينزف حتى الموت، فيضع يديه عليها بكل من يملك
من قوة كأنه يحتضنها، كأنها قلبه، ويسير مترنحًا، حتى يسقط وهي بداخله، هذا هو
الحب، طلقة الحيرة التي تصيبنا فتجعلنا غير متزنين فلا نعلم أيهما أفضل الموت بها،
أم الموت بسبب خروجها، حينما يملك الحب قلبك، يملأ ظلام النهاية عينيك
لا

سأتوقف عن التفكير بها،

لن أذهب مرة أخرى لذلك الطريق

سأعود إلى طريقي

مرة أخرى إلى الله،

سأعود لكن ليس إلى التفكير بها

.....

صوت المنبه

الساعة السادسة والنصف، كالعادة استيقظ بالسيناريو الاعتيادي، ولكن تلك المرة أتوضأ وأصلي الصبح وأبدأ يومي الروتيني، ولكنني أقرر كسر الروتين، فأنزل لأكل أفطاري على عريبة فول في الشارع، أنزل لأكل وأنظر إلى الشارع وأتأمل، ماذا لو كنت غيرت شعرة من الماضي، هل كان للمستقبل أن يختلف، هل كان لكل قصصي أن تمتلك سيناريو أفضل، هل ما أنا فيه هو انتقام الحظ لضياع الفرص، وهل سأستمر في تلك الدائرة المغلقة لباقي العمر

أنتهي من إفطاري وأسير إلى العمل، أفكر في التغيير والأفضل، في الفرص والحظ والمستقبل، أفكر وأفكر

أنتهي من العمل متأخرًا؛ فمع كل هذا التفكير لن تنجز أي شيء أمامك
أعود إلى المنزل في الثامنة

أدخل لأجد أمي واضعة كل ألوان الطيف على وجهها وترتدي عباءة دموية اللون
مطرزة بألوان براقه يشع منها رائحة هنود أمريكا الحمر
" ودة فرح مين يا حاجة اللي لابسة له كل الترترة "
تنظر بفرحة

" فرح بنت الحاج مهدي القرشي "

" ومالك فرحانة قوى كدة، وهي حتجوزك والايه "

تنظر إلى وتتجه إلى مسك وجنتي

" أصل الفرحة دا فيه كام بنت كدة أنا منشنة لك عليهم، وأنت عارف نقاوة أمك "
أكيد حاجات زبالة

" ربنا يخليكي يا حاجة، أنت بس شكلك زهقتي مني وعايزة توزعيني "

ترد وهي مازالت محتفظة بوجنتي

" لا يا بابا، أنا عايزة أفرح "

وتستطرد

" وبعدين أنا مستنياك من الصبح عشان تيجي معايا بس عشان أحسسهم إن معايا

راجل ملو هدومه، خصوصاً إنك جاي متشيك ولايس البدلة وجاهز "

" ماما دة قميص وبنطلون، أنت عملتيهم بدلة، وفرح إيه اللي دلوقتي دة"

تنظر إليّ بشكل مختلف نهائي

" أنا حسبك على السلام "

أرد بسرعة

" يديكى الصحة يا حاجة"

وأتابع بينما تنزل هي على السلام

"أنا في ضهرك أهو"

أرتدي جاكيت البدلة والساعة، وأنزل في عجلة، لأجدها تنتظرني، نسير حتى نصل

إلى باب الشعرية ومنها نركب سيارة أجرة إلى مكان الفرع

نصل إلى مكان الفرع، إحدى القاعات بأحد فنادق القوات المسلحة، بالمناسبة الحج

مهدي هو ضابط متقاعد، ولكنه ابن لعائلة من التجار، وهو تاجر تلك الأيام ويعرفني

منذ كنت صغيراً، أدخل أنا وأمي التي تحكي عن كيف كان تاريخ أم عائلته وكيف

تعرف العريس على العروسة وطبيعة الاتفاق الذي كان ما بين العائلتين و " مين

شال السفارة، ومين أخذ الأجهزة الكهربائية" إلى آخره

نصل إلى القاعة المرادة و ندخلها لنجد الحاج مهدي ينتظر على الباب يرتدي بدلة "

لميع" و يستقبل المعازيم بابتسامة خفيفة محفوفة بالوقار ويتخلل نظراته كثير من

الحزم المستمد من خبرته العسكرية الطويلة، أعرفه منذ أن كان رجلاً طيباً، قبل أن

ترسم الاجتماعيات الزائفة نقوشها القبيحة على وجهه، لا أقول أنه تغير أو أصبح

شريراً، لكن الاجتماعيات تعطي مساحة من زيف تجرح صفاء الروح، فتجعل الكلام

غير مستساغ، و المشاعر غير صادقة، و تشكك في الأقوال، الشراء يصنع ما لم
تصنعه الجماجم التي زين بها ملوك الحرب عروشهم، المال هو المجد الحديث،
أدخل وأترك أمي تسبقني لتبارك له أولاً

" ألف مبروك يا حاج مهدي "

" الله يبارك فيكي يا حاجة "

" دة أنا فرحتي النهاردة ولا أكنه فرح سامية بنتي "

" دا العشم برضو، ماهي فاطمة تربيتك وزى بنتك برضو "

يلتفت إليّ

" إزيك يا خالد، عامل إيه "

" الحمد لله يا حج، وألف مبروك لفاطمة "

" الله يبارك فيك يا حبيبي، عقبال ما تفرحنا كدة "

" ربنا يسهل يا حاج، ألف شكر "

نتركه لنتوجه إلى القاعة بينما هو يستقبل مزيد من المعازيم، من المتوقع مقابلة
عماد أو أحد الأصدقاء، وهذا آخر ما أتمناه، ولذلك سابقى مع أمي، وذلك يجعلني
أعيش في عملية اختيار عروس المستقبل الحزين، وها هي أمي، منذ أن جلسنا
عندما نرى أي فتاة تمر، تبدأ في قص تاريخ حياة أمها، وماذا تأكل وكيف تذهب إلى
الحمام وكم مرة تدخله، لا أحب تلك الفقرة نهائياً

" خالد، أنا جايباك تختار، مش تعد جنبني نحب في بعض "

" والله يا ماما مفيش حاجة عجبنتي، مفيش واحدة على مقلم أو كاروهات "

" بلاش هزار، أنت كبرت و محتاج تتجوز، يا تختار يا إما اختارك أنا "

" وحتجوزيني غصب عني، وأقعد أعيط وأقولك أنت لو جوزتهاني حموت نفسي "

وكدة، إيه الكلام دة يا ماما !!! "

" أنت عجباك قعدتك كدة ؟ حتكمل حياتك لوحدك يعني ؟؟؟ "

" أكيد حتجوز في يوم من الأيام، بس باختياري وأكون مستعد "

" يبقى عمرك ما حتجوز، أنت عمرك ما حتكون مستعد "

وتستطرد

" أنا شكلي جايبك تنكد عليًا، بدل ما تفرحني"

أقاطعها

" ولا أنكد عليك ولا تنكدي عليًا "

"حروح أقف برة شوية لأن الدوشة هنا بجد خنقتني "

أتركها لأسير قليلاً وأقف متأملًا النادي

ليأتي صوت من ورائي

" خالد "

ألتفت

لأجد سامية أختي ووحيد زوجها

" شكلك عريس يا واد "

سامية ضاحكة، ليقاطعها وحيد

" إيه، ما شفنتش واحدة من اللي جوة دول وعجبتك ؟ "

أنظر إليه مبتسمًا

"يا عم بلاش شغل أمي دة "

"أمال أنت فاكر هي جايبك ليه، ما كان ممكن تيجي معانا"

" أهى يا سيدي قفشت عليًا جوة "

تنظر إليّ سامية بنظرة غاضبة

" تروح سايبها وطالع برة ؟ "

" وأنا سايبها في قلب طوكيو، ما هي عارفة الناس كلها جوة "

"ما فيش فائدة فيك "

يقاطعنا وحيد

" خلاص يا جماعة، ندخل إحنا نقعد معاها، ولو أنت عايز ترؤح يا خالد رؤح، وإحنا

نوصلها معنا"

سامية تقاطعنا

" إحنا داخلين شوية وأنا حطع أناديلك تيجي تقعد معاها عشان ما تزعلش، أنت فاهم

ما تمشيش"

"خشي يا سامية الله لا يسينك"

يضحك وحيد

" شوف اللي يريحك واعمله "

يتركاني لينضما إلى المولد، وسامية تنظر إليّ نظرة نارية، خمس دقائق وسوف

تكون أمامي لتقنعي بالدخول، أختي لا تطيق أن ترى أمي مستاعة من أى شيء،

وأمي امرأة، فطبيعي جداً أن تختنق وتتعب من أقل شيء،

أقف متطلعا إلى فرح آخر يدخل إلى القاعة، مغفل آخر في القفص، يمكنك أن تقيس

نجاح أى زواج بمقدار المشاكل التي مر بها دون أن ينهار، الزواج تنازل، لا شيء

آخر...

أقف سارحاً

وأنظر خلفي باتجاه القاعة

أنظر لأجد شبحاً أسوداً يأتي من داخل أنوار القاعة

لا أفهم النقاب أبداً، وماذا أتى بشخصٍ بكل هذا الإيمان الذي يجعله لا يكشف ظفر منه

إلى تلك الحفلة الماجنة

الشبح يتحرك تجاهي، ماذا أنا بفاعل

" إزيك يا خالد"

الصوت يأتي من وراء الفلتر القماشي

" الحمد لله "

" أنت مش عارفني "

" لا صارحة أنا بحاول أفكر مين كان عندنا منقب في الشارع ومش لاقى حد، تقريباً

الشارع كله زناديق "

يأتي صوت ضحكة من خلف الأسوار أعرفها

أركز في عينيها

وأحدق

" أنا نادية يا خالد مش فاكروني ؟ "

الفصل الخامس

اللقاء الثاني

رسالة

حبيبي..... روح الفؤاد

كم أعشق تلك الخطابات ما بيننا

فتلك الورقة التي ترسلها إليّ خلسة

تبقى معي كل اليوم دون أن أفتحها

حتى أصل إلى البيت ..

أظل طوال اليوم أحلم بما فيها وأتوقع معانيها

وأفتحها كمن يفتح صندوق الكنز

وأستمتع بالنظر إلى رسومات خط يدك

وأقبل الورقة التي كانت في راحة يدك

وأشمها ثم أضمها إلى صدري

كطفلي الرضيع

كم أعشق تلك الرومانسية الكلاسيكية

التي تجعل القلب يزيد دقاته لكي يعبر الزمن

ويحول الشابة الصغيرة التي أسكن داخلها

إلى امرأة كاملة النضوج

تحلم أن تكون سيدة منزلك الأنيق

أنتظر الخطاب التالي، وما بعد التالي

حبيبتيك

أحدق إلى تلك الخيمة السوداء التي تحتوي أجمل ما رأت عيناى
" مش ممكن، إزىك "

أتمتم كأول مرة رأيتها، أكره هذا الحب الذى يجعلنى كطفل صغير أبله، يتحدث إلى
مدرسة فصله ويشرح مبررات عدم إتمامه الواجب
" أنا الحمد لله، أنت عامل إيه "

أعشق طريققتها فى الكلام، فهى واثقة من نفسها وصوتها واضح، ولكن درجة
صوتها ليست باردة أو فاترة، لكنها نعمة مهمة وحنونة
" أنا الحمد لله "

واستطرد كالأهبل

" إيه اللي عمل فيكى كدة "

" قصدك إيه اللي خلاكى تعملي كدة "

" قصدي إيه اللي دخلك جوة عمومًا، ما أنا سايبك كويسة "

ترد بلهجة ضاحكة

" عادي يا سيدي "

ثم تتغير درجة الصوت 180 درجة

" أنت عارف ظروفى "

" آه، معلش أنا لسة عارف من كام يوم بس "

واستطرد بأدب

" البقاء لله "

" سبحان من له الدوام "

" وأنتِ فين دلوقتي ؟ "

تتنهد تنهيدة، تعيد إلى عقلي إشارات الماضي، ليعطي قلبي الأمر بالخضوع

" موجودة، شوية عند ماما وشوية في بيتي في التجمع "

" ومين بيقد معاكي هناك ؟ "

" ماما بتيجي، حد من أخواتي، كدة "

وتنظر إليّ

" وأنتِ عامل إيه ؟ "

" أنا زي مانا، مفيش حاجة اتغيرت كتير "

تنطق وأحس منها بابتسامة بها شيء من تهكم

" ما أنا كنت متأكدة "

تسرح للحظات

" كويس إني شفتك يا خالد، عشان احتمال أسافر "

تتسع حدقة عيني

" فين يا نادية ؟ "

" السعودية، أروح أقعد مع أخويا أحمد هناك "

يقف كل شيء ممكن أن تحتويه أحشائي في المريء

" ليه بس ؟ "

" عادي، ماما حتسافر وأنا معاها أكيد "

أشعر بطعم الهزيمة يزحف من شفتي

" طب نادية !!! "

" إيه يا خالد ؟ "

" أنا جوايا حاجات كتير وكلام أكثر عايز أقوله لك، وأنا مستني اللحظة دي من زمان

قوي"

تقاطعني رافعة كف يدها مشيرة إليّ بالتوقف

أرد في حرقه

" ليه طيب ؟ "

" مش وقته و مش مكانه "

ترد بحزم به نبرة حزن جافة

يسود الصمت ثواني ثم تكمل بنفس النبرة

" أنا لسة جوايا جرح متلمش، متجيش تفتح جروح قديمة "

تنظر إليّ وتستكمل

" أنا متلصمة بالعافية، وبدعي ربنا إنه يكملها على خير، أنا قريب مسافرة، ومش

عارفة حرجع تاني إمتي، فبلاش تفتح علينا باب، مش حتعرف تقفله "

أكتم داخلي كل شيء، عندما رأيتها انهارت كل أسوار الصمود ضد حبها، وعندما

تكلمت جعلتني عارياً أمام سهام كلماتها الحارقة، كم أنا هش من الداخل

" طب خلينا على اتصال، خلي بنا أي حلقة وصل "

" بلاش يا خالد، خلينا كدة أحسن "

وتهم بالرحيل

" أنا سعيدة إنني شوفتك بخير يا خالد، وربنا يكرمك ويرزقك ببنت الحلال الصالحة

إللي تسعدك في حياتك "

و تلف لتقول بصوت من يحاول أن يكون بارداً و لكن تخونه حنجرته

" السلام عليكم "

أقف محدقاً لدقيقة

تنزل من عيني دمعة صغيرة تغلي

كأنني حوض من زجاج ارتطمت به طلقة مدفع

أشلائي داخلي في كل مكان ..

بينما على السطح هاديء، السطح لا شيء،

جلست على الرصيف

لم أصرخ، لم أبك ، لم أنظر إليها بينما هي تذوب وسط الزحام
لقد انهار كل ما بداخلي في دقائق، حلم عمري وحبه الوحيد وقف أمامي مُخرجًا لي

لسانه الدامي ساخرًا ثم ... اختفى

استعجلت الحديث معها.. نعم ، ولكن !

كيف كنت سأضمن أن أراها مرة أخرى ؟ خاصةً وهي تقول أنها سوف تسافر
أشعر بهيكلي العظمي يتحول إلى كومة من التراب، و دمي يسيل فوقه فلا يبقى داخلي
سوى حفنة من طين وبقايا عظام وأشلاء ملقاة في كل مكان
ماذا أفعل ؟ وأين أذهب؟ كيف سأواجه الغد ؟
بأي قلب ؟

بلا أي قلب ...

" أنا كنت متخيل إنك عمرك ما كنت حتوصل للصلاة، شوف دلوقتي ماشا الله، بتحب

واحدة منتقبة .. لا واضح إنك كسبت الرهان بالتلاتة"

صوت ولاعة، أنظر لأجد عماد مرتديًا بدلة رمادية ويشعل سيجارته ويستكمل

" ودي قابلتها في محاضرة لعمر و خالد ولا معتز مسعود "

أنظر إليه لوهلة، ثم أعود إلى الشرود في اللا شيء

" لااااا ... دي الحالة صعبة خالص "

لا أعيره أي انتباه، فما بداخلي يكفيني ويزيد، حبست دموعي في عيني منعًا لشماتة

قد ألمحها تلمع في عينيه ..

" أنت عارف لو كنت سمعت كلامي زمان وجيت معايا في الشلة، كنت زمانك لابس

الجلابية البنكور اللي بيلبسوها اليومين دول ودقنك واصلة لركبك ومتجوز الأخت

حديقة الإيمان اللي مشيت دي ومعاك بنت تقولك يا أبي احك لي أضحوكة وابن يشرب

معاك تلبينة وحياتك عنب "

" عماد، مش وقت أي حاجة "

" معلى أنا قولت أفرفشك شوية "

يصمت لوهلة ثم يستنرد

" تعالى معايا يا خالد "

" لا "

" طب اسألني فين طيب حتى ! "

" لا "

" حجيب لك جيلاتي "

" لا "

" طب بيرة "

"بس يا عماد، احترم اللحظة "

" طيب قوم واحترمها في السكة "

يمسك بيدي ويرفعني لأقف، ويمشي وأتبعه في هدوء مستسلمًا، يمشي حتى سيارته

ويركب وأركب معه وينطلق ..

لا يقود بسرعة بل بهدوء يسير بسيارته اليابانية حديثة الطراز، حتى يصل إلى مكانٍ

ما على كورنيش النيل لم أنتبه أين هو بالضبط ..

" تحب نقعد هنا، ولا تروح قهوة ولا جعان نأكل، قول "

أرد في هدوء

" هنا كويس "

بداخلي من الاستسلام ما يكفي هتلر ليعتذر للعالم قبل بدء الحرب

ننزل ونجلس على سور الكورنيش الهاديء، شبه خاوي من الناس

تظل عيناى متصلة بالفراغ، ولا أحدث أو حتى تتحرك شفطاي، ينزل هو ويترجل إلى كشك فى الناحية الأخرى من الشارع، ليشتري علبتين سجائر وعلبتين من الكولا ويعود ليجلس جانبى، يفتح الكولا ويناونى إياها فى هدوء، أخذها منه بلا وعى، وأرتشف منها قليلاً، بينما هو يأخذ آخر سيجارة فى اللعبة القديمة، ويرمى اللعبة الفارغة فى النيل فتقع على الشط .

يشعل السيجارة بينما هو أيضاً مثلى يحملق فى الفراغ، أصعب لحظات حياتى أقضيها مع آخر شخص كنت أريد أن أعتبره حتى مجرد زميل دراسة، ولكن بأى حال هو يعتبرنى صديقه، أو يريد أن يجعلنى فاشلاً أو منحرفاً مثله، لا أعرف ما يدور فى عقله تحديداً، ولكن الأصعب إننى لا أعرف ما يدور داخل نفسه وقلبه، تلك اللحظة لا أريد أية حسابات، كل ما أريده الآن ما قدمه هو لى، قليلاً من الهدوء النفسى فحسب

...

"مين ؟ "

يسأل ويصمت ويظل الصمت خمس دقائق حتى أرد فى هدوء

" نادية "

تقع السيجارة من بين أصابعه فى هدوء، حتى عندما تفاجأ، كان الهدوء سمته،

يلتقط سيجارة أخرى ويشعلها غير مبالى بالتى وقعت من يده،

" مش المفاجأة هى مين، المفاجأة أنت، أنا سمعت إنها انتقبت من فترة "

وينظر إليّ مستطرداً

" خالد المتحفظ فى علاقاته بيجب واحدة كانت أكثر بنت اجتماعية فى المنطقة، قد ما

أنا متفاجئ من القصة، بقدر ما أنا متوقع النهاية "

أشق صمتى فى هدوء

" ليه يعنى ؟ "

" أصل واحدة زي نادية دي من النوع اللي محتاج إنك تكسر قواعد كتير عشان توصل لها، فصعب عليك يا بيومي أفندي تعمل كدة "

لا ألتفت له وأشرب من الكولا، بينما هو يستكمل...

" أنا مش حسالك في تفاصيل القصة، بس أنا عندي فكرة أنت ممكن تعمل إيه " " تعتقد إنني أعمل إيه؟ "

" مش حتعمل حاجة، مش حتعمل حاجة خالص يا خالد "

أنظر في استسلام معلنا من داخلي انتصاره عليّ في الحرب النفسية، أتذكر إنني تركتها لأنني لا يمكنني طلب يدها للفروق المالية، وصعوبة فكرة أن أجعلها تعيش كما هو الحال في منزل أبيها، ولكن ما الذي كان بيدي فعله؟ لا شيء.. لا شيء بيدي أبداً ..

" أنت محتاج تعيد حساباتك يا خالد، ومين عارف؟! يمكن تكون ليك من تاني "

أصمت قليلاً ثم أقول بتنهيذة

" أنت عايز إيه يا عماد؟ "

" أولاً : عايزك تشيل فكرة إني عايزك تنحرف عشان تبقى عامل زيي، وأبصلك وأضحك ضحكات شريرة متقطعة بصوت شيطاني، وأدمر سمعتك وأجرسك بصورك مع الجوزة في باب الشعرية، أنا فعلاً عايز أساعدك، وأوريك الصح منين " " وأنت يا عماد عارف الصح منين؟ "

" مالکش دعوة بيا، مش حرد عليك عشان فلسفتك العتيقة دي، يا تجرب وتشوف

اللي أنا عايز أوريهولك، يا هروحك على بيتك واعمل اللي أنت عايزه بعد كدة " يلتفت ناظرًا إليّ في نظرة ثقة

" براحتك، دة قرارك "

أنظر إليه قليلاً

" ممكن نروح بقى؟ "

ينزل مسرعًا غير مبالي بالرد

" يلا يا سيدي "

نركب ويقود إلى رمسيس

" أنا مش بايت هنا، حبات في البيت التاني، أبقى كلمني "

أتركه وأنزل لأتمشى إلى البيت، أصدد إلى المنزل، لم تصل أمي حتى الآن

أجلس في السرير محدقًا بالسقف .. السقف .. السقف

ما هذا اليوم الغريب ؟

كما كان أول لقاء، قد يكون آخر لقاء، دائمًا هناك فرح مُقام في خلفية المشهدين ،

هناك اثنان يجتمعان برباط مقدس ونحن نلتقي ..

البداية والنهاية ...

كم كنت أتمنى أن تختلف الظروف، أن أكون غنيًا، أو أن تكون هي فقيرة، أن تدور

عجلات الزمن كما نريد، أن نعيش معًا في أي مكان في الوجود، كم كنت أتمنى أن

تحدث المعجزة ..

ما الذي كان بيدي أن أفعله ؟ أن أدخل حربًا من أجلها أعلم بخسارتها مسبقًا ؟ أن

أدخل رهانًا وأقحم فيه أهلي أمام كل أهالي الحي، ليراني الجميع وأنا ألقى بأوراقي

المكشوفة الخاسرة، ليضحك الجميع ثم أرحل ململماً جراح هزيمتي وعار لحق

بعائلتي وأسير به أمام الناس عاريًا، ماذا كان يفترض بي أن أفعل ؟

وأي فرصة أمامي الآن؟

أن أجري وراءها وألاحقها وأنا حتى لا أعرف بداية الطريق إليها ؟ أن استغل كونها

أرملة لعلها تقبل بي الآن؟

ماذا أفعل؟

سأفعل ما يجب أن أفعله الآن

سأنام...

السقف

دقات الساعة

سأنام

صوت المنبه ...

ذلك الصوت الذي لا ينتهي

الساعة السادسة والنصف

تلك الساعة التي لا تقف

تدور كل يوم ولا تأتي بجديد

تدق الساعة كل يوم

تاركة خلفها دقات قلب لا تعد

وأنفاًس لم تنته بعد

معلنةً انقضاء يوم من عمرك وبداية يوم جديد

يوم آخر يمضي لتقترب من الموت .. ذلك القادم حتماً

ليس له من رادع

كل يوم يمر وأنا أقرب من النهاية

وكل يوم جديد قد يكون الأخير

أصحو كالعادة، وأجلس على حافة السرير

لا قوة لي اليوم لممارسة العمل أو اللهاث في وسائل المواصلات

لا عقل لكي يشتبك مع معضلة الأرقام اليومية التي لا تنتهي

لا قلب ليضخ الدم لكي ينبض هذا الجسد بالحياة

أمسك الموبايل بطريقة آلية

" ألو، أنا تعبان ومش قادر آجي الشغل النهاردة، سلام "

أستقر مرةً أخرى على السرير
أريد أن أنسي الأمس الذي لا أفكر إلا به
ليتني ما ذهبت إلى هذا الفرحة الكريه
أعلم أن الجرح قد يلازمني يوماً ثم يمر
أعلم أيضاً أن الألم قد يكون شديداً
وأعلم كذلك إنني مررت بأكثر من ذلك بكثير
وكل شيء يذهب
وكل الجراح تلتئم
والحياة تسير ولا شيء يوقفها،
ماذا سيكون أصعب في الحياة ؟
من ان تكون على قيد الحياة يوم زفافها على آخر
لم تكلمني قبل زفافها، لم تقل شيئاً ...
جاء اليوم .. وكم كان ثقيلاً منذ صباحه وحتى موعد الزفاف
والموكب يسير في شوارعنا الضيقة وأمامه السيارات والموتسيكلات
بينما أغلق أنا جميع نوافذ البيت، وأغلق الشيش والزجاج
أغلق باب غرفتي، أغلق النافذة وأضع عليها الأغطية والملاءات
أضع الوسادة فوق أذني وعلى رأسي كي لا أسمع .. ما الذي جعلني أعود للمنزل
ذاك اليوم ؟
لم أبك يوماً
إلا عندما ضرب السكون أرجاء الغرفة، عندما علمت أنها قد ذهبت بلا رجعة
وقتها بكيت، ولم أبكي بعدها على شيء في حياتي
انتهى كل ما يملكه العمر من حسرة، وجفَّ كل ما تملكه العينان من دموع
أن تكون بلا اختيار، وعندما تختار، يضيع الاختيار

أي شيء أصعب من هذا اليوم في الحياة ؟
لعل الأصعب منه أن تأتي الفرصة مرة ثانية، وتضيع ؟
لا أعلم ..

تدور كل الأفكار في ذهني إلى أن يقاطعني صوت أمي
" خالد، يلا يا بابا عشان الشغل "

" مش رايح النهاردة يا ماما، تعبان شوية ومش قادر "

" مع إنني رجعت لقيتك نايم، دا أنت راجع من بدري "

" آه يعني، مش فاكرا أنا جيت إمتي "

" أنت جيت لوحدك ولا حد وصلك ؟ "

" لا يا ماما جيت مع واحد صاحبي "

" طيب يا حبيبي، أعمل لك فطار ؟ عشان نازلة بعد كدة "

" لا ربنا يخليكي يا حاجة، أنا شوية ونازل "

إلى أين سوف أذهب ؟ لا أعرف، ولكني سأذهب ..

أنام، ثم أستيقظ في الساعة الحادية عشرة على صوت الهاتف
" آلو "

" صباح الخير "

" صباح النور، إزيك يا عماد "

" أنا كويس، بس قولت أطمئن عليك "

" أنا كويس يا عماد، شكرًا على السؤال "

" ما تقولش كدة، شكلك ما روحتش الشغل "

" آه، صحيت تعبان صراحة و ما فياش حيل أخش الحمام حتى "

" طيب كويس، استريح، ولو عايز حاجة قول لي "

" ممكن أشوفك لو أنت فاضي ؟ "

" أنا فاضي وجاي ناحية المنطقة، أقولك حاجة، نص ساعة وأستناك على أول الفجالة، تمام؟"

" خلاص وأنا هألبس وأنزل"
"سلام"

ماذا أفعل، لا أعرف، لكن يفضل أن أفعل أي شيء، بدلاً من أن يقتلني اللوم والحسرة وأهم من ذلك إنني قد أمتلك الفرصة لمعرفة ماذا يريد عماد مني، لعل " الحدأة تلقي بكتاكيث"

أقف وأخرج ملابسي، وأرتديها في عجاله، وأنزل لأتمشى إلى أول الشارع ثم في إتجاه رمسيس، ثم يميناَ ناحية الفجالة لألمح سيارته، أسير تجاه السيارة، لأجده يدخن سيجارته ، أركب ثم يقود بهدونه المعهود

" عامل إيه من إمبراح؟"
" كويس الحمد لله"

" ها .. تحب تروح تفطر ولا نقعد على قهوة؟"
ثم يلتفت إلي

" ولا أوديك مكان على مزاجي؟"

" ابعدي عن مزاجك والنبي دلوقتي "

" أنت ليه دايمًا اختياري لازم يكون بالنسبة لك فيه إزازة بييرة وحشيش وحريم كثير توبليس"

" أنا ما جاش في دماغي غير الحشيش، بقيت الحفلة دي كنت حفكر فيها لو كنت قلت لي العرض دة بليل "

" ليه ؟ عشان البييرة ولا الحريم الكثيرالتوبليس"

" هما لو حيقضوا الليلة كلها توبليس، يبقا يلبسوا بقيت هدومهم بكرامتهم أحسن"

يضحك ضحكة من قهقهة واحدة، وينظر لي

" تعالى نروح ستاربكس، عارفه؟"

" طبعًا بتاع الشباب الفرافير اللي بيشرّبوا القهوة في كوبيات بلاستيك"

" حاجبك مج فخار يا خالد "

" لو كدة ماشي "

" الاستظراف الكثير وحش"

نصل إلى المكان المنشود، ندخل لنختار ماذا نشرب، يدفع هو بالطبع، ثم نجلس في

الأوبن إير"

" عامل إيه ناو؟"

" ناو .. الحمد لله"

" فكرت في حاجة غير الندم؟"

" لا "

" طيب ، ما فكرتش تتغير؟"

" لا الصراحة، وحيعمل لي إيه التغيير؟"

" حايعمل كتير"

يستطرد ناظرًا إليّ ..

" يمكن يجيب لك اللي أنت نفسك فيه !"

" ما تلعبش على النقطة دي كتير يا عماد"

أخذ نفس عميق

" لو كان ليا ما كانش ضاع من الأول"

" لو كنت أنت أتغيرت كان زمانك ما ضيعتوش"

" دة إزاي إن شاء الله"

" مشكلتك يا خالد إنك عايش على حقايق أنت اللي بتفرضها وبتفترض صحتها
وبتعيش على إنها مسلمات لا تتغير، ودي غلطتك دايمًا "

" اسمه الواقع يا عماد "

" أنت اللي سميته كدة وثبته على كدة ، رغم إن مُتغير "

" أثبت يا عماد "

ينظر إليّ واضعًا قدمًا على الأخرى

" أنت قصتك مع نادية أكيد كانت العريس الأغنى فأنت انسحبت، خوفًا من الرفض
وضحك الناس عليك إنك بتتقدم لبنت السلطان، صح كدة ؟ "

" تقريبًا كدة، دة حد حكى لك ؟ "

" لا خالص، أنا استنتجت دة وأنت قاعد جنبي امبارح هايمان، بس أنا كلامي صح ؟ "

" نسبيًا آه "

" وأنت عملت إيه لما هي قالت لك على العريس ؟ "

" أنت لسه قايل انسحبت، أنا عملت حاجة زي كدة "

" دة عشان أنت خالد فكرت كدة، تخيل أنك خالد النسخة الثانية، كنت حتعمل إيه ؟ "

" كنت حضرب شريط ترمادول وآخدها ورايا على فسبة، ونهرب إحنا الاتنين على
البحيرة "

" أنت النسخة دي رسمت الواقع كعادتك وحبست نفسك فيه فكانت هيا دي الإجابة،
أنك مش قادر تعدي الحدود اللي أنت رسمتها "

يستطرد موجهًا إصبعه تجاهي

" النسخة الثانية منك، كنت حتتقدم وتحارب عشان تاخذ اللي أنت عايزه، وحتترفض،
لكن هي لما تلاقي في حد باع (كرامته بالنسبة لك) عشانها واتفرض وبيتقدم تاني،
هي كمان من ناحيتها حترفض أي حد غيرك، وكان ممكن الأهل يوافقوا فُدام إصرار
اتنين عايزين بعض ؛ فتاخذ اللي أنت عايزه "

وهل من الممكن أن أعود إلى نادبة فب فوم من الأفاام
أعتقد أن كل ما أفكر به هب
وهذا ما لاحتظه هو
لقد لعب أمامب بعبل مشنقة
وقررت ان تصبب تلك المشنقة ملكب
كله من أجلها
ببا ترى!!
ماذا تخببء لنا أباها القدر
ماذا سأفعل
اللبلة هب الببابة

الفصل السادس

الخيٲ الرفيع

رسالة

حبيبي

أكره عندما أقولها لكِ

فتلك الكلمة تساويكِ بباقي النساء

وأين أنتِ وأين باقي البشر ؟

أنتِ أقرب للملائكة

يقولون لكِ إنني مختلفٌ وغريب

نعم ... كنت كذلك

حتى أعاد دفء روحك تشكيلي

ومن دقات قلبك كانت الاستقامة

حبك كان إعادة تشكيل لذاتي

لا تستمعي إليهم

وضميني إلى صدرك

كطفلك

فأنا لم أعلم من قبل إنني على قيد الحياة

إلا بتاريخ تسارع نبض يديك لأول مرة

وهي في حضن يدي

فضميني

صوت المنبه

الساعة السادسة والنصف مساءً

ارتدي ملابس الخروج،

" يا حاجة، كباية شاي معاكي "

أنتظر قليلاً، لا أسمع رداً، وبعد أن ارتدي الحذاء، أخرج للصلاة وأجلس، لأجد أمي

قادمةً نحوي تحمل كوب الشاي

" تسلّم الأيادي "

تظل صامتة، وتومئ برأسها وتجلس أمام التلفاز

" إيه يا حاجة أنت زعلانة ولا إيه ؟ "

ترد بهدوء

" ولا زعلانة ولا حاجة "

" عشان موضوع العروسة التعبانة اللي أنت كنت جايهاها ؟ "

ترد بشيء من غضب

" أنا غلطانة إني بدور على مصلحتك، وبعدين أنت حتى ما شوفتهاش "

" يا حاجة أنا الموضوع دة مش في دماغى "

تقاطعني بحدة

" ليه مش في دماغك ؟ أنت مش راجل ؟ واللا في حاجة أنا ما أعرفهاش "

" ما فيش حاجة، مش وقته، وما فيش فلوس تكفي الكلام دة "

" خالد ما تتلككش، موضوع الفلوس دة مش قصة، وأنت لو ناوي مالكش دعوة "

" ماما، خلاص أنا نازل عشان ما أتأخرش، وما نتخانقش "

" غوور، داهية علي اللي يبص لمصلحتك "

أتوجه الى الباب، أفتحه، لأجدها بطرف عيني تنظر إليّ في حسرة، أغلق الباب في

هدوء وأنزل ..

أذهب إلى نفس المكان، لأجده ينتظرنى، أشير له كنوع من التحية ثم أركب السيارة،
وفي هدوء ينطلق، حتى أقاطعه

" بقولك يا عم الشيخ "

" قول "

" أنا لو ما عجبنيش الموضوع وحسيت أنك بتشتغلني "

" هاااه ؟ "

" حمشي وأرجع تاني لحياتي الطبيعية "

" خالد "

" نعم "

" أنت مش بلغت ؟ "

" بلغت فين ؟ "

" يعني لو اتجوزت، مش حتجيب عيال ؟ "

" أكيد، أو مال حبيب سوداني، وبعدين هي دي معلوماتك عن البلوغ يا عماد ؟ "

" أصل أي عيل في الدنيا يقدر يرجع في كلامه وياخذ قرار بالخروج من التجربة،

تخيل شحط زيك كدة يا خالد، المفروض إنه بالغ "

" أنا مش فاهم إيه علاقة البلوغ برضو بالكلام دة ؟ "

" لما تبلغ حتعرف يا خالد "

" طب يا عم البالغ إحنا رايعين فين ؟ "

" مكان حلو وهادي "

" ليه حتوريني بلوغك ولا إيه ؟ "

" لو ما سكتش في فرصة كبيرة أوريهولك في العربية "

" خلاص يا عم، يعني مش حنروح عندك البيت ؟ "

يرمقني مبتسمًا ابتسامًا خبيثة تدل على سذاجتي، فأنظر إليه واستكمل

" بعيداً عن موضوع البلوغ دة "

وأنفجر ضاحكاً بينما هو يضحك ضحكة خفيفة

يقود ناحية الكورنيش، لينتهي به الحال بجانب أحد الكافيهات على النيل، يقف وينزل كل منا، ندخل المكان الأنيق، ويتقدمنا أحد الجرسونات حتى نختار طاولة تطل على النيل، نجلس لأنظر وأشرد قليلاً، ثم أتحدث

" جميل المكان دة وشاعري "

ثم أنظر له وأستطرد..

" بس مقلقتي، حتطلب لنا ليمون وتقول لي إنك بتحبني من زمان وإننا ندي العلاقة وقتها

يقاطعني بحدة

" كفاية يا خالد "

ثم يستطرد

" يا نطع "

لم يشتمني أحد بذلك اللفظ من قبل، وبغض النظر إنه ليس لفظ بذيء، ولكن لا أعرف لماذا شعرت بالضيق، بغض النظر عن مزاحي الكثير وتهكمي الدائم، وإنه أول مرة يشتمني، ولكني شعرت بالضيق ..

طلبت قهوة، وهو كذلك وجلسنا لدقيقة ثم أخرج علبة السجائر من جيبه وأمسك بلقافة منها ووضعها أمامي، أنظر له ثم اتكلم بتعجب ..

" خير ؟ "

" ولعها "

" هي دي السيجارة اللي فيها حل لكل مشاكلي ؟ "

" ممكن نقول بداية لحل كل مشاكلك "

" ليه ؟ هي محشية إيه ؟ "

" مش محشية أي حاجة، سيجارة عادية جدًا "

" وإيه اللي يحصل لما أشربها يعني؟ "

يرد بشيء من السعادة

" براقو "

أرد باستغراب

" على إيه؟ "

" أنك لقيت الإجابة في سؤالك، قوله كدة تاني بس في صيغة جواب "

" وإيه اللي يحصل لما أشربها يعني "

" هاه، إيه اللي يحصل ؟ "

" ما فيش، بس ليه أضر نفسي؟ "

" ومين قال لك إنها ضرر؟ "

" مين ما قالش قصدك ؟ حاجة مضرة وما فيهاش فوايد "

" طب ممكن تكلمني عن فوايد الشاي والقهوة "

" هم ليهم فوايد وليهم أضرار "

يرد مقاطعًا حبل أفكاره

" أنهى أكثر، الضرر ولا الفوايد، مش أهم فائدة فيهم المزاج؟ "

" الشاي فيه مضادت أكسدة "

" وحياة أمك !!! "

أضحك مدافعًا عن موقفه

" أنت بتقارن إيه بإيه؟ "

" مش أي دكتور في التليفزيون بيقول لك كباية قهوة في اليوم ما فيهاش ضرر، بس

كثر القهوة بيرفع الضغط ويعمل كذا حاجة تانية أنا مش فاكرهم كدة "

" وقرحة في المعدة وبيتعب الأعصاب "

" طيب، لو شربت سيجارة في اليوم مثلا، يحصل لك حاجة؟ مش يحصل حاجة خالص، أنت بتشم عادم عربيات أكثر من علبة بلمونت في اليوم "

أتمم مستغربا

" بلمونت !"

بينما هو يستكمل كلامه

" بس ما فيش دكتور حيقول لك سيجارة في اليوم مش حتعمل لك حاجة عشان

حيسبوا له الدين وقتها "

ويستطرد رافعًا إصبغه

" أي أكل بتاكله أو حاجة بتشربها فيها شيء من الضرر، المشكلة مش في الحاجات دي، المشكلة في الاستخدام، كتر أي حاجة بيسبب مشاكل، لكن الاستخدام المتزن لكل

حاجة هو اللي بيخليها مفيدة ومش مضرة حتى لو غلط "

ينهي كلامه رافعًا حاجبه

" الجشع هو رذيلة البشر المطلقة، وهو اللي حينهي البشرية "

يسكت وينظر إليّ منتظرًا الإجابة، فأقول بهدوء ..

" إله الحكمة أنت جاييني آخر الدنيا، وقاعدين عالنيل، عشان تشربني سجاير؟"

استطرد بسخرية

" إيه اللي في أم السيجارة السحرية دي "

ينظر إليّ لوهلة، ثم يتحدث

" الغرض في الأساس مش السيجارة خالص، الغرض في موقفك منها "

يمسك السيجارة السحرية ويتطلع إليّ

" لو ما بتشربش السجاير عشان أنت راجل الإيمان في قلبك قوي وأي حرام بتبعد

عنه في الدنيا وبتتغاضي عنه، أنا أقدر أفهم دة، لو أنت راجل رياضي جدًا ومضببط

أكلك وحياتك ومواعيد نومك وتصرفاتك اليومية وعاداتك الغذائية، ممكن أفهم دي

برضو، لكن ما حدش فينا كدة خالص، إحنا بنرفض عشان حد قالنا دة غلط ودة حرام
ودة عيب، من غير مانعرف ليه، إحنا بنرفض للرفض، مش للاقتناع، يعني فكرة
زمان إن اللي ببشرب سجاير دة صايح، محطوطة في أذهاننا، ففي واحد مش عايز
يخلي الناس تقول عليه صايح، نفس فكرة إن اللي ببشرب سجاير دة راجل، فببشرب
عشان برضو صورته قدام الناس، يعني مش باقتناع مدى صحة أو ضرر أي حاجة،
عشان الصورة بس"

ياخذ نفس عميق وينظر إليّ بتركيز ضامما كفيه مثل الفنان هاني شاكر

" خالد، أنا عندي نظرية عايز أقولها لك"

أرد بتركيز

" اتفضل"

" فكرة خليك في النص دي فكرة غلط، الناس اللي في النص دي قمة الفشل، أنت ولا
عارف حلاوة الإيمان ولا لذة الخطيئة، أنت حاطط نفسك في حته لا أنت بتكسب الدنيا،
وبتراهن على الآخرة، ورهان في مكسب وفي خسارة، يعني لو الحسبة من 100،
فأنت بتراهن على 25% بس"

يقف لثانية ويستكمل

" نظريتي أنك عشان تتصلح لازم تكون بايظ أساسا، ما فيش يمين من غير شمال،
لكن طول ما أنت في النص، أنت مش عارف حاجة"

أنظر له بشيء من الشك فيستطرد

" اغلط واعمل ذنوب، واكسر الرهبة الغير مبنية على أي أساس ديني اللي جواك
ناحية الغلط دي، وفي ذنب من الذنوب دي حيرجعك للإيمان تاني"

أقاطع

" ما أنا بغلط وبعمل حاجات غلط كتير"

" إيه يعني الغلط؟ آخره إيه؟ بتشوف فيلم سكس؟ دا غلط مغفور بالنسبة لك لأنه صغير، أنت محتاج تعمل حاجة ما عملتهاش قبل كدة تخليك تفهم يعني إيه ذنب "

وينظر إليّ رافعا السيجارة ناحية وجهي
" والسيجارة دي أول الطريق "

أرد بهدوء حذر
" هو في حاجات تانية أكثر من السيجارة؟ "

يرد رافعًا سبابته تجاهي
" أنت اللي حتحدد أنت محتاج تروح لحد فين عشان تفهم قيمة الخير ومعني الإيمان، ذنب من الذنوب حيهزك ويفوقك "

أرد بشيء من الاعتراض وبإشارة استفهام بيدي
" أيوة يا عماد، بس أغلب البشر بيعملوا كل الذنوب اللي في الدنيا وبيفضلوا يعملوها كل يوم من غير ما يحسوا بأي حاجة، ومحدث بيرجع "

ينظر إليّ نظرة ثاقبة
" أنا قولت لك من شوية "

يسكت لثانية منتظرًا مني أن أفهم وأرد، ولكني أظل ناظرًا إليه منتظرًا الإجابة
" الجشع يا خالد، أنك تحول خطيئة لعادة يومية إلزامية في حياتك، وتنسي أصلها، الجشع هو اللي بيربط سلاسل الشهوة في نفوس الناس ويسلسلها في الأرض، فتكون جبهتك دائمًا على الأرض، ساجد لرغباتك وذنوبك وما فيش حاجة تملّي عينك إلا التراب "

يسكت، وأظل سارحًا في كلامه لفترة فيحاول طمأنتي
" لو حسيت كلامي مش صح، أو في النص خفت، ببساطة ممكن ترجع لحياتك العادية، وتنسي كل اللي عملناه، اعتبره لحظة طيش، أو مبرر لنفسك "

يسكت لحظة ويستكمل وهو يخرج سيجارة لنفسه

" وأعتقد أنك كويس في موضوع المبررات لنفسك دي "

لم أفهم تلك الجملة، أو بالأصح لم أفهم الغرض من تلك الجملة وما يقصد بداخله، يشعل السيجارة لنفسه، ثم ينظر إلي ويمد بالقداحة إلي وهو تعلق وجه شيء من الابتسامة

" تسمح لي أولع لك ؟ "

أنظر إليه للحظة، ثم إلي السيجارة، أمسكها وأداعبها بيدي، بالطبع لم أكن خائفاً من تدخينها، لا شيء يرهيني حتى منها أو حتى إدمانها، كل خوفي ينصب ناحية ما وراءها ماذا يحدث بعد تلك السيجارة ؟ رغم كل ما قاله والذي يبدو إلي منطقياً بعض الشيء " إذا ما كانت الفوضى الخلاقة شيء منطقي " إلا أنني لازلت أجهل ما بداخله، لماذا في الأساس اختارني، هل يراني مثيراً للشفقة إلي هذا الحد ؟

أنظر إليه، وأضع السيجارة ما بين شفتي، فيشعل هو النار و يدنو بها ناحية لفافة التبغ السحرية، أتخيل بينما هو يشعل القداحة و يقترب بها مني، أنني أحمل داخلي قنبلة، يخرج فتيلها من فمي، وأعرض عليه بكل سذاجة أن يشعل الفتيل، لا أعرف ما الذي أفعله، ولكنني مللت بما فيه الكفاية، وبينني وبين نفسي أميل لأن أخوض تلك القصة التي يريد هو أن يكتبها لي، أن تجعل شخص خر يكتب في كشكولك لأنك سئمت من كتابة نفس الصفحة كل يوم، لعله يكتب شيئاً جديداً، أو يمزق أوراقه ويسطر لك بداية جديدة قد تكون سعيدة أو حزينة، لا يهم .. ولكنها تنقذك في النهاية من ملل نفسك و تعاستك المستديمة.

يشعل السيجارة، وكما هو متوقع أشعر بالاختناق فأكح قليلاً ثم أتمالك نفسي وأعود لأسحب منها بضعة أنفاس، لم أفهم شيء ولم أحس بمتعة، ولكنني أجدتها ليست بسيئة، شيء جديد ظريف، ينظر إلي منتظراً أي رد فعل

" إزي الحال ؟ "

أخذ نفساً من تلك السيجارة وأنظر إليه ..

" عادي "

" شفت يا سيدي، ولا سرطان جالك ولا البوليس بيجري وراك "

" ولا استفدت حاجة برضو "

" يعني أنت مش مستغرب؟ "

" آه مستغرب أكيد "

" مش فيها شيء من لذة صغيرة؟ "

" ممكن "

ينظر إلي مبتسمًا شارعًا في تدخين سيجارته

" بداية كويسة يا أستاذ خالد "

ينظر إليّ مبتسمًا

" بداية استجابتك للعلاج بتوحي بحاجات كتير "

" حاجات كويسة؟ "

" نتائج أولية بس، لسه قدامنا حبه عشان نعرف تأثير النيكوتين في الدماغ "

أبتسم لثانية وأنظر له بينما أرتشف من القهوة الباردة رشفة

" والمفروض إني أشتري علبة سجاير وكدة؟ "

" لا خالص، زي ما قولتلك، اعمل الغلط، بس من غير جشع "

ويستطرد بشيء من التأكيد

" خد شهوتك من غير طمع "

" والمره الجاية بانجو؟ "

" لا بلاش هبل "

ثم يستكمل

" برشام على طول، إحنا لسه حنتدرج "

يضحك كل منا على المزحة المتوقعة المتكررة

ماذا أفعل ؟

انتهي من السجارة ونظل صامتين قليلاً، أطلب منه سيجارة أخرى فيعطيني، أدخنها في هدوء بينما أستمتع بالهدوء والنيل، اطلب كوباً آخرًا من القهوة، وهو أيضاً يجلس قليلاً حتى أقطع ذلك الهدوء

" والخطوة الجاية إيه، حنعمل إيه يعني ؟"

" مش لما تكمل الخطوة الأولانية الأول"

انظر له باستغراب فيرد

" أنت لسة بتقول يا هادي، خد وقتك وآدينا مع بعض، وكل حاجة حتيجي لوحدها،

متحطش حاجة بدماغك، وسيبها وشوف "

ينظر إلى النيل متأملاً ثم يقول :

" أنا عايزك وأنت بتتغير تبص لحياتك والماضي، وتفهم إيه اللي كان حيحصل لو

كنت اتغيرت، وقتها حتفهم وتقدر قيمة اللي بقولهولك"

أنظر له، ونصمت قليلاً متأملين النيل والنقاش الدائر، ثم أنظر له وأقطع الصمت

" طيب مدام النهاردة سيجارة بس، يبقي يلا بينا "

يبتسم وينظر إليّ

" ماشي، يلا "

طبعًا يقوم هو بدفع الحساب كأني ثري عربي قام باصطياد شاب حليوة من هيلتون

رمسيس، نتمشي حتى نركب العربية، صامتين، حتى أمسك هو علبة السجائر وأخذ

سيجارة، ونظر إليّ، فهزرت رأسي رافضًا السجارة، ولا أعلم لماذا قمت بالرفض

تلك المرة؟ حتى وصلنا إلى نفس المكان بعيداً حوالي عشرة دقائق عن بيتي، نزلت

ونظرت له رافعاً يدي للتحية، فقطع هو الصمت قائلاً

" حشوفك قريب، حبقى أكلمك "

" إن شاء الله "

" سلام "

" سلام "

لا أعلم ماذا حدث لي؟ كنت متحمساً للبداية وعندما بدأت لم أجد شيئاً جديداً، أو لم تكن في السيجارة ما أتوقعه، ولم أجد ضالتي في السيجارة، أو الارتياح، أحسست بأنني فعلت ذنب بدون مقابل، بدون جدوى، وأنا أقوم بتدخين تلك السيجارة كنت أبحث عن شيء ما لم أجده، هل هكذا كل شهوة في الحياة؟ حين تدركها وتنتهي منها تشعر بالندم؟ إنها في النهاية مجرد سيجارة، ولكن من يدري ماذا وراءها؟

أخذت في المشي حتى وصلت إلى البيت، وعقلي كالمطاحونة يفكر في السيء والجيد،
" دي مجرد سيجارة، في إيه يا عم "

أردد لنفسى، ولكنني لا أقتنع، عقلي مُشتت بين الشعور بالذنب، وأني فعلت لعماد ما يريد، ورغبة الخروج عن المألوف، و صورتي التي قد تهتز جراء ما أفعله، في النهاية أنت ابن سمعتك، من يقول دع الناس محدش حيفيدك بحاجة لا يفهم شيء عن هذا العصر، فحكم الناس لك أو عليك هو شيء قاتل، فإذا كنت " غلبان زي حالتي " عندما تظهر في المنطقة لا أحد يقاطع تأملك " دة هادي و كلامه قليل "، وإذا طلبت شيء يُطاع من باب الغلب " اعملوا اللي هو عاوزه أستاذ خالد دة ابن حلال و راجل مؤدب "، و أيضاً لا أحد يقصدك في خناقة أو نقاش أو تصالح " دة غلبان مياكلش مع الناس دي "

ببساطة علاقتك بالناس قد تكون سبب يسهل عليك أمور الحياة اليومية أو يصعبها، سيقولون إنني أخاف من المواجهة، سيقولون إنني ضعيف.. ربما ... طالما لن يقولوه في وجهي أنا راضي

دع من يجد الحياة أرض معركة لحربه، ودعوني أرعى الغنم في هدوء.

وبينما كنت أسير وجدت كشك بجانبي، توقفت أمامه للحظة أنظر فإذا بي أجد مجموعة من المراهقين أكبرهم لا يزيد عن خمسة عشر عامًا يتبادلون المزاح بصوت عالٍ والسباب والحركات البذيئة ويدخنون، بينما كانت فكرة شراء علبة سجائر تتمشي بجاني أسوار عقلي، أجدها تجري بعيدًا عنه، إلى أين يريد أن يأخذني معه، أشعر بشيء من الغضب أسرع الخُطى إلى البيت، أصعد إليه وأقرر إنني عندما أستيقظ سأخذ القرار.. ليس الآن.

الساعة السادسة والنصف

يوم الخميس

والسؤال الأول يدور حول رأسي

هل أذهب إلى العمل أم لا ؟ جميعنا نحلم هذا الحلم، أن يكون لنا الخيار في أن نذهب العمل وقتما نشاء، وأن نأخذ إجازة عندما نريد، لكننا لا نملك رفاهية الاختيار، البعض يقرر أن يفتح لنفسه مشروعه الخاص، ليملك تلك الرفاهية، ليجد نفسه يجري خلف ذلك المشروع الذي يحاول أن يجعله يقف على قدمه، وعندما يقف المملوك، يقع المالك، أنهض من سريري وأتمشي إلى الشباك، أقف لأتأمل بداية اليوم الجديد وكيف يستقبله الآخرون، لأجد الناس جميعًا يسرون على نفس الوتيرة، نفس الرأس المنحنية، يجرون أقدامهم كالموتى، يسرون نحو المجهول، حتى يذوبوا في الزحام، كم هو إيجابي أن تعيش في مصر، الشيء الوحيد الذي كنت ترى فيه الأمل هو الأطفال الذين أصبحوا الآن يسرون في عشوائية كقفزات الجراد، يتحاكون عن الجنس و ينعنون بعضهم البعض بكل ما هو بذيئ، يتحدثون عن فنانات العري

ولاعبي الكرة المخمورين، يرون النجاح في قدرتهم على لمس مؤخرة فتاة بريئة، كل
ذنبها أنها تمشي في الشارع، كم هو جميل ما آلت إليه مصر !
في النهاية قررت أن أذهب للعمل
لأساند جموع ((الزومبيز)) مسيرتهم نحو الضباب، أسير وبداخلي أحمل ذنب الأمس
وأمل الغد

" دي مجرد سيجارة، في إيه يا عم"

لا ليست كذلك، إنها بداية الانهيار، بداية الطريق إلى المجهول أكثر مما أعيش فيه،
هل لأنني لا أجد الطريق إلى الله، عليّ أن أعكس اتجاهي ؟ هل من المنطق أن يكون
طريق المواظبة في شعائر الدين أن أبتعد أكثر، كيف اقتنعت بهذا المنطق ؟ لقد اختار
لحظة ضعف وحيرة حتى يضعني في اختيار بين الروتين والمجهول، كيف لي أن أقبل
حل لمشكلة باصطناع أخرى، أين كان عقلي ؟

أرتدي ملابس كالعادة، أنزل بخطوات ثقيلة، لأجد نفسي عندما خطت قدمي الشارع
أتحول إلى ذلك ((الزومبي)) الذي يسير إلى المجهول، مثقلاً بخواطري، منهكاً من
أحداث حياتي اليومية، أذهب إلى العمل، الجميع يسأل عن صحتي " على أساس إنني
كنت مريضاً بالأمس " أجد نفسي أرد ببرود ليس معتاداً مني، وأجلس لكي أري أوراق
عملي..

في منتصف النهار أقرر أنني سأنتهي تلك القصة

أمسك هاتفي، أنظر إليه قليلاً في حيرة.. ماذا أفعل؟ ثم أقرر
أفتح الرسائل وأقرر أن أرسل له رسالة نصية، ماذا أكتب بها ؟
أفكر قليلاً، ليصبح القليل كثير، ثم أجد نفسي أمسك الهاتف وأكتب
" أنا انسحبت، مش عايز أكمل"

إرسال

تم إرسال الرسالة

ورسالة توضح استلام الطرف الآخر
أضع الهاتف جانبي، وأستكمل عملي، مختلساً النظر للهاتف كل دقيقة،
لم يرد، لا شيء
أغرق داخل الأوراق والفواتير، لأجد نفسي أنسى كل شيء وأنهمك في العمل،
أو ذلك ما أريد إقناع نفسي به
صوت رسالة

أنظر إلى الهاتف قليلاً، وتتجه يدي إليه، شعرت أن يدي تسير ببطء حتى أمسكته
" قرارك "

فقط

تلك كانت الرسالة وذلك كان الرد،
إجابة لا توحى بشيء سوى بالمزيد من الغموض، أفقد إيمانه بي ؟ أم شعر بالضجر
والممل من أسلوب بي ؟ أم هناك شيء في عقله ؟
كالعادة، لا أعرف ..

استكمل باقي اليوم محاولاً تجاهل كل شيء، وغلق تلك الصفحة " اللي فتحتها على
نفسي " لكنني أجد أنه ليس بالشيء السهل، فأستكمل مسلسل التجاهل والانهماك حتى
ينتهي العمل،

أتوجه كالعادة إلى البيت، وأحاول أن أقنع نفسي بأنني أغلقت تلك الصفحة من حياتي
ولكن من الواضح أنني لا اقتنع، هناك شيء ما ينقصني، شيء لم يكتمل في تلك
الحلقة المفرغة التي تدور في رأسي ويتوسطها صورة عماد.

وبينما أسير يرن الهاتف، أخرجه بسرعة، أمي

" أيوة يا حاجة "

" آلو "

أيوة يا حاجة "

" آلو "

" أيوة "

" خالد ؟؟؟ "

" هو أنتِ يا ماما مش فتحتِ الأسماء وجبتِ نمرّة ((خالد ابني)) ودوستي اتصال ؟

حيرد عليكِ سامي الشيشيني يعني ؟"

" علم أمك الأدب، ما أنا ما عرفتش أربيك "

متجاهلاً ما قالته

" أيوة يا حاجة عايزة إيه ؟ "

" ويعني لما أعوز حاجة حد بيعبرني ؟"

يا صبر

" أولاً أنتِ ما بتطلبيش غير مني وما فيش حد عايش معاكِ في الشقة غيري "

" ذل أمك باللي بتطلبه منك عشان تأكلك وتشربك، فعلا رباية ناقصة "

" حاجة أنتِ اللي مرباني، ما تلوميش غير نفسك "

" كمان بتقل أدبك، أنا ربيت أحسن تربية، شوف أختك فين وأنتِ فين وتعرف تربيتي

كويسة إزاي، بس يخلق من ضهر العالم فاسد، وصوابك مش زي بعضها "

يخلق من ضهر العالم فاسد ؟ أنا ما أعرفش إزاي بني آدم طلع من ضهر بني آدم

تاني لأن ما فيش غير حتة واحدة يطلع منها وأنا مش عايز حتى أتخيل المنظر دة

" أيوة يا ماما، يعني أنتِ عايزاني أروح أشتري تربية لنفسي ولا إيه ؟ "

" استظرف استظرف، ما دة اللي أنتِ فالح فيه "

" أيوة يا ماما يا حبيبتي، تؤمري بإيه ؟"

" عاملة الغدا النهاردة ساندوتشات، عايزة إزازه كاتشب كبيرة وعلبة طحينية

صغيرة "

أتركها وأدخل الغرفة لأغير ملابسني، تلك هي أمي ومزاجها مقلوب، هي طيبة ولكنها كأي امرأة تعشق الدراما والأمثال الشعبية الغير مفهومة المصدر

أجلس قليلاً أمام التلفاز التافه، الذي لا يقدم إلا كل ما هو تافه وخليع وجاهل، تأتي أمي حاملة طبق بيضاوي به هرم من الساندويتشات، تضعه وتعود لتأتي بطبق من الشيبسي و تحمل زجاجة الكولا، بينما تمتد يدي في هدوء للساندوتش تلو الآخر، أكل وأشاهد التلفاز في هدوء وسكينة، بينما أمي تذهب لتأتي بالنظارة لكي تشاهد معي هذا الصندوق اللعين، تتشابه أمي معي كثيرًا، برغم اختلافي الدائم معها، و هذا أمر منطقي، باختصار نتشابه في كل شيء عدا شيء واحد، إنها امرأة، لديها الكثير لتخافه ولكي تقوم بدراسته وعمل خطط لمواجهة، المرأة حيوان يتغذى على الأمان والطمأنينة، و لكن لسوء حظها تختلف مع سامية، سامية متفتحة قليلاً وجريئة، وهذا لم يكن يناسب طباع أمي أبدًا، كنا دائمًا نقف أنا و أمي أمام اختياراتها المختلفة عن مبادئنا، حتى بعد الزواج استمع كثيرًا إلى جدل قائم على الموبايل أو في البيت، طالما وحيد ليس حاضرًا

المهم ..

أنتهي من الغداء وأذهب إلى غرفتي، أقوم بتشغيل الكمبيوتر، ثم أنادي على أمي لعمل الشاي، أجلس أمامه قليلاً، أشغل أغنية للفنان ليستر يانج، لا أعرف أي شيء عنه سوى أن أحد أصدقائي في العمل كان يعطيني بعض الموسيقى وتقريبًا نقلها معها عن طريق الخطأ، شيء مثل موسيقى الجاز، التي في الغالب تبدأ ببعض موسيقى الجيتار الجميلة الهادئة، وبعض تقاسيم البيانو المدهشة، قبل أن يدخل شخص قبيح كان على الأرجح سباح أو عداء، يلعب على إحدى أدوات النفخ و يظل ينفخ وينفخ حتى تشعر بالهواء يخرج من السماعه، لا تعلم من أين يأتي بهذا النفس الطويل، ولكنني أتبنى فكرة جاءت لي وأنا أشاهد أحدهم في فيلم أجنبي، فعادة عازف تلك " الزمارة " يميل

بجسمه للأمام كأنه يهم أن يلتقط شيئاً من الأرض، مما يوضح أن مجري كل هذا الهواء الذي يخرجُه بدايته تأتي من مؤخرته، هذا يفسر كل شيء، عندما أحضر فرحاً وأجد النسخة المصرية التي تحمل المزمارة، و هو ينفخ و يرقص كأنه سيخرج ثعبان من تحت الأرض، تأتي لي الفكرة أن أساعده وأضع له زمماره في مصدر دخول الهواء، ذلك سيعطي له دافع أكبر لموسيقى أعلى، و سيعطي لي الراحة النفسية على أنه سيشعر لأول مرة بمعاناة من يسمعونه.

تدخل أمي بكوب الشاي وتضعه على المنضدة ثم تخرج من الغرفة، أستلقي على السرير حاملاً كوب الشاي مستمتعاً بالموسيقى الهادئة " حتى الآن " أغمض عيني ولا أفكر في شيء، حتى يرن الهاتف

عماد

ليس لدي سوى أن أرد عليه، المواجهة هي الحل

" ألو "

" خالد، إزيك "

" الحمد لله، عامل إيه يا عم عماد "

" إيه قاعد في البيت النهاردة "

" آه تقريباً، وأنت ؟ "

" لا أنا خارج شوية "

" مميم، هيص يا عم "

أعتقد أنني يجب أن أتكلم بلهجة عادية حتى لا يشعر بالتوهان الذي يعبت بداخلي

" ماشي يا عم، وأنت كمان هيص "

" حهيص في البيت "

" المهم تكون مبسوط "

يسكت لثانية ثم يستطرد

" حتنام إمتى النهاردة ؟ "

" مش عارف، ليه ؟ "

" كنت عايزك تيجي معايا نصلي الفجر "

لم أفهم شيء

" يا سلام !!! "

" وماله، وإحنا مش مسلمين ولا إيه يا عم خالد ؟! "

" لا مش قصدي، بس مش عادتك "

" وأنت إيه عرفك ؟ مش يمكن نتهدي سوا ؟ "

" الله عليك يا شيخنا، والصلاة دي حتبقى في جامع الليل بشارع الهرم ؟ "

" لا حوديك جامع هايل "

" شكرًا يا عم، أنا حصله في بيتنا "

" يا راجل ! "

" يا عم حنام خلاص "

" طيب خلاص أوكي "

يسكت لو هلة

" حكلمك قبل الفجر بنصاية، وأعدي عليك في أول الشارع "

" يا ابني أنت عايز إيه من أمي "

" أنا عايز أكسب فيك، ثواب "

يأخذ نفسًا بصوت عالٍ

" حكلمك أصحيك يا خالد بيه "

" لو صحيت "

" ماشي، سلام "

" سلام "

الفصل السابع
المجد للخطينة

رسالة

حبيبي

هل لقصتنا نهاية ؟
نهاية سعيدة في بيت واحد !!
متزوجين كنا أم هارين من الواقع الأليم
أم أنّ قصتنا كقصص المراهقين
التي يطويها الزمن
ونرويها لاستدعاء السخرية؟
لست عرافة لكي أري المستقبل واتكهن بما هو آت
فكن بلورتي السحرية
وطمنن قلبي
وقلها لي
المجد للحب

الساعة الثانية والنصف صباحًا

رنين الهاتف

إنه عماد

لن أرد، برهة ويسكت الهاتف

ثم يعاود الرنين، مرة أخرى

وثالثة

ورابعة

" ألو "

" ناموسيتك كحلي "

" مش فاهم "

" صحيت يعني يا خالد "

" لا خالص أنا بنام أهو "

" ربع ساعة ونفس المكان "

" يابا أنا نايم "

" مستنيك..... سلام "

شيء في لهجته، هو بقدر ما يطلب هو في الحقيقة يأمر، يرى نفسه يعلم أين

المصلحة

سأذهب لكي أعلم فقط فيما يفكر

أدخل الحمام لكي أتوضأ، ثم ألبس ملابس العادية وأنزل إلى الشارع،

أعشق رائحة ما قبيل الفجر، هدوء وشوارع فارغة، تكون النفس فيه هادئة، ومقبلة

على كل ما هو طيب..

أمشي إلى نفس المكان، أول شارع الفجالة، بجانب أعظم صرح في القاهرة، ميدان

رمسيس، حتى في منتصف الليل هناك من يمشي، من يبحث عن مواصلة لتقله إلى

بيته، من يشتري الطعام من محل يعمل 24 ساعة بدون توقف، لا شيء ينام في
رمسيس حتى الباعة الجائلين، هؤلاء الذين يبيعون الخردة والحلوى منتهية
الصلاحية والطعام الفاسد، كل هذه اللوحة تعبر عن السباق اللانهائي للبحث عن
الرزق، ما الذي جعل الإنسان يصل إلى هذا الكم من اللاوعي، أن يبيع أي شيء حتى
ما يعلم أنه فاسد إلى شخص يشتري أي شيء ليضعه في جوفه بلا مبالاة، إنه الفقر..

أمشي حتى أجده في نفس المكان منتظرًا، هذه المرة مرتديًا " ترننج "، أركب معه
السيارة كالعادة، ألتفت وأنظر له بنوع من الضيق
" إزيك يا عم الشيخ، واخذنا فين المرة دي ؟"
" حنصلي الفجر "

" لا.. ماشا الله، ربنا يهديك، ودي حنصليها فين دي ؟"
يبدأ في السير بالسيارة مسرعًا ناحية عمرة
" في جامع حيعجبك "

" بيدي حسنات زيادة يعني ولا إيه ؟"
يرد باقتضاب

" ظريف أوي "

" ما كنا روحنا أي جامع قريب "

" أنا حوديك جامع كويس، اصبر وحوريك "

" ودة فين إن شاء الله "

" مصر الجديدة "

" يا عم نعمل عمرة أقرب "

يصمت، وعلى عكس عادته، يسير بسرعة كبيرة لأسمع صوت السيارة تطلق صفارة تجاوز السرعة، كنت أهم أن أعلق ولكن خفت في قرارة نفسي أن أدفعه للانتحار وأنا معه، فقررت الصمت

نصل إلى وجهتنا

جامع كبير في شيراتون، يقوم بركن السيارة لنخرج و نتمشى إلى الجامع..
مسجد " الصديق " اسمه تقريباً، أدخل لأجد المسجد جميلاً، له بهو ليس له سقف على الطراز المكي، رائحة الفجر التي كانت تنتشر في هواء الشوارع تصحبنا داخل المسجد، بعد أن دخلنا توجهت إلي أول المسجد لأصلي، لأجد شيخ عجوز يتقدم ناحيتي مبتسماً، يمسك بزجاجة عطر صغيرة، يستأذني بأدب ليضع لي قليلاً على يدي، فأمدتها ليضع قليلاً على كل يد، أفرك يدي وأمسح على ملابسي بها، كل شيء يعطيك قدر من الطاقة الروحانية، أشعر بنوع من السعادة، أصلي ركعتين السنة وأنا منشرح القلب، أجلس قليلاً لأستغفر، لأجد عماد يقوم بالمثل، أنظر له نظرة ثناء على اختياره لهذا المسجد، يقيم الشيخ نفسه الذي أعطاني العطر الصلاة، نصلي، صوت الأمام هادئ و جميل، يتماشي مع تلك اللوحة الروحية التي ترسمها صلاة الفجر بأجوائها الساحرة ..

ننتهي من الصلاة نجلس لدقيقتين ثم يشير إلي إذا كنت أريد أن أذهب، فأوافق بإيماء رأسي، ونتجه سوياً ناحية الباب، نركب السيارة دون أية كلمة، يسير قليلاً ليتوقف بجانب كشك قريب

" تشرب حاجة ساقعة؟ "

" ما فيش مشاكل، وماله "

" طب يلا ننزل "

" يلا "

ننزل سويًا، لنختار من أمام ثلاثيات العرض، أصر أنا تلك المرة على دفع الحساب،
لكسر نظرية الثري العربي وشاب شارع شهاب قليلاً، يستند على السيارة بينما أنا
واقف،

" ها حاسس بياة؟ "

" لا بجد الجامع هائل أنا أول مرة أشوفه "

" كويس إنه عجبك، أنت بقى إيه إحساسك؟ "

" جميل أوي، حاسس بسعادة "

" أيوة .. إيه أنت حاسس كدة؟ "

" أنت حبتدي فلسفة صح؟ "

" لا أنا بس عايز أسألك، أنت سعيد علشان صليت الفجر؟ "

" أه طبعًا ودي عايزة كلام؟ "

" أكيد، أنت كنت سعيد بالجامع، الجو، الهدوء، لكن آخر حاجة الصلاة "

" الله عليك يا عماد وأنت بتدمر أي حاجة حلوة أو ليها معنى بفلسفتك التي لا تنتهي "

" أضحك عليك يعني ولا أنت عايز إيه؟ "

" لا ما تضحكش بس الهرس دة ما ينفعش تدخله في الدين "

" لو انبسطت علشان الصلاة، يبقى ليه ما بتصليش عمومًا مادام هي حلوة كدة، اللي

بيصلي مش محتاج جامع حلو وجو جميل علشان يصلي، اللي بيصلي دة يا حد متعود

وهي عادة عنده، يا واحد مؤمن ودول قليلين، والباشا مش حاجة في الاتنين زي ما

أنا شايف "

ينظر إليّ ويستطرد وهو يخرج علبة السجائر من جيبه

" الإيمان دة شيء نسبي "

" ودة إزاي يا حاج آينشتاين "

" يعني بيختلف من إنسان للتاني، وما لوش علاقة بكم العبادات اللي بتتعمل قد ما له علاقة بتصرفات الإنسان وطريقة مواجهته لحياته، الإيمان شيء نظري وغير مادي، تعبد الله كأنك تراه، كأنك، مفيش دواء ممكن يزود الإيمان مثلاً، ليه علاقة بمعتقدات الإنسان الداخلية، حاجة كدة عايزة شرح "

يضع السيجارة في فمه وينظر إليّ

" من الآخر، حاجات كتير "

ويستطرد ناظرًا إليّ

" ما فيش منهم ولا حاجة فيك "

أنظر إليه بشيء من الدهشة

" يا سلام، قصدك أنا مش مؤمن "

" أنا لسة قايل لك الموضوع دة من دقيقة لو تلاحظ "

" ملحد يعني؟ "

" لا ما قولتيش كدة برضو "

يشعل السيجارة ويأخذ نفسًا ثم يشير بها

" أنت زي ناس كتير قوي، اتعلمت حاجات كتير قوي عن الدين، وقالوا لك إن دة

الصح ولازم تعمله، فا بتعمله، إحساسك بالرضا مش نابع من إحساسك بإنك بترضي

ربنا، بس بإحساس إنك عندك واجب وعملته وبس، ناس كتير منتظمة في الصلاة،

مش لأهمية الصلاة، بس لأن الصلاة مهمة لعدة أسباب ربنا ما لوش علاقة بيها، في

ناس بتصلي لأن الصلاة من سمات الشخص الجيد فهو عايز الناس دايمًا شايفاه

كويس، في ناس بتصلي لأن اللي حواليهم كلهم بيصلوا، في ناس بتصلي للعادة،

وهكذا، الصلاة مقياس إيمان للي بيصلي وهو عارف قيمة اللي بيعمله إن دة واجب

له أسباب "

" أنت بتضرب بلد كاملة مفك في سمعتها بالكلام دة "

يبتسم قانلاً :

" عارف أنت ليه الناس بتؤمن بالدجل والخرافات وحظك اليوم والهبلة ده "

" عشان إيمانهم ضعيف "

" لا مش بالضبط ، القضية مش كدة خالص ، دول عندهم إيمان قوي "

" أكيد ده كلام صح ، ده لو إيمان خالتك مثلاً "

يضحك وينظر إلي

" لا يا عم أنت مش شايف "

" شايف إيه يا أبو إيمان "

" الناس دي مؤمنة جداً ، بس بالقدر ، الناس ما بتخافش من ربنا ، مش قادرة تتخيله
عشان تؤمن بيه ، زي اليهود في قصة سيدنا موسى ، بتؤمن وتخاف من الأحداث ، من
القدر ، وتعتقد إنها تقدر تلعب فيه وتغيره لصالحها ، حقولك حاجة ، مش في إفريقيا
وآسيا بلاد بتعبد الرنجة وبلح الشام وأي حاجة يشوفوا فيها عبرة "

" ما أعرفش ناس بتعبد الحاجات دي بس آه في حاجات كدة "

" أه دي النسخة الغير متحضرة من الناس اللي بحكي لك عليها ، الناس عايزة
حاجة مادية وتدي لهم مقابل على الإيمان بها والإخلاص لها ، يعني أنت لو بصيت في
حظك اليوم لمدة شهر ، ولقيت كل ما يكتبوا حاجة بتحصل لك ، حتؤمن بيه وحتحكم
في مودك وفي حكمك ورؤيتك للأحداث ، أنت بقيت مؤمن بيه رغم إنه شرك واضح "

" شوف لي مثال غير حظك اليوم عشان تقنعني أنا بكره البتاع ده "

" يمكن عشان ما لقتش فيه مرة حظك صح "

" بلاش فلسفة أهلك دي "

" طيب يا عم ما تتضايقش "

يأخذ نفساً من السجارة وينظر إليها بشكل سينمائي

" بص أنت محتاج إنك تؤمن عشان توصل للي أنت عايزه "

" ودة اللي أنت حتخليني أعمله، بإنك تخليني أشرب سجاير "

" خالد ممكن تحاول تفهم من غير أسئلتك الاستفزازية وأجوبتك الرخمة دي "

" طب قول لي أقولك إيه ؟ "

" ما تقولش، اسمع الكلام من سكات، نفذ وأنا حخليك تشوف نفسك في النهاية
حتبقي إزاي "

" بص يا عماد، أنا عارف إن كلامك فيه منطق، وأنا ما أنكرش إنني ساعات بميل
لمنطقك، بس في الأول والآخر أنت وأنا عارفين إن الأصل هو الحلال، الأصل هو
الدين "

" وأنت يا خالد اتعلمت حاجة من الدين وأنت صغير ؟ "

" اتعلمنا أكيد "

" اللي هو إيه، احكي لي عن إيه اللي اتعلمته وأنت صغير وأثر فيك وفي قراراتك
الحياتية "

" حاجات كتير "

" ما تقول أم حاجة فيهم "

" قصص الأنبياء مثلاً "

ينظر إليّ وتضيق عينيه قليلاً بامعان

" خالد "

" إيه ؟ "

" هي أمك اسمها إيه "

" ليه ؟ عايز تتقدم ؟ "

" عشان أعرف اسمها إيه اللي أنا ناوي أتهمها بأنها كانت ماشية في السكة البطالة
وكانت بتحب الراجل بتاع كشف النور "

أرد ضاحكًا ومستغربًا

" ليه يا عم أنا قولت إيه بس ؟"

" بص يا خالد، عشان ما أشتمكش، واحد، أنت بتقول أي كلام، يمكن دي الحاجة اللي

أنت فاكرها من حصص الدين، بس مش هي اللي أثرت فيك خالص"

يرفع صباعه في الهواء بشكل فيه تهديد ثم يصوبه تجاهي

" اتنين، قصص الأنبياء فيها عبرة لشحط زيك ؟ لشاب في العشرينات، يقدر يفهمها

و يستوعبها، لكن عيل صغير بيشوف لورد أوف ذا رينجز و هاري بوتر والمفروض

إنه ما يصدقهمش، نحكيه معاها قصص الأنبياء اللي كلها معجزات عشان يقارنها

بيهم، و بيتدي يقارن ما بينهم، وبعدين عايز تفهم عيل صغير إن في نبي قال لابنه

تعالى ادبحك و ابنه قاله ماشي يا بابا يالا بينا، حيفهمها إزاي طيب؟ حيعقل القصة

منين؟ وإيه الدرس المستفاد، إنك تسمع كلام بابا، طب بذمة أهلك الفالصو، أنت لما

اتحكت لك القصص دي هل أثرت فيك وقعدت شبابك فاكرها ؟؟"

" الأمانة مش فاكِر إيه الإحساس، بس فاكرها و عارفها"

" يا فرحتي، و عملت بيها إيه"

" أكيد عملت بيها حاجة، بس مش فاكرها"

" طب بس و حياة الطاهرة اللي كانت سيرتها حتتجاب باللعن "

حقيقة .. كان عماد قد أصابته بعض العصبية، ربما أنا حقاً مستفز، أعرف

" ممكن تهديا يا عم عماد، وكله حيمشي من غير سيرة الحاجة ما تيجي، وبعدين أنا

بستفهم منك يا أستاذي النجيب"

يبتسم ابتسامه خفيفة ويرد بعصبية

" المهم تفهم وتعرف "

" أنا بقتنع، بس مش داخل جوايا موضوع إني أعمل غلط عشان أتحول للصح مش

نافع خالص"

" بص يا خالد تسمع عن حاجة في الكهرباء اسمها Impulse response "

" دة اللي جوة ستارتر اللمبة النيون "

ينفخ نفخة قصيرة، يبدو إنه بدأ في الضيق من تعليقاتي

" لا يا بابا، دي حاجة بياخذوها طلبه هندسة نظرية "

" وأنت عرفتها منين؟ "

" مش مهم وأنت مال أمك، اسمع وبلاش تعليقات يا خالد، أنت بقيت مستفز "

واضح إنه كان يكتم في نفسه الكثير من الضيق،

" ما تقفشش يا عماد، مش أعرف المصدر، عشان لو حد سألني أبقي متأكد وأنا

بحكيه "

ينظر لي بعين قد بدأ اللون الأحمر يظهر بها

" خلاص يا عمدة أنا حسكت خالص، قول النظرية "

يسكت للحظة وينظر إليّ

" هي مش نظرية، دي حاجة كدة جت قدامي، بس أنا فهمت منها اللي حقولهاوك "

كان في قمة التركيز، مما جعله في خلال هذا الحوار يشرب السجارة وراء الأخرى،

لم تكن بالطبع تساعد على التركيز بقدر ما كانت تحافظ على الحالة النفسية العامة

له، ارتباط الإقناع بشرب السجائر لديه يقنعه داخلياً أن التدخين سيبقيه على نفس

النمط ..

" لما ييجو يختبروا سيستم كهرباء أو دايرة كهرباء، بيعملوا الاختبار دة، بيدوا

للنظام **Pulse** يعني نبضة بالعربي، وقيسوا برسم بياني زي بتاع دقات القلب مدي

استجابة الجسم دة للنبضة، لو السيستم أو التصميم دة مستقر، مابيديش رد فعل، لو

غير مستقر بيبقي ليه رد فعل ببيان إذا كان كبير ولا صغير على الرسم البياني،

فبيتدوا يغيروا في التصميم لحد ما يستقر بس "

يسكت لحظة وينظر إليّ، فلا أعلق فيستطرده ..

" وهو دة اللي أنا عايز أعمله "

طبعاً أنا كنت سأقول " عايز تديني نبضة يعني؟ "

لكنني أحب أمي وأرفض إهانتها أو أن ينسب لها أي شيء باطل عن ماضيها الطاهر
" أنت سيستم غير مستقر، أنت بيان من بره إنك هادي و معجب بحياتك والحياة
روتينية وأنت سعيد والدنيا ربيع، بس مش هو دة الحقيقي يا خالد، أنت جواك صراع
ممکن تكون أنت مش حاسس بيه وما تزعلش مني في الكلام دة، أنت فاكِر إن عشان
ما فيش تغيير في حياتك فأنت مستقر، بس دة عشان أنت بتضحك على نفسك، أنت
قدامك إنك تصلي وتلتزم وتراعي ربنا في كل حاجة وتبقى عم الشيخ هو دة الصح،
وبتحتقر الفساد والمخدرات على أساس إن دة الغلط، لكن أنت المؤشر بتاعك رايح
جاي ما بين الاتنين، أنت بتحتقر الفساد وأنت ما جربتوش وبالنسبة لك علامة
استفهام، كان ممكن أقول لك إنك مقتنع إنه غلط أيام ما كنت أنت صغير وبتسمع اللي
بيقال لك وبتعمله لأنك ما بتفكرش، بس وأنت كبير دلوقتي وواضح إن الكلام دة ما
أقنعكش إنك تكون الشخص الصالح اللي أنت عايزه، وإن جواك عارف إن الفساد
مش حيدمرك بدليل إنك اقتنعت بجزء من كلامي وشربت لأول مرة في حياتك سيجارة
ودة معناه إن ما كانش صعب تكسر المبدأ اللي إتباعك له طول عمرك كان ظاهري،
وكل ما هو ظاهري سهل تغييره "

أنظر إليه محاولاً تجميع الكلام في عقلي وربطه فيقاطع أفكارني

" أنا مش عايزك تدمن خطيئة ومش فارقة للدنيا واحد فاسد زيادة، أنا عايزك تجرب
الناحية الثانية عشان يبقى قدامك الصورة واضحة، الصالح بجد والفاقد بجد عشان
تقدر تستقر وتشوف أنت عايز إيه، فكل حاجة حنعملها هي بالنسبة لك غلط وفساد
وحرام وزفت، حتبقي pulse للسيستم بتاعك، وأعتقد إنك مع التجربة وتغيير اللي
جواك حتستقر "

أرد بحذر ..

" أيوة يا عماد، بس افرض إني استقرت على الفساد، ولقيت نفسي فيه، ما هو
عشان كدة إحنا المفروض ما نجربش حاجة غلط لأن النفس أمارة بالسوء وممكن
تعجبك وتتقلب إدمان، دي مخاطرة"
يقاطعني بهدوئه المعتاد ..

" منطقي لما تكون لسه صغير أو مراهق، وأنت مش عارف أنت مُقبل على إيه، أكيد
الكلام دة مرفوض لأي عيل صغير، بس أنت كبير وفاهم اللي بتعمله، أغلب اللي
بيشربوا سجائر ومخدرات أو أي نوع من أنواع الفساد، بيتدوا دة وهما صغيرين،
قبل ما يكونوا واعيين فعلاً للتوابع، أنت شوفت الدنيا كلها وعشت مع الناس اللي
عملت الغلط وعارف هما كان مصيرهم إيه، وأنا لما بكلمك أنت عشان عارف كويس
أنت قد إيه ذكي وحتفهم"

يصمت للحظة ثم يرفع سبابته محذراً

" الطمع في الشهوة، الطمع في الشهوة "
اسكت قليلاً، وهو أيضاً

من داخلي مقتنع ولكن هناك شيء في صدري، شيء بداخلي قلق، ولكن ماذا
سأخسر، لا شيء، أتوب بعدها وأنسى وأعود إلى السيستم الروتيني اليومي القوي
الذي أنشأته في حياتي، وتبقى لي ذكرى
" طيب يا عم المعلم رشدان، إيه الخطوة الجاية "

" أنت محوش فلوس؟ "

نظرة دهشة مني للحظة وأنظر له ثم إلى الشارع ثم له مرة أخرى، فيعيد السؤال

" أنت حتجنن ولا إيه، أنت معاك فلوس محوشها ؟ مبلغ كويس يعني؟ "

" هي أول تجربة حتكون الربا ولا إيه "

" ممكن ترد ؟ "

" آه الحمد لله، أنت عايز حاجة؟ "

" أكيد، أنت اللي حتصرف على نفسك والفساد مش رخيص، أعتقد أنت فاهم إنني
مش محتاج فلوس، بس عشان تشيل على قدك، ولو حبيت تطمع، تبقي عارف أولك
وآخرك، اللي حنعمله حيبقى نظام إنجليزي"
" ماشي يا عم فهمتك "
بدأ الصباح في الإشراق فنظرتُ إلى السماء للحظة ... سامحني يا الله
" الخطوة الجاية "
يشاور إلى السيارة فمشي تجاهها
" صديق سعودي كان معايا برة جاي الأسبوع الجاي "
" أنت مش كنت في البحرين "
" الكويت يا خالد "
" آه آسف .. وبعدين "
" أكيد حيجي عايز ينبسط وهو كان عامل معايا واجب كويس، فنروح ننبسط معاه "
" مش مطمئن لكلمة حننسط دي "
يفتح باب السيارة ونركب كلانا
" شيل على قدك يا خالد "
" ماشي يا عم "
" المهم ممكن يبقي في حفلة ولا حاجة، ابقى شوف طقم نضيف بتاع شاب وأنت
جاي، متجيش بلبس الشغل، ولا تريننج التوحيد والنوم اللي أنت لابسه ده "
" دا تريننج من چيل "
" يعني ده سروال مش بنظلون تريننج كمان "
ويتمتم
" بلاش فضايح "
" ماشي يا عم عماد "

يقود في سرعة، كم هي جميلة المدينة وهي نائمة، والشوارع والأزقة وأي شيء
نصل إلى نقطة اللقاء، هذه المرة أنزل من السيارة وأنظر له

" مستني تليفونك "

ينظر إليّ مبتسمًا

"الأسبوع الجاي يا خالد "

" سلام "

" سلام "

أبدأ في المشي، تلك المرة لا أفكر في الإتجاه المضاد، ماذا سيحدث، لا شيء، سوف
أجرب وأنا أعلم أن كل شيء تحت السيطرة، أدخر نقودًا سوف تُصرف يومًا ما على
زواج لا اختيار لي فيه، فلماذا لا أجرب شيء جديد لن يجعلني أخسر كل شيء ولكني
قد أكتسب التجربة، العالم كله إما تغير وإما ينادي بالتغيير، وأنا أقف وحيدًا أشاهد

الجميع من بعيد ...

أشعر بالحماس

ولكن ! ... للفساد؟!!

هل هذا منطقي ؟

يبدو أن الأمر كما قال عماد

هناك صراع داخلي دائمًا كنت أخبئه خلف تهكمي الدائم وسخرיתי على كل ما هو

حولي من حق أو باطل، ولكنه كان ساكنًا حتى أثاره هو

أكتفيت بمشاهدة الصالح والطيح بدون أن آخذ دور أحدهم

أفعل كغيري، أعيش في الروتين الذي يدخله الملايين دون أن يحركوا حجرًا واحدًا

من مكانه

تركنا كل مقدس كما هو بدون أن نسأل من جعله مقدس

لم نهتدي إلى الإسلام، بل استسلمنا إلى دين آبائنا كما فعل الأولون

أنا لن أتغير لحبي في الفساد، أو كحجة لعمل معصية
بل أتغير لكي ألمس الذنب الحقيقي، لعلي أطلب غفران اليقين
لعلي أجد مرادي فيما يقوله عماد
نعم هناك شيء ما في صدري يخيفني منه
ولكن منطقته ضرب بمطرقة على وتر الشك
فليكن ما يكون
سأتبع تجربته
لعله من سيأتي بإجابة
لعله سيكون من ينقذني من خطواتي إلى الموت الروتينية البطيئة
لعله ...
رسول الخطيئة

الفصل الثامن

عماد الدين

رسالة

حبيبتى...

كل قصص الحب تنتهي

عدا قصتنا

إن كان لكلمة حب نهاية

لو كان للقدر أن يفرقنا

فهو لن يفرق ما في نفسنا

لا تهدأ نبضات قلب في الغرام

إلا حين يتوقف

كل النهايات سعيدة معك

ولكني سأعطيك النهاية التي تُرضيني

فانتظريني

" السلام عليكم ورحمة الله، السلام عليكم ورحمة الله "

استيقظ علي صوت المسجد من بعيد

لقد فاتتني صلاة الجمعة،

لم أكن أظن أنني سأبدأ في الفساد بهذه السرعة، السجدة الوحيدة الأسبوعية حرمت

منها، لعلها علامة بخطأ القرار، ولعلها لا شيء ...

أسأل نفسي وأنا ممد على الفراش سارحاً في سقف الغرفة وكأنه ليس موجود، وكأنه
الفضاء السرمدي، لماذا لا أصلي وأنا أفعل الذنب؟
ماذا يمنع أن أكون عبداً مطيعاً وعاصياً في آن واحد؟، لماذا لا ألتزم وأذنب وأدعو
الله بالهداية؟

يأتي الرد من الفضاء السرمدي

أليس كل الناس تصلي وتذنب؟

وهل جردت الإيمان من كل عوامله وأبقيت الصلاة

" الصلاة عماد الدين من هدمها هدم الدين "

وكثير من الآيات تحدثت عن عذاب تارك الصلاة

وكثير من الشيوخ تحدثوا عن كفر تارك الصلاة وخروجه من الدين

ومن يصلي ويذنب قد يغفر له الله

ومن لا يصلي وهو عفيف عن الذنب في النار وبنس المصير

ولكن!

أليس كل شيء بأمر الله

أليس هو علام الغيوب

ألن يرحم نفساً بكت من عدم قدرتها على هزيمة ذنوبها وإتباها لهوى النفس؟

أتكون النار الأبدية عقاب لمن ولد في رحم الخطيئة وخرج بلا هادي ولا دليل؟

هل تهزم الشياطين العقل؟ وتستعبد الخطيئة النفس؟ ويقف في طريقها الأقدار

ثم لا يرحمها الله؟

أليس هو أعلم بما تحويه النفوس

كل هذا الجدل وكل تلك الأسئلة والأجوبة تنتهي دائماً بكلمة واحدة

الله أعلم

وحقاً ... الله أعلم

أقف بصعوبة .. من عواقب أن تنام طويلاً أنك تستيقظ على نوم

أمشي خارجاً من الغرفة، لألمح أُمي تقف في المطبخ

" مش تصحيني يا ست أنتِ ؟ ينفع كدة تفوتني الصلاة ؟ "

" قعدت أنادي عليك، أنادي عليك ولا أنت هنا "

" وأنتِ كنتِ بتنادي من تحت البيت ولا إيه "

يقاطعنا صوت يأتي من السفارة

" صباحية مباركة "

أقف للحظة لاستجمع نبرة الصوت داخل عقلي

" أنتِ إيه اللي مسيّك بيتك وجاية هنا يا بت "

أسمع صوت خطواتها متجهة نحوي، بينما أدخل الحمام لأتأمل نفسي في المرأة، تقف

على باب الحمام لتخاطبني بلهجة ما بين الحدة وأول السب بالألفاظ الخارجة تغمرها

نوع من السخرية

" ما أنتِ لو بتسأل يا بابا، تعرف إن وحيد سافر الصين وحيقعد هناك بتاع شهر

ويمكن أكثر "

أضرب على جبهتي بكفي

" اخخ "

فتستكمل بعتاب

" بلاش تسأل عليا اسأل على الراجل، روح معاه المطار هو والحاج "

" والنعمة نسيت خالص "

وأنظر لها مستطرداً ..

" وهو سأل عليا ؟ "

" طبعًا، وقتلته أكلمك تروح توصله، ما رضيش وقال لي حتتعبيه ليه ما في ناس
حتوصلنا لحد هناك، أصله عارفك "

" دة تلاقي أمة محمد كانت معاه. دة مسافر مع الجد فاذر "

" هو دة اللي بناخده منك، هزار وبس "

أنظر إليها وأحاول رسم نظرة النادم

" طب سيبك، أنت زعلانة مني يا سوسو يا حياة قلبي "

" بكاش، بكاش ومنافق "

أضحك وأنظر في المرأة

"أضحك اضحك .. ما الهبل دة في دمك "

" ماشي، بس أهم حاجة إنك مش زعلانة "

" مش زعلانة يا سيدي "

أفتح الصنبور، ثم أغلقه مرة أخرى، بينما هي تدير ظهرها وتتجه للصالة

" طب بقولك "

تلتف إليّ

" إيه تاني ؟ "

" طب مدام جوزك مسافر خليني أعمل معاك واجب وآخذك أفسحك واضبطك "

" يا عم ولا تاخدني ولا آخذك "

" يا بت يا سامية اسمعي الكلام، مصلحة لك وليا "

" ودي مصلحة لك في إيه "

" أصل الحته كلها شايفاتي رايح جاي بطولي، وما اتجوزتش لحد دلوقتي، وأمك

بتقول لي أنت مش راجل وللا في حاجة أنا مش عارفاها، فا خُدي في أخوكي ثواب

وابعديه عن المشي البطال "

ترد ضاحكة وهي تضع يدها على فمها

" وأمك قالت لك كدة ليه ؟ "

" ما أعرفش تلاقي حد من ولاد الحرام حب يسوء سمعتي اللي زي البرننت، فقالها

أنا شوفت بيبوس صابر المكوجي في بوقه "

تضحك بصوت عالي وتنظر إليّ وهي تشير سبابتها تجاهي

" تلاقي عشان موضوع العرايس والجواز اللي أنت رافضه "

" أصل أنا مش شايف نفسي في الجواز يا سوسو عندي طموحات تانية "

" طموحات تانية إيه إن شاء الله حتعمل إيه ؟ "

" ألعب باليه "

نضحك ضحكة بسيطة فاستطرد

" الشاي بقي يا سوسو "

" ماشي "

وتمشي خطوتين وتنظر إليّ بنصف وجه

" عقبال ما أعمل شربات جوازك على صابر يا..... "

" أنا فاهم أنت بتلمحي لإيه بس جعلل إني ما كنتش يوميه في البيت "

أغسل وجهي واستكمل كل ما أريده من زيارتي للحمام، ثم ألتفت إلى الغرفة مرة

أخرى لآتي بهاتفني، الذي من المتوقع ألا يطلبني أحد ليه اليوم، وأتجه إلى الأريكة

أمام التلفاز، مسرحية قديمة لأمين الهندي، وأنا أعشق أمين الهندي، أتابعها بينما

أفرد قدمي على الأريكة، أقل من خمس دقائق لأجد سامية تدخل بصينية الشاي، وبها

طبق من الكعك الإنجليزي، هي تعرف كم أحب هذا الاختراع، وبالتأكيد هي من أتت

به، فأمي ستفضل أن تأتي بكيلو بلح الشام، حيث أن هناك أسطورة مصرية تقول :

إذا لم تكن الحلوى " تخر " ((أي ينسكب منها)) سكر وشربات وسمنة مثل أي

حلوى شرقية؛ فهي ليست حلوى ويمكن استخدامها في " تغميس " الملوخية

ابتسم لها وأنا أمد يدي لأرفع من يدها الصينية

" باشا، والنبي أنتِ باشا، أنا ما خلفتش غيرك "

" دا وحيد باعتها لك "

أنظر لها باسمًا وأقلدها في طريقة الكلام

" وحيد اللي أنت ما روحتش توصله المطار، طب بذمتك هو يعرف إني بحب الكيكة

دي؟"

واستطرد..

" هو يعرف إن الكيكة دي موجودة أصلاً؟"

ترفع حاجبها

" ولا، لم نفسك "

" ماشي يا باشا، أنت تؤمر أمر، هو مش وحيد ليه أصول أسكتلندية؟"

" حشتمك يا خالد "

" فداكي يا روعي "

وتجلس، بينما نشرب الشاي ونأكل الكعك ونشاهد المسرحية التي كانت في فصلها

الأخير، بعض الوقت لتنتهي المسرحية وتغير هي القناة لقناة طبخ بها شيف شهير

جدًا ضخم الجثة، يمتلك شارب ضخم الجثة، وأيضًا منظار طبي ضخم الجثة، كل شيء

في هذا البرنامج ضخم الجثة، برنامج "over" ولكنه محبوب، ولكن أكيد ليس

بالنسبة لي..

" أنتِ حتشوفي عمو الفطيع دة؟"

" لا أنا ما بحبهوش، بس أمك بتحبه "

" طب اظفي يا ماما بلاش عفرتة"

" وحنقعد نتفرج على بعض "

" لا، عايز أقعد معاك في البلكونة زي زمان "

" وحتكيلي قصة حبك مع صابر المكوجي "

" لو روحنا دلوقتي حكيها لك بالمشاهد الأبيحة اللي فيها "

" لا أنا كده أروح أجيب فشار وبعدين أنط بيه من البلكونة "

" هایل وأنا وصابر حنستناكي تحت في الشارع "

ترفع حاجبها بابتسامة عصبية

" بس بقي "

" طيب يلا "

" طب روح أنت، وأنا حخش الحمام وأحصلك "

" حتعلمي إيه "

" ما أعرفش "

" طيب مستنيكي "

أدخل إلى الشرفة، أنفض التراب عن الكراسي والمنضدة بفانلة داخلية قديمة لي كانت معلقة بجانب ربطة الثوم المعلقة فوق رفوف بلاستيكية تحمل بعضها بصل و أخرى بطاطس كل هذا في شرفة مساحتها لا تتعدى المتر ونصف طولاً في متر عرضاً بها ثلاثة كراسي ومنضدة وكل شيء مُعشق في قلب الآخر راسماً صورة كلاسيكية للبلكونة المصرية الفريدة من نوعها التي تعتبر لأغلب الشعب مخزن ووسيلة للنقل الخفيف " نزل السبّت، طلع السبّت " وخروجة وقهوة وفي بعض الأحيان مصيف، وهي مصدر للتراب والذباب وصوت الأنابيب وسب الدين ولعن الدولة وتنقيط غسيل الجيران والإيبولا والسرس وخاصة "السيمونيل" تلك الميكروبات التي تروّج شركات المنظفات أن منتجاتها تتخلص منها نهائياً، بينما هم لا يعرفون أن المصريين يضعون منه ملعقة على الشاي من أجل المتعة.

أجلس على كرسي، وأضع قدمي على الآخر منتظراً سامية، منذ وقت بعيد لم نجلس معاً، قد يكون منذ أن تزوجت، وسامية تختلف عن وحيد أنها مثقفة ومتعلمة أكثر منه

ولكنهما يشتركان في الطيبة، وهي تشترك معي في خفة الظل، لا أعرف لماذا لم
ينجبا حتى الآن، ولا أشغل نفسي بأن أتدخل في شيء قد يعكر صفو جلستها النادرة
معي..

أيضاً هي تمتلك عقل جيد، يمكن أن يعطني بعض الأجوبة، أو أسئلة جديدة مبهمة
تأتي وتجلس بجانبني

" حمد لله على السلامة "

" الله يسلمك "

" عاملة إيه في حياتك "

تنظر إلي بابتسامة خفيفة

" الحمد لله كويسة "

" ومالك مبسوطة كدة "

" أصلي مستغربة أنك بتسأل يعني، ما جربتش تعملها في الموبايل مرة؟ "

" الدنيا تلاهي وملاهي "

استطرد..

" وحيد عامل معاك إيه "

" طيب وابن حلال، الحمد لله مبسوطين "

ترمقني بنظرة غريبة

" والعيب مش مني ولا منه لو حتسأل على الخلفة "

استوقفها رافع حاجبي

" لا ما كنش دة طبعاً حبيبي سؤالي الثاني "

وأتمتم

" يمكن كان يكون الرابع أو الخامس "

فتضحك ضحكة بسيطة وعذبة، جميلة هي سامية وازدادت جمالا كلما كبرت، وبالطبع
لم أكن ألحظ هذا أبداً

" يعني يا سامية مش حاسة بالملل من الجواز، ما فكرتيش تشتغلي "

" لا خالص، الصبح في البيت وبعدين بنروح لأهل وحيد، وأنت عارف هو طيب
وحنين، وأنا اتعودت على الوضع دة إلى أن يشاء الله وأخلف أو نشوف إيه المكتوب
لنا "

" ربنا يكرمك يا بنتي "

تلتفت إليّ وتنظر نظرة ثاقبة

" وأنت يا عبده الروتين "

" أنا مالي، أنا زي الفل "

" أيوة إمتي حياتك تتغير؟ "

" قريب، بفكر أتعلم تنس "

" لا أنا برشح لك الجولف يا خالد أكثر "

" أنا بقول إنه قريب لشخصيتي لأنني بحب اللاند سكيب الواسعة، بيقولوا حيفتحوا

ملعب في الوايلي قريب حروح أبص عليه "

" ظرافة "

" مولاتي!!! "

" إيه.... اللي ... حتعمله.... جديد... في حياتك "

أسرح قليلاً

" ما أعرفش، بس موضوع الجواز دة بعيد عن تفكيري شوية، بفكر أشتري عربية "

" عشان تركنها تحت البيت وتنزل تقعد فيها وتطلع تاني، دة على أساس إن في مكان

لعجلة تركز تحت أساساً "

" والله تبقي خطوة إيجابية والسلام "

وأنظر لها متسائلاً

" طب أنا عايز أسألك يا سيمو "

" في إيه "

" أنتِ ساعات بتفكري كويس و

" أخلص يا عم أنت حتغني لتامر "

" ماشي "

أنظر إليها وأنزل قدمي من على الكرسي وأضعها قدم على قدم

" أنتِ شايفاني إزاي "

وأسكت فتنظر إليّ في محاولة لفهم المغزى، فأوضح

" يعني أنتِ شايفة حياتي وشخصيتي من وجهة نظرك، كانت إزاي ورايحة لفين "

تنظر لحظة وتسكت

" أنت عايز الصراحة يا خالد "

" ومش عايز حاجة تانية غيرها "

تصمت لدقيقة، وتنظر إليّ بنظرة أشعر أنها يشوبها شيء من الحسرة،

" بص يا خالد، أنت طيب وكويس، بس حكمك على كل حاجة في الغالب غلط،

بتشوف الدنيا بعيون الناس، وعاشق للرتابة والتقاليد، ساعات بحس أنك بتشر

بيروقراطية "

تسكت لحظة ثم تستطرد ..

" بس أرجع وأقول ماما هي السبب، لما مات بابا خافت علينا قوي، فشيلتنا معاها

حاجات ما كانتش بتاعتنا وخافت من الناس زيادة، فحبستنا في البيت أكثر "

نظرت إليّ نظرة حاسمة

" خالد، أنت ليك أصحاب من وأنت صغير؟ "

أتهد تنهيدة قصيرة

" ولا وأنا كبير "

" وأنا برضو كان ليا أصحاب من اللي بكلمهم من فترة للتانية "

تقف ثانية وتستكمل

" أنا أيام المدرسة كان ليا أصحاب كثير، بس من غير ماما ما تعرف، على عكسك،

أنت كنت دايمًا بتسمع الكلام، وتقلل علاقتك بالناس "

تنظر أمامها

" خوف ماما ضيع علينا فرص كثير "

ثم تنظر إليّ نظرة أمل مفعمة بالحنان

" بس أنت لسة قدامك الفرصة لسة ممكن تنزل أكثر وتكون إيجابي وتعمل أصحاب،

ما أنتاش عندك 150 سنة مثلاً "

كلمة جميلة، سأعطيها المفاجأة وأحدثها عن صديقي الجديد " الصايح ابن الصيغ "

" أنا بحاول يا سامية، والحمد لله ربنا بيوقف ولاد الحلال في طريق الواحد "

ولاد الحلال !! " يا رب ما تنطش من البلكونة أو تكون نسيت فالنتينو المدرسة دة "

تنظر إليّ وتبتسم..

" ما تقوليش، بقيت تخرج وليك أصحاب وصاحبات "

" مش قوي كدة أصحاب بس في البداية "

" حد غير صابر المكوجي "

أرد بابتسامة عصبية

" أبو أهله، لا مش صابر المكوجي ولا منعم بتاع الفول "

تبتسم ابتسامة خفيفة أعلم أنها سوف تطير بعد أقل من دقيقة

" أمال لقيتهم فين دول ؟ "

" صديق قديم من أيام الدراسة "

" من المدرسة ؟ "

أجيبها كالأهبل

" آه كان معايا "

" اسمه إيه؟ "

" عماد "

" مين؟ "

" بدوي "

هل رأيت يوماً ما فيلم " the ring " تلك الفتاة المبلولة التي تجيد موهبة القفز من التلفاز، كانت دائماً تخرج من التلفاز وتنزل إلى الضحية، ثم يقطعون المشهد، لم أعرف تلك اللحظة ماذا كانت تفعل بالضحية، هل تزحف ناحية الضحية ثم تضع إصبعها في فتحة أنفه ثم تخرجها لتضعها مرة أخرى في فمه لتموت الضحية من " القرف " مثلاً

لا أعرف والله أعلم أين كانت تضع إصبعها ولكن الأكيد إنه كان شيء مؤلم ومخيف للنفس البشرية، المهم أن الشرطة تأتي اليوم الذي يلي يوم وفاة الضحية لتجدها شاحبة عيناها قد خرجت جزئياً من مكانها وفمها فاعراً مفتوحاً لآخر الفك ولسان الضحية ساقط من الفم حتى صرة بطنه،

هذا ما كان شكل سامية بعد سماعها لاسم العرّاف المقدس وسعت حدقة عيناها وفتحت فمها لآخره لدرجة إنني رأيت أعضاء داخلها لم أرها من قبل، لكن إحداها يشبه المئات التي كنا قد درسناها في الأحياء " عماد مين؟ "

" أنتِ حتتشي ؟ أجيب لك كركاديه؟ "

تعلي صوتها

" مين ؟"

" وطي صوتك... ماما تسمعنا "

" أوطي صوتي، دة أنا حقتك، يعني يوم ما تحب تصاحب، تصاحب راعي الفساد في

شارع باب البحر "

" لا هو اتغير شوية، ربنا كرمه واهو داخل على باب الشعرية "

" أنت بتهزر يا خالد ؟ أنت مش فاهم أنت بتعمل إيه ؟"

" لا يا ساميه فاهم وواعي "

تأخذ نفس عميق

" شربت مخدرات ولا لسة ؟ "

" سامية، بلاش شغل ماما دة "

تسكت قليلاً فاستطرد

" لسه حشرب الأسبوع الجاي "

تقف من على الكرسي فأقف بدوري وأجبرها على الجلوس

" أقعدني وبلاش جنان، وما تندميش إني قولت لك "

تبعد يدي عنها

" وأنت اللي بتعمله دا مش جنان، آخرتها تمشي مع واحد زي دة "

أتركها وأقف لحظة

" ممكن تهدي؟"

تجلس وتنظر الناحية الأخرى بعصبية

" سامية، أنا كبير وأنت عارفة أنا عاقل، وعارف بعمل إيه "

" وأنت لو عارف كنت عملت كدة ؟"

" طب اصبري "

" ها "

" أنتِ عارفة، أنا مش بتاع الهجص دة والقعدات بتاعته، بس كنوع من التغيير،
مفيهاش حاجة أنا حجب أروح معاه وأصاحبه، بس مش معناه إني جعل حاجة
مجنونة تبوظ صورتني قدام نفسي أو قدام الناس"
بدا عليها شيء من الاقتناع ليس له أي أساس من داخلي
" وبعدين؟ "

" شوية الموضوع حيبوخ، وهو يرجع عمان اللي كان فيها وخلص "
" هو مش كان في الكويت "

" والنعمة ما بقيت عارف هو كان جاي من أي داهية "
تنظر إلي نظرة انعدام ثقة

" ماشي يا خالد، اللي تشوفه، بس خلي بالك، ولو حاجة حصلت حتقولي "
" ما أنت يا باشا مشرفنا الفترة الجاية، أي حاجة تحت مسئوليتك "

تتهند وتسرح قليلاً

" أنا عازمك النهاردة على الغدا "

تنظر إلي بطرف عينا

" كل بعقلي حلوة "

" مدام بتحببها وماله "

أنظر لها وابتسم ابتسامة بلهاء

" ها أجيب لك إيه؟ "

ترد مستسلمة

" اسأل ماما وهات اللي تجيبه "

" ماشي يا ستي، اللي تشوفيه "

أترك البلكونة متسائلاً

هل تسرعت بإخبار سامية،

أنا أعلم أنها ذكية واثق بها، ولن تقول شيء لأمي، على العكس قد تساعد في تغطية
أي دلائل على أن هناك شيء قد يحدث
وأيضاً كما أنا أحتاج إلى من يوجهني إلى الشر أحتاج أيضاً من يقوّمني ويأخذ بيدي
حال قررت إنني لن أستطيع استكمال رحلتي مع عماد
وجود سامية جاء في مواعده
وكانها رسالة لكي أستكمل طريقي إلى المجهول
ففي النهاية كل الطرق تؤدي إلى المجهول
لذا ... فلتختَر طريقاً جديداً كل مرة تذهب فيها إليه

الفصل التاسع
الحرام والحرام

رسالة

حبيبي

أكتب إليك مرة أخرى
لأنني لم أجد منك إجابة
لماذا توقفت عن الكتابة؟
لماذا يا حبيبي؟
لماذا؟

أيام تمر
ولم يتصل بي
لا أعرف لماذا لم أكن قلق، فبأي حال من الأحوال الشيء الوحيد الذي لا تحتاج
البحث عنه في الحياة هو الشر، هو الذي يبحث عنك
أذهب إلى العمل وتسير الحياة بصورة طبيعية..
إلا من نظرة عدم ارتياح في عين سامية، الخوف من المجهول.
وأظن أنها نفس نظرة الخوف في عيني، لا أعرف إذا كنت سأستطيع لحظة المواجهة
الصمود، وماذا إذا لم أشعر بشيء وكان ذنب " ببلاش "؟!
الأمر بالنسبة إليّ أشبه بجزيرتين يفصلهما نهر، وعماد هو سائق القارب الصغير
الذي يربط ما بين الجزيرتين، عماد يظهر فجأة على شاطئ، ويحكي لي عن جمال
الجزيرة الأخرى التي يعيش بها أغلب وقته، و يدعوني للعيش بها، وأنا في حيرة،

ويتردد على جزيرتي كثيرًا و يعدني كثيرًا بالسعادة، وفي لحظة يختلط بها الملل وحب الاستكشاف سأركب بها المركب ليأخذني إلى الجزيرة الأخرى، لأري إذا ما كانت السعادة هناك أم لا، الكارثة هنا، إنني إذا أردت العودة، سيكون عليّ العودة وحيداً، ولا أحد يعلم كم من الوقت سأحتاج الجلوس على الشاطئ حتى أجد قارباً آخر، وهل إذا قررت العودة سباحةً، هل سأصل أم سأغرق في المنتصف؟ إنه رهان اليأس على الأمل في الأفق، ولكنني سأخوضه، يجب عليّ يوماً ما أن أتحرك وكفاني وقتاً ضائعاً أذهب إلى العمل كالعادة كل يوم، لم أقطع أي عادة لي

حتى جاء الأربعاء، الساعة الثانية والنصف ظهراً
الهاتف يرن، عماد

" أيوااا "

" أيوا أنت يا عم، يعني أنا ما أتصلش أنت ما تتصلش يا أبو خالد؟ "

للأمانة أشعر بقدر ليس بضئيل من النفاق وأنا أتعامل معه كأنه كان صديق عميق

" أنا قلت لك مستني تليفونك، أنت قلت لي كلمني وأنا رفضت؟؟؟ "

" سلبية، ما تعرفش تاخذ المبادرة "

" ودي آخدها فين دي؟ "

" أنا لما أشوفك حديهالك، إيه نظامك "

" أنا موجود، سيادتك "

" يبقي النهاردة سبعة ونص في نفس المكان "

" حنروح فين يا عم أتوبيس المفاجآت "

" حننسط "

" يبقي أكيد ملاهي أدهم "

" آه هي "

" صاحبك القطري جه؟ "

" سعودي يا مرح، وحنروح عنده أو عندي ما أعرفش، ما لكش فيه، سبعة ونص،
وما تلبسش تريننج التوحيد والنوم"

" عيب عليك، دة أنا ضبطت طقم حبيهرك "

" من محل اسمه الشيخ والسبحة بقى ولا إيه"

" عيب عليك، اسمه الزبيبة والسجادة "

" هما ليه دايمًا حاجة وحاجة؟ "

" عشان الكثرة تغلب الشجاعة "

يرد بصوت عصبى

" بالليل "

" سلام "

بيب، يغلق الخط

أمشي إلى مصطفى زميلي في الحسابات

" طيفا، أنا بكرة مش حقدر آجي "

" ليه يا باشا؟ في حاجة "

" لا حودي أمي كام مشوار في الحكومة كدة "

" ليه الحاجة طالعة الحج "

" لا بس ادعيها ربنا يوفقها "

" آمين يا رب "

استكمل عملي حتى ينتهي، أعود إلى المنزل، غداء وأجلس قليلاً، ثم أبدأ في البحث

عن " أنصف طقم عندي " وكان سهلاً جداً عليّ نظراً لعدم وجود اختيار الكثرة أو

التنوع، أضع كولونيا

تدخل سامية إلى الغرفة عليّ

" أنت برضو حتعمل اللي في دماغك "

" ما تقلقيش، ما فيش حاجة حتحصل أنا مش عيل "

ألتفت إليها

" ما تيجي معايا "

ترد بسخرية بها شيء من عصبية

" وماله، عندك بدلة رقص كويسة "

" حتلاقيها في الغسيل، كنت لسة لابستها إمبراح "

" لصابر المكوجي "

" أبو أهله "

أمشط شعري وأنظر إلى نفسي في المرآة، ثم أنظر لها

" شكلي ابن ناس؟ "

" شغال، رغم إن الشكل ابن الناس اللي من برة ما يغيرش ابن الكلب اللي جوة "

أضحك وأذهب ناحيتها وأقبل رأسها

"wish me luck "

" ربنا يهديك "

أتركها وأذهب إلى الباب

" قولي لماما إني رايح أسهر في الشغل "

" حاضر "

أعرف إنها بالطبع ستحاول إلهاء أمي ولن تجعلها تشك في أي شيء، هذه أفضلية

وجود سامية الأساسية، كم هي جميلة الآن

أذهب إلى نفس المكان، لا أجده تلك المرة، أنتظر خمس دقائق ويظهر، أركب السيارة

ويتحرك في عجلة

" إيه رأيك في الشياكة؟ "

" شغال، مش فضيحة على الأقل "

" لا لو حتتريق، نزلني "

" لا يا عم خليك "

" أيوة كدة خليك حليوة "

تمر السيارات بجانبنا ونقف في الزحام، اليوم الأربعاء، لماذا الزحام لا أعرف، أنظر له وأفتح حوار للتسلية

" عم الشيخ كان عندي سؤال "

" قول يا ولدي "

" ألاقى ناس كتير بتقول إنها بعد ما جربت الحرام لقيت الحلال أحلى كتير، أنت إيه رأي فضيلتك "

" دة في الفلوس يعني ولا إيه ؟ "

" لا فلوس مين يا حاج، في النسوان والجواز والخمرة والمخدرات والتبويل "

يضحك ضحكة خفيفة

" بص يا ابني، الفرق بين الحرام والحلال هو القلب، يعني أي حد بيعمل غلط بيبقي خايف وعارف إنه بيعمل حاجة مش سليمة، فما بيبقاش مطمئن، بيعملها وهو خايف يعني، قلبه ودماعه ما بيبقوش صافيين، لكن الواقع عكس كدة طبعًا، الحرام ألد " يسكت وهو يركز في تقاطع الطريق، وعندما يمر منه يستطرد..

" الخمرة والمخدرات وأي حاجة بتغيب العقل، أكيد ضررها كبير، بس متعة، وحاجة مطلوبة، وبتخليك تفكر بصورة مختلفة تتكلم من قلبك على طول، ما فيش عقل شغال عشان يفلتر الكلام، فبتبقي أكيد إحساس جميل وعذب كدة وبقلاوة "

نضحك كلانا فيخرج سيجارة، ويعطيني واحدة وبعد أن نشعل السيجارتين ينظر إليّ ويستكمل

" اللي يقولك في الحريم الحلال أحسن من الحرام وهو جرب الاتنين، قولو أنت ابن و..... وش، و اديله علي وش أمه، أنت لما تتجوز الحلال دة زي الواجب، و صعب

إنك تتكلم فيه وصعب إنك تطور العلاقة، و المصريين بيقفشوا و يقلك لا احنا مش
أجانب وإحنا مش في فيلم سكس و ترضى جوز أختك يعمل في أختك كدة وأنا بقرف
وجو حمضان، لكن الحرام بيبقي شقلبة ولا حد فارق معاه حاجة، واحدة عارفة إزاي
تبسطك و عارفة اللي يجيب الراجل على ركبته، لكن الحلال عقبال ما تبتدي تكتشفه
وهي تفهم وتتعود وتحاول تقتنعها تكون دخلت في الأربعين و العجز الجنسي يدق
على الأبواب، لا طبعا واحدة بطاله حتبسطك، الحلال يبقي عسل لو اتجوزت واحدة
بطالة مثلاً "

اضحك حتى يحمر وجهي

" والله يا ابني، دا شعب معقد "

" بس مش كلهم كدة يا عم "

" أكيد لكل قاعدة شواذ، بس منين عايزها بنت ناس ومغمضة وما باستش حد قبل
كدة ولا تعرف ولاد، وعايزها ليلة الدخلة تلاقيها بتترحلق من على عمود الاستربتيز
اللي أنت حاطه في أوضة النوم، لا اللي عارف يطلب بيطلب صح ولا اللي بيعمل
الخدمة فاهم حاجة، عايزها ما تعرفش ولاد وتروكك، اتجوز واحدة ليزبيان، شعب
ابن أهبل "

استكمل الضحك وأكح ثم أرمي السيجارة من الشباك،

" إحنا رايعين فين؟ "

"التجمع الخامس "

" وليه بعيد فحت كدة "

" معلىش بقي، الحفلة هناك "

" حفلة ؟ عند الأمير الثري السعودي "

" آه هو عنده فيلا، قريبة من البيت عندي، وفي ناس أصحابنا وناس أصحابه وجو ظريف هناك، بيعمل حفلة لما ينزل مصر، وواحدة تانية وهو مسافر، بيجي يهيص هنا "

" هايل "

" أنت جيت التجمع أو التسعين قبل كدة يا خالد؟ "

" أكيد، لينا فرع هنا جيت جردت فيه كذا مرة "

" طيب كويس مش حتتوه يعني "

" عيب الكلمة دي يا عم "

بعد فترة يظهر التجمع الخامس، شارع التسعين، وبعد دقيقة يرفع يده اليميني

" شايف البيت اللي هناك دة؟ فيلتنا في ضهره "

" دة أنت قريب جداً من التسعين "

" آه أبويا اشتراها زمان ، دلوقتي تساوي ثروة "

" آه أكيد ماشاء الله "

خمس دقائق من القيادة، ينعطف يمين ثم يسار ثم يسار ثم يمين، أتوه فلا أتابع

المسار، في النهاية لا أعتقد أنه سيقول لي " ارجع لوحدك يا بابا "

يقف بالسيارة بجانب حديقة تتوسط القيلات الموجودة في المنطقة وهي أحد سمات

التجمع والمدن الجديدة كثرة الحدائق

نخرج من السيارة

أنظر لأجد أمامنا فيلا صغيرة مظلمة لا يدل أي شيء على مظهر الاحتفال،

بها أشجار كثيفة على الأسوار، ومن بين الأسوار يمكنك أن ترى الحديقة المهملة

وبعض المقاعد البلاستيكية القديمة، كل شيء رمادي كالموت ذاته

أرفع عيني إلى الشرفة، لأجد رجل عجوز يرتدي فائلة داخلية وسروال قصير ويمسك

بيده شيء لامع، لا يمكنني تحديد ما هو، ينظر إليّ نظرة احتقار ويثبت عينه عليّ

أين أتيت بي يا عماد ؟

أين؟؟

" خالد، الفيلا الناحية الثانية من الجينة يا بابا "

" والله طيب يلا بينا مستنين إيه "

نمشي تاركين أبانا المجنون لنمشي على رصيف الحديقة، كاد هذا الأحمق أن يقلب
يومي رأساً على عقب " بشكله بفانلته بلباسه " ولكني الآن أستطيع أن أمل في حفلة
أفضل

" عماد، أي تعليمات توجيهات نصائح "

"أغلب الناس كلها ما تعرفش بعض، وما أعتقدش حد بيسأل كثير، بس أنت محاسب
في شركة كبيرة وساكن في مدينة نصر وجربت كل حاجة قبل كدة على خفيف ومن
فترة "

" وأمي اسمها يوستينا وعندها محل بفاترينة، إيه الهجص دة كله "

“cover “

" ماشي "

أبدأ في سماع صوت موسيقى خفيف يأتي من فيلا أكبر من التي كان يقف بها هانيبال
ليكتر، مفعمة بالأضواء والحيوية، وأضح أنها حفلة، أشعر بقليل من الحماسة
عند الباب يقف فرد أمن وشخص يبدو أنه حارس العقار الأساسي، يقفان عندما
يجدانا قادمين من الحديقة

عماد يتمتم

" كان اسمه إيه، كان اسمه إيه ؟ "

يقاطعنا حارس العقار عندما نقتررب منه

" أستاذ عماد، يا أهلاً يا باشا "

عماد يرد

" إزيك يا عم رجب "

" الحمد لله، عاش من شافك "

ثم ينظر إلى فرد الأمن

" تبعنا يا راغب "

" اتفضلوا يا باشوات "

ندخل من البوابة لنجد أمامنا بخمس أمتار باب القبلا، وعلى يساره مكان انتظار يسع سيارتين على الأكثر، ينعطف عماد إلى اليمين وأتبعه، لندور حول القبلا فيظهر لنا الحديقة الخلفية للمكان،

ما لا يزيد عن أربعين شخصاً هم من في الحديقة فقط، الحديقة تمتليء بالأثاث الخارجي والأضواء الخافتة، وبها مسبح صغير في المنتصف، وحوله مختلف أنواع المقاعد من " الكنب والطرابيزات العالية وركن من البين باجز"، النساء أكثر من الرجال، وهذا شيء يجعل أي مكان أطف، كانوا جميعاً شباب من العشرينات إلى الأربعينات من العمر، ولكن جميعهم من الشباب في أزيائهم، أشعر بالإثارة والسعادة، لأول مرة أكون في مكان مليء بالحياة والحيوية، ليس كأني مكان، منذ شهر كنت قد أعتبر ذلك المكان قصر الشيطان المحرم، الآن أنا لا أري إلا الحياة، كلام سيدنا عماد له مفعوله

يأتي باتجاهنا شاب من شاربه وذقنه ونعومة شعره تعرف إنه خليجي يبتسم ويتجه إلى عماد

" أبو عماد "

" عبده "

سلام حار ثم يلتفت عماد إليّ

" عبد الله أقدملك صديق الطفولة خالد، خالد دا عبد الله، شقيقي "

أمد يدي لكي أصافحه

" عبد الله، عماد كلمني عنك كثير "

" يا رب يكون كلام بالخير "

ويضحك وينظر إلى عماد

فأرد مبتسمًا

" لا طبعًا كل خير "

يمسك كتف عماد ويرد مبتسمًا

" بهزر معك، عماد أخويا "

ينظر إلى عماد

" عمدة، في حد هنا عمرك ما تفكر فيه "

" يا راجل "

" عمل لك مفاجأة "

" طيب يلا بينا "

ثم ينظر إلى عماد

" خالد استناني على البار لحد ما آجي لك "

ينظر إلى عبد الله ويتكلم باهتمام

" البيت بيتك يا معلم، مش محتاجة كلام "

ابتسم له في ود

" أكيد يا عم عبد الله، عيب "

ويأخذ عماد ويتجه إلى داخل القبلا،

بجانب الباب يقع البار، ذهبت إلى هناك، أمشي ببطء وأشاهد الضيوف وخصوصًا

الجنس اللطيف، لا أنكر إعجابي الدائم بملابس المرأة المتحررة، تلك الألوان الباهية

والتصميمات التي تغطي كل ما يريده الرجل جزئيا، رؤية المرأة عارية لا يثير مثل

رؤيتها بالبكيني أو شبه عارية أو على وشك التعري، تلك التصميمات لا تراها للأسف في التوحيد والنوم، حتى لو ملابس نوم، أغلبها ملابس محجبات، في حوار مع صديق أحرق في العمل قال لي لا تتزوج إلا محجبة، الحجاب عفة، وأنا لا أعرف أي عفة يأتي بها الحجاب في زمان يتم فيه التحرش باناث الكلاب، المنقبات لم ينجين من المعاكسات حتى، فماذا أضاف الحجاب للعفة لا أعرف، سامية مثلاً تصلي ومؤمنة منذ الصغر أن ارتدائه طمعاً في مرضاة الله، ولن تقوم مثلاً عند أول مشاجرة مع فتاة " تظهر شعرها " بأن تقول لها " يا وسخة ياللي سايبه شعرك للرجالة" كنوع من الحقد الدفين.

نعود إلى جميلات الحفلة، أمشي واضعاً يدي في جيبتي، أتمشى بكل فخر وكأنني صاحب البلد، حتى أقرب من البار، ألاحظ الجميع يمسك هواتفه النقال، فأحمد الله إنني نسيت في السيارة، ولكنني احتفظت بالولاعة، في حالة ظهور فتاة " ممكن تولعلي " الأسطورية، أشعر أنني بدأت أفكر مثل سيدنا عماد بالضبط أقف قريباً من البار وليس أمامه، أدير ظهري له وأفكر، ماذا سأطلب من البار؟

أعطي ظهري له وأنظر إلى الحفل واسترق السمع على ماذا يُقبل الحاضرون كنت أعرف بصفتي مشاهد جيد للأفلام الأجنبية بعض الأنواع.. لكننا نحتاج إلى تصويت لمعرفة من الفائز، والرأي هو رأي الجماهير في النهاية " أسعد، أسعد "

صوت حريمي، بالطبع ليس نوع خمرة ولكن اسم النادل، هناك اثنان على البار " كوبا ليبرا "

البداية غير مطمئنة " ماسمعتش عن أم المشروب دة "

" فودكا وتلج "

" سمبوكا "

" تكيلا "

" فودكا يا أسعد "

" سكوتش "

" فودكا "

" موخيتو "

" 2 تكيلا يا أسعد "

" موخيتو "

أنظر إلى الفراغ ثم أحدث نفسي

"ما حدث يطلب بيرة، ويسكي، حاجة أعرفها، هي الفودكا الحاجة الوحيدة اللي أعرفها

طب وبعدين، الفودكا ثقيلة على ما أسمع، ومش عايز أعمل فضيحة وأقعد أكح زي الأفلام العربي القديمة لما يقولوا لحد أشرب، جرّب وكدة، أعمل إيه، طب أروح أقوله بيرة، طب افرض سألني بيرة نوعها إيه وأنا ما أعرفش غير الستيلا، أومال أروح أقوله عايز فوخيتو، بص ياد يا خالد، مابديهاش، فودكا وآخده وأتمشى على جنب وأروح لاطعه ونشوف اللي حيحصل، التضحية أول المجد "

أقف خمس ثوان، نفس عميق، ثم ألتفت مرة واحدة وأتجه ناحية البار، فينظر إليّ هذا الأسعد الشقي بابتسامة، فأقف بثبات أمامه، عيني في عيناه

"بيبسي دايت"

" تحت أمرك يا فندم "

أخذ الكانز وأبتعد، التردد سمة العباقرة أفتح وأبدأ في الشرب متخيلاً أنني أسكر

" بتشربي إيه يا حلوة "

ألتفت إلى عماد

" اللي لقيته في الكشك "

" طب كويس إن قلبك جامد إنك تروح تطلب أساساً "

" لاا .. الراجل كان متعاون جداً "

" بس ليه طلبت حاجة ثقيله كدة ؟ أنا كنت أفضل تاخذها واحدة واحدة "

" عيب عليك، أنا ضارب اثنين فانتا إمبارح "

" وعملت بببي على روحك بالليل ؟ "

" مش مهم طول ما فيه مشمع "

أرفع العلبة لأشرب فيأخذها من على فمي

" ما تملاش بطنك ميه عشان تعرف تتغدا يا بابا "

ويذهب إلى سلة مهملات ضخمة ويلقيها فيها بعنف

" يلا نروح نشرب زي الناس "

أنظر له وأنا ما زلت رافع يدي على وضع الشرب ولكن بيد خالية

" اللي تقول عليه، بش يا ريت حاجة من غير ريحه عشان مروح بيتنا "

ينظر إليّ بشيء من قرف

" روح هات الكانز من الزبالة طيب "

" خلاص يا عم، أنت بتقلب ليه "

نتمشى ناحية البار، أجعله يتقدم خطوة، ويتقدم هو بثبات

" بتحب الليمون ؟ "

" جداً، لو بالنعناع كمان يبقي هائل "

يصل إلى البار دون الاهتمام بكلامي

" 2 مارجرينا "

" أكيد يا أفندم "

ينظر إليّ ويبتسم ابتسامة غير مفهومة بالنسبة إليّ، بدأت أشعر بالقلق

" تنبسط "

" بس خلينا ننبسط على ركن "

" ليه بس ؟ "

" عشان السمعة، أنا ماعيش غيرها "

" ماشي يا عم "

يقاطعنا البارمان

"enjoy "

ويضع الكؤوس أمامنا، شكلهما مختلفين عن باقي الكؤوس، أقرب إلى الأفلام العربي القديمة

أخذ كأسي ونمشي سويًا، أتذكر حديث تحريم الخمر، عن لعن حامله،

" آدينا أهو بنتلعن من قبل ما نشربه حتى "

نظر إليّ نظرة متفهمة وقاطع حبل أفكاري

" اقطع فكرة الحلال والحرام، ومدام قررت تعمل الغلط، استمتع وبعد كدة اعمل اللي

في دماغك "

" على رأيك "

ثم استطرد في اهتمام

" أي توجيهات أو نصائح لطريقة الشرب "

" ارفع الكاس لبوقك واشرب، بس بالراحة "

" ما أخذوش وان شوط "

" وان شوط !..... بس يلا "

أنظر إلى الكاس، ثم أنظر إلى من حولي، الجميع يشرب باستمتاع وبهجة، فلماذا أقوم

بدور الحذر، أنظر إلى الكأس ثم إلى عماد الذي بدأ في تجرع الكأس الخاص به

أمسك الكأس أرفعه إلى فمي، ورشفة كبيرة بعض الشيء

تغيرت تعبيرات وجهي ... أجمل تعبير عن روعة المذاق، لأول مرة يلتقي هذان
العضوان في جسم إنسان واحد، الحاجب والذقن
" إيه دة يا عماد، دة أمي بتغسل بيه الحوض "
" طب شوفت من أول كاس ابتديت تشوف الحقيقة، أمك طلعت بتسكر وبترمي بقيت
الإزارة في الحوض عشان ما تعرفوش "
أخذ رشفة كبيرة أخرى وأنظر له
" إيه يا عم دة "
وأنظر إلى الكأس ثم أرفعه كله مرة واحدة
" إيه يا عم دة "
" أنت علقت "
" إيه دة يا عم، أنا حاسس إنني اتخमित "
" ليه، عشان الكاس صغير ؟ "
" لا يا عم، الساسبينس باظ، توقعت تجربة فريدة، دة كدة حوض فريدة "
" أجيب لك تاني ؟ "
" لا يا عم شوفلي حاجة تانية تبقي مسكرة، لكن جو مطهر الجروح دة بلاش "
" يبقى ارجع اشرب فانتا تاني "
" والنبي يا عماد ما تفصلني وروح شوف حاجة كويسة لحسن ضميري حيصحي من
المزارة "
" لا ما دام كدة خليك واقف مكانك دقيقة، إحنا ما صدقنا "
يذهب ناحية البار، بينما أقف أنا وأحدق في المدعوين، المشروب لم يكن بهذا السوء
ولكن إحساس أنك ترتكب ذنب يجب أن يقابله لذة لكي تقضي عليه، في الحالة التي

به إن لم يجد مكافأة للفسق، فسيكون هناك الكثير من عذاب الضمير " أخلص يا عماد "

يعود مرة أخرى ويحمل كأسين ويعطني كأس به شرائح ليمون

" ليمون تاني يا عماد، هو أنا عندي برد !"

" مش أنت اللي قلت بتحب الليمون "

" تروح مطلع ليمون أمي من الأرض "

" لا دة أحلى .. جربه بس، دة موخيتو... "

" بلا موخيتو بلا شوفيتو، أنت ليه مُصّر إني بحب الحمام، أنا خايف المرة الجاية بدل

التلج ألاقيك جايبلي سداة الحوض "

أنظر له وهو يضحك وأشير له على الكأس الآخر

" إيه التاني اللي معاك دة "

" دي فودكا "

أخذ الكأس من يده

" أنا حعمل فيها روسي وأنت سلك الحوض بتاعك "

" بس دي مش مسكرة "

" محدش قال إني جاي أشرب قصب يا عماد ما تفصلنيش "

شيء من العصبية في كلامي، وهو ينظر ويضحك

أمسك الكوب الصغير وأنظر له

" وما فيهوش تلج ليه ؟"

" هو سفن أب، اشرب بس ربنا يهديك "

" يا رب "

وأشرب نصف الكأس، وأنظر له

" إيه يا عم دة بس الله يخرّب بيتك "

وأشرب باقي الكأس واضعه في يده

" روح يا عم شوف لي حاجة تانية الله لا يسينك "

يضحك وينظر إلي

" يا عم مينفعش، كفاية كدة "

" يا عم أخلص و "

يقاطعني ويشاور لي وهو يفتح عينيه على آخرها

" هسسسسسس، وطى صوتك شوية "

أرد عليه بصوت خافت

" هو أنا صوتي عالي؟ "

" فحت "

" دا سُكر ولا طاقة سلبية مكبوتة؟ "

" تقريباً سُكر طلع الطاقة السلبية المكبوتة "

" آآه، طيب روح هاتلي حاجة تانية "

" يا عم أنت مهيس "

" طيب مش فارقة أخلص وهاتلي حاجة هادية "

" طيب خليك مكانك ما تتحركش "

" أنا ثابت يا عم الناس هي اللي بتتحرك "

يذهب وأبدأ في النظر إلى الجموع الغفيرة، لا أستطيع التركيز، وأشعر إنني اهتز

قليلاً، يجب أن أبقى على ثباتي، وإلا سينتهي الأمر إلى مشهد " الناس كالتيرا ليه،

هو النهاردة إيبويه "

أبتسم بدون داعي لا أعرف لماذا، وأشعر "بزغزة" خفيفة لا أعرف أين صراحة

يعود حاملاً زجاجة لونها زاهي يعطيها إلي

" إيه دي "

يمسك يدي ويشدني، لا أعرف لماذا ؟

" أنت بتشدني ليه يا عماد الدين "

" تعالى نقعد جوة شوية "

" مع عبد الله الدين "

يشدني ونمشي وهو يرد

" آه "

" ينفع يبقى أنا كمان خالد الدين ؟ "

" نبقى نروح الشهر العقاري ونغير الأسمي "

وهو يشدني نمر جنب مجموعة فتيات تقف في منتصفهم فتاة شقراء جميلة وتنظر

إليّ

" ودي صافيناز الدين ؟ "

" ابقى روح اسألها "

" ومعاها نجلاء الدين، وشكيناز الدين ؟ "

" آه "

" عماد الدين "

" نعم "

" أنت شكلك عايز تسب لي الدين "

" لما نقعد عشر مرات "

في الداخل الجميع يضحك بصوت عالي، ليس العدد كبير ولكن الصوت عالي جداً،

يجعلني أجلس على كرسي فوتيه كبير جداً

" أنت عارف يا عماد الدين اللي ببسب الدين بيحصله إيه "

" إيه "

" وحياة دين أمي ما أعرف "

واشروع في الضحك فيعطيني الزجاجة، تقريبا لكي أصمت
أمسك الزجاجة وأستكمل الشرب، وأنظر إلى نفس الشقراء، لا، إنها واحدة أخرى،
الكثير من الشقراوات، مصر ليست شعب أشقر، هل هذا آثار الغزو الروسي، تباً
لجورباتشوف، أسقط الإتحاد السوفيتي، على من الدور، الإتحاد السكندري،
" بس دة نادي ودة نادي تاني خالص "

أبدأ في الكلام بصوت عالي بينما عماد يعود مرة أخرى إلى الحديقة
" هو شكله زعل، يا ريت بس ما يكونش راح يجيب أصحابه وجايين يضربوني "
أنظر إلى الشقراء. لا إنه أشقر،
" أوكرانيا صح ؟ "

لا ينظر إلي، لماذا يحتقرني الجميع ؟ لا أعلم، حتى ذلك الشاب الذي لا أعرفه، وهو
من جنسية أخرى، أو قد يكون قد صبغ شعره، ولكن لماذا يصبغ شعره
" الباشا Gay ؟ "

يلتفت إلي وشابة صغيرة الحجم تقف معه وينظران إلي باستغراب
" لا مش جاي، ممكن يكون جاي من الناحية الثانية "
وأضحك

" في إيه، أنا مش أنا خالص، وهما هما، بس هما مش عارفين إن أنا اللي معاهم
مش أنا "

يعود عماد وحيداً
" اهدأ كدة شوية وحنمشي "

" ليه أنا عملت حاجة ؟ "

" شوية وحتعمل "

" دول كاسين بس "

" كتير "

" هو الكاس الثاني اللي بوظني، أنا طماع، كنت رضيت بالشوخيتو وخلص"
" آه، أنت جحش"

" دة معناه إني مش حشرب تاني يا عماد "

" فانتا على سفن دة آخرك "

" طب تراهمني أروح للبار وأجيب لك اللي أنت عايزه "

" لا يا عم مش عايز حاجة "

" بس لو جبت اللي أنت عايزه حشربه هو واللي أنا عايزه "

" أنا ما راهنتش على حاجة "

" طيب أنا رايح "

وأقف مرة أخرى

" طيب "

فيشد يدي مرة واحدة فأسقط جالسًا على الكرسي مرة أخرى

" طيب "

وينظر إليّ وهو يضحك، لا أعلم لماذا شكل ضحكته اختلف ؟

" هو أنت سنائك كبيرة ليه قوي كدة يا عماد الدين ؟ "

" ما أعرفش "

" كانت عادية من شوية، أنت رُحت غسلتها ؟ "

" آه "

" ليه بس ؟ عشان لما تبتسم سنائك تلمع فالحرير تجري عليك "

" آه "

" طب كنت قلت لي كنت جبت المعجون معايا "

" المرة الجاية، المهم أنت مبسوط ؟ "

" حسألني وأرد عليك "

" طيب كويس "

ويستطرد ..

"بكرة القعدة عندي في البيت"

" أوبالال هو في بكرة كمان "

" آه "

" طب مش كنت تقول لي عشان أجيب قميص كمان من محل التوحيد في النوع "

" لما تروّح ابقى دور "

" وأنا ينفع أروّح "

" أكيد "

" إيه دة، أُمال فين الحريم؟ "

" بكرة "

" في السريع كدة ؟ "

" آه "

" كويس، هات سيجارة "

يخرج العبلة من يده ثم يعطني سيجارة ويشعلها لي

" حاسب بس لا تلسع نفسك ولا تخرم هدومك "

" كويس أنك قلت لي، ما تخافش أنا مركز "

" متأكد؟ "

" آه وابقى ركز أنت كمان معايا، زيادة تركيز "

" طيب، بس أنت سكرت بسرعة كدة إزاي "

" كان عندي الدافع "

" اللي هو إيه إن شاء الله؟ "

" مو مو مو موتيفيت "

" طب أوعى تتكلم إنجليزي هنا "

" عشان سكرت بسرعة ولا عشان الموتيفيت "

" عشان خاطر النبي "

" طيب يا عم، استعر من ابن حتتك "

تعلو وجهه ابتسامة اندهاش، واضح إنه مستمتع بيا

" طيب روح اقعد يا عماد الدين مع عبد الله الدين، وابقى تعالى كمان شوية "

" أنا عايز أعمل كدة بس أخاف لأسيبك تعمل فضيحة "

" لا روح عيب يا عم، وأنت مصاحب عويل ولا إيه، أنا مسيطر "

" طب عشر دقائق وأرجع لك "

" براحتك يا أسطي أنا مش حتحرك من هنا "

" قشطة "

يتوجه مرة أخرى للخارج، بينما أجلس وحيداً

ألتفت فتكون المفاجأة، بار آخر صغير به بارمان آخر

" حلو قوي، أجيب حاجة تسليني "

أجد نفسي أستطيع التركيز قليلاً، فأجمع نفسي وأقف وأتوجه إليه بجرأة غير طبيعية

لأذهب إلى البار، البارمان شاب يبدو أنيقاً، أسمر اللون ويرتدي حُلة أنيقة، على

عكس هاواي في الخارج

" مساء الخير "

" مساء النور يا أفندم "

" هاتلي واحد "

" واحد إيه يا أفندم "

" واحد صاحبي "

وأضحك ضحكة صغيرة وأظل أنظر له وأبدأ في النظر إلى الزجاجات المختلفة الملونة

" أنا عايز أشرب حاجة نادرة شوية عشان تمشي معايا"

" أنا ممكن أعمل لحضرتك

" مش عايز ليمون وحياة خالتك يا شيخ"

أقاطعه بصوت خافت

"بص هو الأخضر اللي في الإزارة دي "

" أبسينث "

" يعني مش ليمون"

" لا يا أفندم ما فيهوش ليمون "

" دة كويس دة ؟ "

" بس قوي جدًا يا أفندم"

" يعني حيزربني، هاته نشوف آخره إيه"

" اللي تؤمر بيه يا أفندم"

مهندس كيمياء ليس مجرد بار مان، يظل يصنع تجربته الفنية وفي النهاية يعطيني

الكأس الكبير بابتسامة صفراء

" اتفضل يا أفندم"

" تُشكر يا حليوة"

أخذ الكأس وأمشي حتى الكرسي أضع الكأس على المنضدة وأرمي نفسي على

الكرسي

أنظر لأجد فتاة تمر من أمامي ترتدي أحلي فستان قصير رأيته تلك الليلة، شعرها لا

أعرف لونه ولكنها طويلة بسيقان بيضاء كالرخام

" رحاب الدين "

تنظر إلي باستغراب وترد

" أفندم ؟!!"

" استأذن حضرتك في سيجارة "

تبتسم وتمد يدها في حقيبتها الأرجوانية الأنيقة، أنا لا أعرف لونها ولا أعرف اللون

الأرجواني كيف يبدو، ولكن، ولكن

تعطيني السيجارة بأدب وابتسامة اندهاش

" ممكن تولعيلي "

تضحك ضحكة صغيرة عذبة وهي تخرج القداحة وتقول بمزاح

" مش المفروض أنا اللي أقول كدة ؟ "

" لا بعد الشر، التانيين بيبقوا لابسين ملايات لف "

تضحك وهي تشعل السيجارة لي في مشهد لا أفهم حتى الآن .. كم أنا جريء فيه!

" حاجة تانية يا سعادة الباشا "

" إيه باشا دي، اسمي خالد بيه بس، ما تعمليش تكليف "

تبتسم

" حاجة تانية يا خالد بيه "

" والنبي أنا حطيت الكاس الأخضر دة على الطرابيزة، بس ما أعرفش ليه الطرابيزة

بعدت، ممكن تدهوني ودي آخر حاجة أطلبها منك "

تضحك وتمسك الكأس وتستنشق رائحة الكأس

" دا أبسينث ؟ "

" آه "

" أنت أول مرة تشربه ؟ "

" دة أنا مالي التلاجة منه، ما تقوليش كدة "

تضحك

" أنت اسمك إيه ؟ "

" هادية "

" لا واضح ماشا الله "

" معلى أنا معايا ناس "

" معاكي فين ؟ "

" برة أصحابي يعني "

" أوه سوري، سلميلي عليهم كثير جدًا "

تبتسم

" أكيد "

" وميرسي على التلاتين ثانية اللي قعدتهم معايا دول، يو ميك مي داي "

تضحك

" أنت ظريف قوي "

ابتسم كأى شاب سيكسي

" وأنت أجمل حاجة شوفتها النهاردة "

تقف وتبتسم

" بعد إذلك "

أرفع الكأس

" إنجوي "

تشير ناحيتي

"you too "

وهي تبتعد أقول لها

" حشوفك تاني "

تشير لي بيدها وهي تضحك، وبينما أتابعها وهي تسير إلى الخارج، أجد عماد يقف

ويضحك

وأرفع له الكأس كتحية وأشرع أن أرفعه إلى فمي، وقبل أن يلمس شفتي أجده يصل
عندي ويمسكه من يدي بهدوء ويسحب الكأس

" في إيه يا عم "

يشم الكأس وينظر إليّ باستغراب

" أنت جبته منين يالا ؟ "

" أسكت مش طلع في كُشك جوة كمان يا عم "

" أنت عارف دة إيه ؟ "

" آبسینٹ يا عم، أمي بتدعك بيه الصحون "

يضحك

" أنت لو كنت شربته، ما كانش ينفع ترّوح، دة لو روّحت أساساً "

" ليه هو أقوى من القودكا ؟ "

" القودكا بالنسبة له عصير مكس شوكلاتة، دة أنا ما بشربوش "

" يااااه، أنا اتاغبيت قوي، طب إديني أدوق بؤ صغير "

" خد بس أكثر من بؤ على مسئوليتك، حسيبك ترّوح لوحديك "

أخذ رشفة صغيرة، لا أشعر بأي طعم

" وسط المعمة اللي شربتها دي مش عارف أستطعم حاجة "

" أنت شربت كاسين و أزازة ID "

" بالنسبة لمبتديء إيه "

" لا كتير صراحة يا خالد الدين "

" طب يلا بينا "

نقف ونمشي

" أسيبك 10 دقائق، أرجع ألاقي معاك هادية وآبسینٹ "

" أنت تعرفها ؟ "

أفكر للحظة فيما وراء الكلمة، " فهمت "، بالطبع فهمت، وعرفت وشعرت وفعلت وتفاعلت، قد يكون مجرد كأسين لشخص مبتدئ، لا شر منهم و لا خير، و لكن بالنسبة لي، كأسين فقط جعلوني أفعل ما لم أكن أستطيع فعله في حياتي، لو كنت بعقلي في تلك الحفلة لحاولت اجتناب الناس لعلمي أن عالمي غير عالمهم، وإنني لا أعلم شيء وأجهل عن كيف يعيشون في تلك القصور، ربما كانت دفعتي للرحيل أو الاختباء، وتجنب الحديث معهم خوفاً من أن ينكشف سري فيعلمون أين أنا من خرائطهم، وكنت كذلك حتى شربت فقط كأسين، بعدها أصبحت أمشي كواحد منهم، أقف على البار غير مبالي وأختار ما بين أنواع الخمر التي أجهلها، بدلاً من الوقوف ساعة لطلب كولا دايت، وأن أتحدث إلى أجمل من وقعت عيني عليها في الحفلة وكأني أعرفها وبكل جرأة وجسارة، في حين أن الواقع إنني كنت أخجل من شراء خبز من أم عبير في باب الشعرية، لأن عبير " غمزتلي " في إحدى المرات مع العلم أن عماد أكثر أنوثة منها، بالطبع فهمت أنني قد فاتني الكثير، وأن كأس فودكا واحد في زمن آخر قد يمكن أن يجعلني أذهب وأخطف نادية من بين أهلها، وإن ما لم أجره هو خسارة غير محسوبة لمكسب غير مفهوم..

" فهمت يا عماد "

" كويس "

" إيه الخطوة الجاية ؟ "

" مفيش خطوات، أنت اللي بتحدد حتعمل إيه، احتمال تبقى في حفلة بكرة أو في خلال الأسبوع اللي جاي عندي في البيت، حتيجي أو مش حتيجي دة براحتك، حتدمن خمرة ، حتشرب حشيش حتنام مع نسوان، مش بتاعتي، أنت اللي تختار تقدر تشيل إيه، عشان ما تلومش بعد كدة غير نفسك "

" فاهم يا عماد .. ما تفصلنيش "

" أنا بقولك عشان تبقي عارف، وما تجيش تقول لي في لحظة ندم، أنت اللي عملت
كدة فياً، أنت جبنتي من على باب الجامع لباب الخمارة"

"خلاص يا وحش أنت فتحت"

" ماشي "

" المهم "

" إيه "

" أنا عايز أشوف هادية "

" أوبالاء، أنت الكاسين لسة لاعبين بيك "

" الوحيدة اللي عجبنتي وكلمتها وكلمتي "

" يا عم براحتك، هي كدة كدة مش فارق معاها ولا أنا فارق معايا "

" إزاي مش فارق معاها "

" هي متجوزة أساساً "

" طب مش تقول يا عم، خلاص "

" خلاص إيه "

" مش متجوزة "

" آه بس جوزها مسافر وهي طلبت الطلاق، وهي مش في دماغه "

ويستطرد..

" بس بنت ناس جداً، يعني لو حبيت تعلقها حتجيب اللي وراك واللي قدامك، حاول

تكون عملي، خد اللي أنت عايزه من غير ما تورط نفسك "

" اللي أنا عايزه ؟؟؟!! "

" السرير "

" دة وش "

" طبعا، نجاح أي صداقة مبني على وضوح الرؤية ما بين الطرفين "

" كلام عنب جدًا، يعني لما أكلها بدل ما أقول لها أنا بحب في الست قوة شخصيتها
وثقتها في نفسها، أقول لها أنا بعشق المرأة في وضع الكلب "

" دة أنت تبقي ابن كلب "

يضحك هو ضحكة قصيرة بينما أنفجر أنا، يبدو إنني مازالت تحت التأثير، يتحدث
وهو يبتسم

" مش كدة يا عم، بس ماتدخلش دخلة حب ولا ترغي كتير في حاجات مالهاش
لازمة، حتضطر تخرج وتصرف وأنت اللي خسران، لو قتلتك يلا تبقي يلا "

" دي كدة عايزة إزازة "

"خلينا مانسبقتش الأحداث، شوفها ولو مانفعتش وأنت عايز تجرب الموضوع
والسلام، حرشقك مع واحدة مش عايزة غير الكلام دة "

" أنا حاسس إن المواضيع بتجري بسرعة وأنا مش مستعد "

" مش مستعد من أنهي إتجاه "

" يعني أشرب وأخذها الأوضة وبعدين آجي أقلع قدامها تلاقي البوكسر عليه علامة
التفخيد والنوم، والفانلة عليها علامة الهلال والنجمة الذهبية "

" والشراب عليه علامة صح بالمقلوب ومكتوب عليه (نايتي) "

" والجزمة (أديباس) "

" دي علي الأقل حتتف عليك "

" ويبقى عندها حق "

"خلينا نبص للجانب المضيء، بكرة أجازة أنزل أعمل شوبنج محترم "

" تيجي معايا "

" أكيد مش فاضي لك، بس عارف H&M "

" طبعًا "

" طب مدام عارفه ماتجيبش منه ليه يا حيوان "

" ما أحبش أضيع فلوسي عل...."

" أخرس خالص، ما أسمعش صوتك "

" طيب "

" تسحب 2000 جنيه مثلاً وتنزل تجيب من عنده كل حاجة، وأنا حكلمك لو في

حاجة جديدة بكرة "

" ماشي يا عم الشيخ "

" المهم أنت كويس دلوقتي "

" شغال "

" طيب يلا "

يقف ويقوم هو بدفع الحساب ونركب السيارة ونستكمل إلى ميدان رمسيس لينزل بي

في نفس النقطة المعتادة

" ما ينفعش تنزلني عند البيت "

" تحب كمان أركن لك جنب السرير، أنزل يلا أنت زي الفل "

" ماشي، سلام "

" سلام "

أنزل وأبدا في السير، أتمشى بصورة طبيعية ليست هناك أي مشكلة، العقبة الوحيدة

هي التركيز، ولكن السير إلى منزلك كعادة يومية لا تحتاجها،

وصلت إلى المنزل، لحظة المعاناة كانت في إخراج المفتاح وفتح الباب، الوقت متأخر،

فتحت الباب، أمي وأختي نائمتين على عكس المتوقع ليوم الخميس، لا أعرف الساعة

ولا أبالي بها كثيراً، أدخل إلى غرفتي، أخلع ملابسني وأقوم بتعليقها كالعادة، آخذ وقتاً

أكثر من المعتاد،

أرمي جسدي على السرير، تلك المرة لن آخذ كثيراً من الوقت في تأمل السقف،

جسدي يستقر في منتصف السرير، عيني تدور كالخفاش مرتين في الغرفة، عقلي
يدور مرتين حول مركز الوعي، ثم يغوص الجميع فجأة في الظلام الحالك
وأختفي

الفصل العاشر

خطيئة البشر المفضلة

رسالة

أعلم أن كل رسائلي تصلك

فلماذا لا تردين ؟

أعلم أنه ليس الوقت

وليس الظرف

ولكن رُدِّي ولو بكلمة

أنتظرک

أنتظرک

أنتظرک

" أنت مش رايح الشغل النهاردة ولا إيه يا خالد؟ "

صوت أمي يأتي من جهة باب غرفتي

" لا يا ماما سهرت إمبراح فحاخذ النهاردة أجازة "

" كويس يا حبيبي استريحلك شوية "

وتخرج من الغرفة إلي دورتها اليومية المنزلية،

صداع بسيط، أشعر بالتعب، لا أستطيع أن أرفع رأسي من فوق الوسادة، أو أن أتقلب

على السرير، ماذا أتذكر من البارحة

ليس مهم وليس الآن، سوف أستكمل النوم وعندما أستيقظ ،،،،، سوف أستيقظ

أخرج إلى الصالة لأجد كوب شاي وبجانبه بعض البسكوت، ما أعظم الأخوة، أجلس
وأشغل التلفاز وأنظر له، ثم أبدأ في شرب الشاي لأجد سامية تأتي وهي تحمل كوب

الشاي الخاص بها وتجلس

" هي ماما فين؟ "

" نزلت تجيب طلبات "

" وأنتِ ما نزلتيش معاها ليه؟ "

" ليه عايز تجيب حريم كثير "

" آه ورجالة كمان "

" أنا توقعت كدة برضو "

" أنا خارج كمان شوية "

" فين؟ "

" رايح أجيب هدوم "

" لوحدك؟ "

" أكيد "

" كان نفسي أروح معاك، أنا كمان خارجة "

" رائحة تجيبي هدوم "

" آه حجيب دستة بوكسرات مقلمة "

" طب هاتيلي معاكي "

" ما أنت رايح أهوه زي الشاطر لوحدك "

" ماشي "

" رايحة أزور أخت وحيد وبعد كدة حخدها ونروح لواحدة جارتنا "

" أووووه، Girls Night "

" آه، تيجي يا سوزي؟ "

" لا شكرًا يا أختي "

نجلس لنحتسي الشاي وأجلس قليلاً نشاهد مسرحية قديمة لا أتذكر اسمها ولا أركز كثيراً لكي أضحك

" أمك شكلها حنتأخر، أنا حروح أشوف بوكسراتي "

" بدري كدة "

" آه وأجي بدري "

" طيب "

كل ردودها توحى بالقلق مما أنا مقبل عليه، ستكون ظهري فيجب أن أحافظ على

مساعدها لي، أدخل الغرفة وأرتدي ملابسني وأستعد للنزول،

أتوجه إلى الصالة، لأجدها تشاهد المسرحية باهتمام

" أنا نازل، إبقي قولني لماما ابنك راح ينضف "

" ما تتأخرش عشان هي حتيجي وحتروح بعد كدة لأم سحر "

" سحر على أمها، ماشي، سلام "

" سلام "

أنزل كأنني متجه إلى العمل، الروتين أسلوب حياة، نفس طريقة المشي نفس

المواصلات، إلى أن أتوجه إلى ذلك ال إتش أند إم، أغلب الأمر كنت أدخل أي محل

وحدني لأشتري أول شيء يأتي " على المقاس"، أذفع وأخرج، لكن تلك المرة لأن

هناك هدف فأخذت ثلاثة ساعات منذ دخولي المحل إلى خروجي منه، كنت أشاهد

صور الموديل الملتصقة على كل حائط، وأبدأ في شراء المكونات كاملة، حتى لو قفاز

أو كوفية.

كنت في غاية السعادة والشعور بالترف مما دفعني ولأول مرة منذ خمسة عشر عاماً،

أركب تاكسي على حسابي، لأعود للمنزل

أصل ولأن التاكسي من الصعب أن يدخل الشارع، أمشي حتى أصل إلى البيت، أدخل الشقة لا أحد بالمنزل، أدخل غرفتي وأضع كنوزي برفق في الدولاب، أخرج هاتفي وأتصل بعماد، لا أعرف لماذا

" الهاتف الذي تحاول الاتصال به خارج"

لم أكن أريد منه أن يرد على أي حال من الأحوال، فقد تعبت من رحلة البحث عن ابن الناس في المتاجر، المرة القادمة سأكون النجم

استكمل يومي بشكل روتيني، تلفاز وكوب قهوة تلك المرة، تأتي سامية ثم أمي،

استعرض آخر خطوط الموضة متابعًا لحظات انبهار " إن ابن الكلب طلع قرشين من جيبه يبر بيهم نفسه"

نسهر ونأكل ونشاهد التلفاز،

كمبيوتر،

سرير،

بخخخخخ

الجمعة

استيقظ قبل الصلاة بفترة وجيزة

أدخل إلى الحمام أتوضأ بهدوء، أسمع صوت أمي وأختي يلعبان سويًا في المطبخ

أرتدي ملابسني وأقرر النزول إلى الصلاة مبكرًا

أصل إلى الجامع الصغير أدخل والامام يصعد إلى المنبر، بالطبع المسجد خاوي، لا

أحد يأتي إلى الصلاة مبكرًا، رغم أن جوهر الصلاة يقع في الخطبة، ليست قصر صلاة

الظهر إلى ركعتين، هذا الديسكاوند لم يكن الغرض نهائيًا،

لكنني صراحة لا ألوم أحد، فذلك الملل الذي أصاب الناس من رتابة وروتينية خطب

الجمعة، يجعل الناس في غير اهتمام بالخطبة، لا أحد يبالي، يمكن لأي شخص بعد

أقيموا الصلاة

السلام عليكم ورحمة الله وبركاته

" يا جماعة مش لاقى شبشبي، لونو تركواز في أصفر ومكتوب عليه زيكو، محدش شافه ؟ "

كل واحد بيدور على شبشبه

باب المسجد

" بعشرة جنيه البطيخة الحمرا، اشترى يا بيه العسل "

أوراق دعاية لمحلات صيانة المراكب الفضائية والأطباق الطائرة
وبينما أمشي يرن الهاتف..... عماد

" أيوة يا عم نسيتني إمبراح "

" أنساك يا سلام، أنساك دة كلام "

" أوباللا، شكلها لعلت جامد إمبراح "

" ولا حاجة يا ابني "

" وايه الكلام النهاردة، تعرف تيجي البيت "

" طبعا وأنا عويل ولا إيه "

" ماشي يا دكر "

" بس بدري وأمشي بدري يا ريت "

" متقلقش، تعالى على 8 وأمشي زي ما أنت حابب "

" قشطة يا عم الاختيارات "

" المهم فاكرو البيت "

" طبعا يا أوسطي، أوصل وأكلمك أعرف فين الشقة "

" يا أوسطي، لا ركز النهاردة، الليلة عايزة شوية مجهود معنا "

" عيب عليك، الأناقة، الشباب، والتقل صنعة وأنا صنايعي "

" آه أنا حاسس "

" طب خلاص 8 قدام بيتك "

" مستنيك "

" سلام "

" سلام "

أعود إلى البيت، أشعر أنني لم أصبح نفسي، أصبحت شابًا آخر باهتمامات أخرى، كنت في الماضي، أنظر إلى المراهقين الذين يدخنون السجاير و " يمشوا مع حريم " أنهم باعوا أنفسهم للفتاهات والهبل، وأن أميرتي تنتظرني، فلم أكن تافهًا ولا الأميرة انتظرت، لم أكسب شيئًا، ولكنني خسرت أجمل أيام حياتي في التكبر على ممارسة أخطاء المراهقة العادية، كان من الممكن أن أشرب ما أشربه و أفعل ما أفعله، دون أن أفقد احترامي لنفسي، تبا للأصنام التي صنعتها وأخذت أعبدها حتى ملت وتحركت الأصنام وتركتني، فاجعة هي حياتي السابقة، أما الآن فأنا أحاول الاستمتاع، أفعل الخطأ و أنا أعرف أنه خطأ لست مُغيَّبًا، لن أقول أن كل الناس تفعل ذلك فلماذا أنا لا، بل أنا أخطيء لأنني أريد وأتحمل المسؤولية كلها، هكذا يكون الرجل، ولكن ذلك السؤال الذي يخيفني، إلى متى؟ الأصل كان هو أن أفعل ذلك بحثًا عن الإيمان، أن أذهب إلى اليسار ليدلني على اليمين، هل كانت تلك هي الخدعة؟ حتى الآن لم أجد أي علامة أو أي شيء، لعنني والسبب الأرجح هو أنني لازلت في بداية الطريق، أنا لا أعلم شيء، ولن تعيدني ليلة كحول إلى ما تركته سنوات، مازال أمامي ميل لأسيره ثم أحدد إلى أين يأخذني، مازال أمامي الطريق طويل

أعود إلى البيت، كالعادة، لا أحد يأتي من العائلة ليزورنا منذ فترة، أمي تصنع الغذاء وستذهب مساء إلى إحدى الجارات في المنطقة مع باقي " نسوان " المنطقة، الساعة السادسة أذهب لكي أرثدي ملابس جديدة، الداخلية والخارجية، سامية تنظر إلي نظرة لست أفهمها، ولكن إن دلت على شيء دلت على الغضب..

" رايح فين يا خالد؟ "

" منندى الفلاح "

" اللي عند عماد؟ "

" أيون "

" وآخرتها إيه؟ "

" شوية وهو حيسافر وأرجع أنا إلى ما كنت عليه "

" ولو ما سافرش؟ "

" حازهق وأرجع للي كنت عليه "

" ولو ما زهقتش؟ "

" يبقي فلوسي حتخلص "

" خالد، أنا عايزة أعرف دلوقتي أنت بتفكر في إيه؟ "

" بفكر أعيش حياتي شوية، أغير الكآبة والروتين اللي أنا عليه، وأنت عارفة أنا

تقريبًا ما ليش صحاب، وجاتلي فرصة من السما عشان أخرج من القمقم اللي أنا كنت

عايش فيه "

" أولا السما ما بترميش زبالة، والقمقم دة أنت اللي عملته بأفكارك الزبالة عن

البشر "

قالت تلك الجملة الأخيرة بحدة وغضب

أنظر إليها وأتحدث بهدوء

" أنا كنت بحافظ على احترامي لنفسى وبحافظ على سمعتك يا سامية "

" ودلوقتي وأنا متجوزة مش عايز تحافظ على سمعتي، ولا سمعتك عشان أنت كمان

تتجوز واحدة محترمة زيك؟ "

وترفع سبابتها ناحيتي بشيء من العصبية

" أنت كنت بتحافظ على صورتك أنت بس يا خالد، أنت عمرك ما فكرت غير في نفسك وفي صورتك قدام الناس "

أنظر إليها باندهاش

" في إيه يا سامية، أنت مالك النهاردة ؟ "

" مالي إني شايفة أخويا بيبوظ على كبر، دلوقتي اللي بقيت حكيم وشايف الدنيا وعايز تجربها، في الوقت اللي مفروض تكون فيه عقلت وهديت "

" أنا يا سامية كبير وعارف أنا بعمل إيه "

" أنت بتمثل، أنت طول عمرك اللي أمني بتقول لك عليه بتعمله من غير نقاش، يعني أنا لو روحت قتلها وهي زعقت لك، حتنسى عماد دة من حياتك "

استفزتني تلك الجملة الأخيرة

" سامية، أنا مش عايز أتخانق معاك ولا أزعل منك، روعي شوفي أنت بتعملي إيه واعمليه "

" يعني مش خايف أقول لماما، بقيت كبير دلوقتي ؟ "

" سامية، أنت بتتحولي، أنا مش عارف العصبية دي ليه ؟ أنت قاعدة شوية وراجعة بيتك، مش الشوية اللي حتقديهم تخسرنا بعض فيهم "

" يعني ممكن تخسرني عشان عماد بتاعك دة ؟..... "

أقاطعها

" لا طبعا أنا قصدي... "

تقاطعني هي تلك المرة وهي تمسك يدي

" خلاص النهاردة آخر مرة تروح له "

تنظر إلى عيني والشرار يتطاير منها، لن أستطيع أن أعدةا بشيء لن أفعله، ولكن

يجب أن تهدأ، على الأقل حتى لا تُجن وتخبر أمني

أمسك يدها بهدوء..

" طب اديني شهر "

" ولا يوم يا خالد "

" أنا عارف أنك خايفة عليا بس إديني وقتي "

عينيها تحمر

" خالد "

" معلش يا سامية "

" لا "

بدأ صوتها يعلو، فأمسكت يديها الاثنتين بعصبية

" بصي يا سامية، أنا قلت لك إديني شهر عشان خاطر ما أزعلكيش، أنا ممكن أسيبك

تقولي لأمك وأعمل برضو اللي أنا عايزه، بس عشان أنتِ أختي، بقول لك أنا حعمل

إيه "

تشد يدها وتفلتها من يدي

" وكبرت وقلبك مات أهوه "

تتركني وتذهب إلى باب الغرفة ثم تلتفت ...

" غووور مطرح ما أنت حابب، بس بقك ما يتفتحش لحد ما أنا كمان أغوور من

البيت دة، مش عايزة أسمع صوتك "

وتخرج وعينيها قد بدأت في الدموع

لا أعلم ماذا حدث، هل يمكن أن تكون قد رأت نهاية الطريق، وأنني سأذهب بلا

عودة، بدأت تشككني في نفسي بعد أن كنت قد اتفقت داخلياً على استكمال الرحلة،

استكمل ملابسي وأذهب إلى الباب لأجدها في الشرفة، أفكر للحظة أن أصلحها، ولكن

لا، ليس الآن، أتوجه إلى الباب وأنزل

المواصلات إلى هناك ليس بسهولة، ولكن الأمر يستحق المجازفة والتعب، بالطبع أنزل

مبكراً حتى أركب أتوبيس نقل عام، بالطبع ليس غرضاً في التوفير، ولكن " عشان

أقف فالهدوم متكرمش " أعلم بأي حال من الأحوال إنني سأعود بتاكسي " يعني
فيها خراب بيوت" ولكنني تعهدت بأن أستمتع بكل لحظة في حياتي، كنت قد وضعت
ميزانية جيدة للاستمتاع داخلها مصاريف ملابس، خرجات، مواصلات، وحين تنتهي
الميزانية سأقول لعماد " السلام عليكم" فبأي حال من يضيع " تحويشة العمر " في
تجربة، لا يستحق أن يستكمل هذا العمر، ليت سامية تدخل إلى دماغي لتفهم، ولتشعر
بالأمان، الذي لا أشعر به أنا شخصيًا، أنا مقتنع ولكنني لست مقتنع
ساعة ونصف حتى أصل إلى هناك، أنزل أمام المنطقة التي قد كان أشار إليها أنها
بيته، كان هناك أكثر من شيء يذكرني بها، محطة أتوبيس ولوحة إعلانية مميزة،
أطلب عماد، لا يرد أول مكالمتين، في المرة الثالثة يرد
" خوليو "

" خوليو،،،، متلم نفسك "

" لازم يكون ليك اسم دلع، أقولك يا خالوود يعني! خوليو حلو "

" بلاش خوليو، في إحياءات "

" أو مال أقولك إيه قدام الناس "

" أبو دنيا "

" أبو أمك أحسن "

" بس أنا أمي ما اسمهاش دنيا "

" بس يلا، أنا إيه اللي بيخليني أكمل معاك في الهرس دة، هي خوليو "

" شكلك حتسلمني للثري العربي صديقك، خوليو خوليو "

" طيب أنت فين ؟ "

يشرح لي المنزل الذي لم يكن صعبًا أبدًا، فيلا صغيرة دورين لها مدخلين مما يدل أنها
مقسومة على اثنين من الملاك، أدخل التي على اليمين، البوابة مفتوحة، جنينة

صغيرة وبوابة أيضاً، ولكنها أنيقة، أدخل حتى باب القفلة ذاته، لا أسمع صوت حفلة حتى يفتح الباب لأجد عماد وأصوات أخرى بالداخل

" هي مالها الدنيا هادية كدة "

" دي مش حفلة دي قعدة "

أنظر خلف ظهره لأجد كثير من الدخان

" دي غرزة قصدك "

" whatever، خش "

ديكور حديث، سلم للدور الثاني الموجودين لا يتعدون الخمس عشر شخصاً، ينظر إليّ الجميع حين أدخل، أعتقد أنهم مجموعة تأتي دائماً مما يجعلهم ينظرون إلى الوافد الجديد،

" يا جماعة دة خالد صاحبي، أكيد شوفتوه معايا كذا مرة قبل كدة "

ينظرون إلى بعضهم البعض يقول " هاي خالد " وآخرون يرفعون كؤوسهم أو سجايرهم تحية لي، فأرد التحية برفع يدي وابتسامة خفيفة، حتى يقاطع عماد

" you can call him kholio "

بصوت هامس

" اتلم يا ابن الخوليو أنت "

" البار هناك، معديش بار مان، دلّع نفسك "

يتركني ويصعد إلى الطابق الأعلى، لا أجد أحد أعرفه من الحفلة السابقة، وبالطبع ليس هادية،

أذهب إلى البار وأنظر إلى الزجاجات، وبينما أعبر طريقي أشم رائحة الحشيش تملأ المكان، أي طفل في الخامسة من العمر يعرف رائحته التي تشبه البخور، لست أبداً مهتماً بتجربته، لا أعرف لماذا، لعل لأنه ليس قانونياً، بالطبع أمزح، لكنني أجده

أنسب للسانقين والصنایعیة، ولاد الناس بیشریوا خمرة وبیأخدوا حبوب هلوسة،
بالطبع لیس الترمادول،

بالطبع كلما أحاول إقناع نفسي به هو هبل وهرتلة، مغیبات العقل باختلاف أنواعها لا
تختلف شیء، سوى حجم الأعراض الجانبیة ومدى توافرها، لكن لعل لأنني بطبیعتي
" ألیط " فأرى نفسي رشدي أباطة، خمر وسجائر ونسوان، فقط

كالعادة أنظر ما بین الزجاجات في حیره، لیس هناك أسعد أو أتعس أو أشهب لعمل
الكوكتیل، جانب البار أجد ثلاجة صغيرة بها زجاجات بیره، أريد أن أبدأ الأول بشيء
جميل، الأسامي مألوفة جميعها، بالطبع جلست على جوجل لأعرف جميع أنواع
المشروبات بنسب الكحول حتى لا يشعر أحد بجهلي، أجد زجاجة فودكا شفافة عليها
إقبال شديد، فیتبقى في الزجاجة ربعها، أقف بكل ما أملك من تناكة، وأضع الكثير من
الثلج لتخفيف حدتها، أملاً الكأس إلى ما یقرب من ثلاث أرباعه، ابتسم للموجودین
وأذهب إلى السلم، أصعد إلى أعلي لأجد باقي المدعوین، ردهة یتفرع منها ممرین
وفي الواجهة شرفة بواجهة جنوبیة، لهذا لم أرهم وأنا أدخل إلى القیلا، دیکور أنیق
وتصمیم ساذج، أجد عماد في الشرفة مع عبد الصمد الأوكراني، ومعه صدیقة واضح
أنها خلیجیة أيضاً بالنظر إلى سماكة حواجبها وشعرها الناعم الطویل، یقابلني الثلاثة
بنفس الابتسامة المصطنعة، أتوجه إلى عبدالله

" حبیبي "

" خالد، إزیک یا باشا "

" الحمد لله، أنت عامل إیه "

" مبسوط طبعاً، شفتك مرتین في یومین "

یضحك على المنافقة الصغیره الساذجة

" دي أختي، سمر "

" هاي إزیک "

" هاي خوليو "

" مبسوط إني شفتك "

" أكيد و أنا كمان "

أشعر بالفخر بنفسي جدًا " ماشي أوزع نفاق والناس مبسوفة وزى الفل، للدرجة

دي أنا كنت سكسي وأنا مش عارف "

يقاطعني عماد

" أنت أجازة بكرة "

" آه، لحد دلوقتي محدش كلمني وقاللي في حاجة تستدعي أنزل "

سمر تتكلم

" أنت بتشتغل إيه "

" محاسب "

" شغلانة رخمة جدًا "

" قصدك إن أنا رخم يعني؟ "

تضحك

" لا مش قصدي، بس التعامل مع الأرقام والإكسل حاجة مش ظريفة خالص "

" أكيد، شغلانة مش سكسي خالص "

تبتسم مرة أخرى

" أكيد "

يستكمل عماد

" بنفكر نروح السخنة بكرة صد رد كدة، ماتيجي "

" حتسافروا امتي؟ "

ينظر إليّ عبد الله

" تمانية تسعة حاجة كدة "

" طب حكلمك بدري وأقولك، عشان احتمال يبقي عندي مشوار كدة"

عبد الله

" مشوار إيه يا عم، نفض وتعالى "

" أكيد أنا نفسي أنفض لأمه بس نعمل إيه بقى، عائليات "

" لا لو عائليات روح طبعًا "

" بدري حقولكوا، أو لو جالي تليفون دلوقتي أكيد حقول "

سمر

" يا ريت، عايزين نكون جروب كويس كدة"

سفر، الميزانية مكنش فيها سفر، أساسا هي كان إمتى فيها سفر أساسا؟ آخر مرة سافرت كان مع أمي مرسى مطروح وكان من خمسة وأربعين سنة، وآخر مرة شفت البحر كان في جرد محلات إسكندرية، وشفته من شباك العربية بس كمان، الحياة بقى ليها لون تاني

عماد

" أنت يا عم مالي كاسك وشايفنا ماسكين كوبايات فاضية، طب اعزم"

" ما أنت المفروض تعمل بار تحت وفوق، الخدمة مش قد كدة خالص، ولا إيه يا

سمر"

تضحك

" آه فعلاً يا عماد إيه دة؟"

" قوليله حاجة، يسيب حتى إزازه بيرة فوق "

تضحك هي وعبد الله، أشعر بكم كبير من السذاجة في الهواء الليلة

" طب احنا نازلين يا خوليو "

" وأنا حصلكوا من البلكونة "

عماد

" تستئينا ولا تيجي معانا يا سمر "

" لا أنا نازلة "

أتركهم وأنظر من الشرفة التي تطل على حديقة في منتصف العمران الذي يطوقها، لقد بدأ يذوب الثلج، أبدأ في تجربة عملية الشرب مرة أخرى، آخذ رشفة كبيرة، ليس مر أو حلو، أحاول أن أستمتع به، أو أقنع نفسي بأنه جميل، ملأت الكوب كثيرًا حتى لا أضطر أنزل مرة أخرى، أصنع مشهد سينمائي مشهور وأنا أسند على سور الشرفة ماسكًا كوب الخمر وأحرق في الفضاء، ليستكمل المشهد السينمائي بصوت من جانبي " مش شايفه أبسينث يعني "

ألتفت، بنصف رأسي بطريقة سينمائية، بالطبع هادية

" ما أنا قايلك عندي في التلاجة كثير، حيبقي برة و جوة ؟ "

تبتسم ابتسامة لطيفة جدًا على قلب أي رجل بالغ، ترتدي بنطلون جينز و بلوزة بيضاء لا أركز في المكتوب عليها بالأحمر، وأحمر شفاه قوي، إذا أردت في شرح تفاصيلها فسأحتاج إلى كتابة رواية أخرى، واضح أنها تهتم بتفاصيل التفاصيل، أعشق الفتاة التي تستغل كل إمكانيتها لعرض مواهبها بصورة غير مبتذلة، لا تظهر أي شيء ولكن تجعلك تريد أن تلتهمها، على عكس سمر التي كانت ترتدي ملابس أنيقة، ولكنها تمتلك ما لم تملكه أفروديت في كارتون مازنجر، طالما هي في الغرفة مهما حاولت أن تنظر في مكان آخر عينك تلاحقهما، أفضل بالطبع ستايل هادية " عاملة إيه "

" كويسة، وأنت "

" أنا أكيد مبسوط "

" ليه ؟ "

" عشان شفتك تاني "

" بكاش "

" هو مين يشوف القمر وما ينبسطش "
" لو أنا قمر في كواكب ونجوم تحت في الحفلة "
" الكواكب والنجوم كتير، لكن أنا زي الأرض، ما ليش غير قمر واحد اللي في سمايا
"

تنظر إلى الكوب

" هو دة الكاس رقم كام "
" والنعمة أول واحد "
" أو مال أنت كدة لوحذك "
" من قبل أي خمرة أو كاس "

تبتسم

" أنت بتشتغل إيه "

إيه حكاية السؤال دة الليلة، أنا كدة جاي معرض توظيف

" محاسب "

" اممممممم "

" اممممممم دي كويسة ولا وحشة "

" مملة ممكن "

" أكيد أرقام وريبورتات وإكسيل "

" واللي بيشتغلها تحس إنه ممل "

" أكيد سنيل ورخم ودمه واقف "

تضحك

" أنت زياط كدة وبتقول أي كلام "

" بهزر عادي "

" متجوز؟ "

" ولا خاطب "

" ليه ؟ "

" ملقتش فتاة أحلامي "

" ودي عاملة إزاي وأنا يمكن أدور معاك عليها "

" حلوة زي نادية لطفي، رقيقة زي مريم فخر الدين، هادية زي فاتن حمامة، ظريفة

زي زينات صدقي "

" ودي حتجيبها ألوان منين دي "

" ما عشان كدة ما اتجوزتش "

" طب ما تدور على نسخة حديثة "

" اللي هيا إزاي "

" حلوة زي هايفة، رقيقة زي نانسي، هادية زي زينة، ظريفة زي مي عز الدين "

" وأقعد بقية حياتي أتعالج من ارتجاع في المريء "

" يععع "

" أو مال اللي أنت بتقوليه دة إيه، دة قمة اليعع "

" عندك حق "

تبتسم

" أنا بحب الأفلام القديمة أكثر من الجديد "

" وأنا كمان، كانت المشاعر خام، لسه مابقيتش مصطنعة "

" حكيم يا إخواني "

أبتسم ببلاهة

" أنت عارفة أنك بتقولني يا إخواني زي شويكار "

تبتسم وتهز رأسها بالنفي

" وأنت عارف أنك جايب على عادل أدهم "

تقاطعي

" لو قلت لي يا قطة حسيبك وأنزل "

" لا طبعا، يا كلبة "

تضحك وهي تنظر إليّ باندهاش

" أنت أخذت عليا قوي ولا إيه "

" لا يا أفندم أكيد لا، أنا بزيط بس "

تضحك لحظة ونسكت

" طب أنت عارف أنا متجوزة ولا لا "

أنظر إليها بتركيز لدقيقة، وعيني تنظر إليها من رأسها إلى قدميها، كأنني أحللها، مما شد انتباهها

أشير بأصبعي ناحيتها متقمصا دور شارلوك هولمز

" أنت متجوزة أكيد، بس واضح أنك مش سعيدة في جوازك "

ينعقد جبينها لحظة

" وأنت إيه اللي عرفك كدة ؟ "

أنظر إليها بنفس الاهتمام، وبنظرات متفحصة

" أصل في حاجة واضحة جدا بتبين دة "

تنظر باهتمام

" إيه هي "

ابتسم في بلاهة

" سألت عماد وهو قالي الصراحة "

تنفجر بالضحك وتنظر إلي

" أنت مصيبة "

" تشكرات تشكرات أفندينا "

ثم تبتسم للحظة

" بس عماد إزاي يقولك حاجة زي كدة ؟"

" عماد صاحبي جدًا، وأنا سألته بعد الحفلة وهو قالي "

أنظر إليها واستطرد

" أنا كان ممكن أعمل عبيط وما أقولش حاجة، بس أنا صريح وواضح "

" ودي حاجة أحترمها "

" طبعًا الصداقة أو المعرفة، لازم تكون واضحة ويكون كل واحد عارف هو عايز من

التاني إيه "

" كلام صح أكيد "

أميل ناحيتها

" أعتبر نفسي معرفة ولا صداقة بالنسبة ليكي "

تبتسم

" اممممممممممممممممممممم "

" إيه "

" معرفة داخلة على صداقة "

" ودي أجمل منطقة يحب يكون فيها أي شخص، خفيف كدة يجي ويروح "

تبتسم

" أنت مسخرة "

" شكرًا يا أفندم "

نشرب ما بين أيدينا، ونسكت للحظات

" عماد بيقول لي إنهم احتمال يسافروا بكرة العين السخنة، أنت رايحة ؟"

" ما أعرفش، ممكن .. ليه أنت رايح ؟"

" احتمال "

تنظر إلي بابتسامة مغرية

" ولو أنا رايحة أنت حتيجي ليه ؟ عشان تبقى صداقة !"

" لا طبعا "

واستطرد ..

" أنت قلت معرفة داخله على صداقة، داخله دي مش عاجباني، فعايز اسنترها شوية

"

تبتسم

" خلاص رايحة "

" وأنا رايح "

تبتسم ابتسامة غامضة

" بس يا رب تكون بتعرف تسنتر "

أنظر إليها وأغمز بعيني كأني سرسجي

" وبجيب إخوان كمان "

تضحك وهي تضع يدها على شفتها، وعلى هذا المشهد، يدخل عماد

" إيه يا دودو، أنت اتعرفت على خوليو الكوميدي "

" إيه دة، أنت دلحك خوليو "

" ما حصلش، دة هو الوحيد اللي بيقولني كدة "

" أو مال دلحك إيه "

" قولي لي يا ببيبي "

تضحك هي وعماد وأنا معهم، ونتحدث ثم يأتي عبد الله وأخته وبعض الأصدقاء،

أمضي معهم ساعتين وأرحل بعد أن أخبر عماد إنني سأذهب معهم، ونتفق على

الزمان والمكان، هم سيذهبون أولاً، ثم بعد ذلك أذهب أنا وعماد، وأتفق معي عماد

على كل شيء، لم تكن التكلفة كبيرة، نظرًا لأنهم يمتلكون الشاليه الذي سنذهب إليه،

لم تكن هناك تكلفة سوى إنني سأشتري 300 زجاجة بيرة قلت لعماد أن يبتاعهم
بالنيابة عني

أرحل وأركب سيارة أجرة، إلى البيت
لحسن الحظ كنت أشتريت بعض ملابس " روضة " و أشتريت مايوه لا أعرف لماذا،
ربما لأنني لم أملكه من قبل، نزول المصايف العامة في مصر لا يحتاج إلى مايوه
أساساً

ولكن ها هي الفرصة لكي أجرب كل شيء
كانت سامية قد نامت هي وأمي، أعددت ملابسني في الدولاب ودخلت للنوم،

غداً، كم أنا سعيد بك

صوت المنبه...

أغلقه، ثلاثين ثانية من الهدوء وأبدأ في الاستيقاظ، السادسة والنصف صباحاً،
لكنه يوم مختلف

أستيقظ بكل نشاط، كأنني سألعب نهائي كأس العالم

أخرج ملابسني، أمي تأتي تجدني أعدها

" إيه دة ؟، أنت رايح فين ؟ "

" مسافر مع زميلي في الشغل، حنروح السخنة يوم ونيجي "

" والشغل "

" إيه ماله ؟، حيقفلوا عشان أخذنا أجازة ؟ "

" لا مش قصدي، سافر وانبسط، دة أنا ما صدقت "

" ماشي يا حاجة "

" وحتسافر إزاي "

" بالعربيات "

" خليهم يخلوا بالهم من السكة وبلاش سرعة "

طبيعي أي أم

" لا ما تخافيش يا حاجة دي ناس هادية وفيهم ناس بدقون "

" طمنتيني يا ابني "

على أساس إن الذقن تمنع السرعة، أو ضد قانون نيوتن الأول

استكمل ترتيب ملابسي

اللعة

لا يوجد شنطة تليق بمحاسب من مدينة نصر يعمل في شركة كبيرة،

الهاتف

صوت محشرج

" ألو "

" صباح الخير يا عم عماد "

" إيه البديري دة "

" أصلي كنت بحضر الساندوتشات فقولت أشوفك عايز حاجة معينة، ساندوتش مش،

شقة مفتقة، كبسولة رنجة "

" عايز إيه يا بني آدم على الصبح "

" حقابلك إمتي يا عم أنت ؟ "

" تسعة، حعدي عليك "

" أخلاق أخلاق أخلاق "

" لا أنا عايز أجيب حاجة فقولت بالمرّة أعدي عليك "

" برضو أخلاق أخلاق أخلاق "

" ماشي "

" بقولك "

" إيه "

" عايزك تجيب لي معاك شنطة "

" لا، هات حاجتك "

" ماشي، أنا قولت بس بدل ما أدخل عليهم بشنطة محلات الإيمان والملحد، بس أنت

شكلك عايز كدة "

" تصدق إن أنا غلطان "

" ما أنا عارف "

" حجيب لك حاضر "

" لونها إيه؟ "

" تبييت تبييت تبييت "

قفل الخط، لم أفعل معه ما أريد

أنظر خلفي، سامية تمر من الطرقة إلى الحمام، ترمقني بطرف عينيها في غضب

واضح، لا أعرف ماذا أفعل معها

أفطر، ثم أجلس قليلاً وأستعد نفسياً، أخذ دش جيد، الليلة قد تكون ليلة تاريخية

أضع ملابسي في كيس وأنزل،

نفس المكان، تلك المرة كان يرتدي ملابس رياضية زاهية، وأنا أيضاً

" يعني يوم ما أحس أنك ابن ناس، تجي لي شايل هدومك في كيس "

" يا عم أنت مش جايب الشنطة؟ "

وأنا أركب وأضرب عيني في السيارة، لأجد شنطة سوداء

" ما هي يا عم الشنطة سودا وجميلة "

" ماشي يا سيدي، ناسي حاجة "

" لا إن شاء الله مش ناسي "

" طيب "

يقود عائداً من حيث أتى إلي طريق العين السخنة

" ها .. مين جاي ؟ "

" أنا وأنت وعبد الله "

ويسكت

" أوقفف استني يا عماد، دة عيد ميلاد أمي النهاردة، لف ورجعني والنبي "

ينظر إلي مبتسماً

" وهادية "

" وإحنا الثلاثة !!! "

" وسمر وهيام "

" طيب خلاص كمل، لما أرجع أبقى أجيب لها قميص نوم زركشة من عند التوحيد

والنوم "

" وأنت أمك يا خالد ليها عيد ميلاد "

" أيوة طبعاً يا عم أنت بتهزر ليها وعيد ميلاد كبير "

" دة اللي هو النهاردة "

" عارف يوم تعامد الشمس على تمثال إخناتون في معرض الكرنك "

" معرض..... الكرنك معرض "

" عارفه يا عم؟؟؟ "

" آه يعني "

" أهي أمي بتتعامد معاه "

" ليه أمك اسمها إيه "

" رشا - تون "

" صاحبة عبد الله أكثر "

" آه قول كدة "

نسكت ثلاثين ثانية هذه المرة هو من يتكلم

" خالد "

" أيوة يا عماد بيه "

" أنا حنام مع سمر "

" ليه هي بتخاف تنام لوحدها "

" وحنام معاك على الصحراوي في السكة "

" كان نفسي، بس التبول اللا إرادي مبهدلني "

" كويس إنك قلت لي عشان أقول لهادية "

" بس ركبت محبس ألوميتال منظم كل حاجة دلوقتي "

" استريحت "

اسكت

" عبد الله حينام مع هيام، وأنت حتنام مع أخته، وهادية صعبانة عليا، حتقعد لوحدها "

" "

ينظر إلي وهو يبتسم

" تحب لما أخلص أجيلك "

" شكلها كدة يا عماد، بدايتها بسكلتة "

يضحك و ينظر إلي وهو يرتدي نظارة الشمس

" أنت عايز إيه يا خالد "

ألتفت وأجلس تجاهه

" عماد كلمني عن الجنس "

" الجنس جميل "

" أنا مابقولش كلمني عن ابوك "

" أنت عايز تعرف إيه "

" إيه اللي عايز أعرف إيه، عايز أعرف كل حاجة "

" زي إيه "

" مش عايز يا عم أنت حتحقفلني ليه، يا رتني كنت جبت كتاب ب اتنين جنيه من

العتبة كنت بقيت زي الفل "

" كتاب إيه دة سلاح التلميذ "

" كيف تمارس الجنس مع فتاتين في ليلة واحدة "

" دة كدة جروب ليسبيانز "

" ما أنت مش لازم أقولك فصلي، كلمني عن الجنس، دة سؤال عام "

" قصدك تعمل إيه النهاردة، لو أخذت البت الأوضة "

" أيوة، اتفضل "

" بص يا سيدي "

" هاه "

" البنت محتاجة الرجل اللي يحسسها إنه راجلها "

ارفع صوتي

" إيه يا أسامة، إيه يا أسامة يا منير، ما تقولي حسسها بأنوثتها وملسلها على

شعرها وأقولها شايفة البحر شو كبير "

يضحك

" ما أنا مش عارف أقولك إيه، بص أنت مش داخل على واحدة بنت بنوت، هي

حتعمل وأنت اتفرج "

" البق دة محسني إنني في الآخر حنام مع عبد الله "

أعود للنظر أمامي وأشرد

" أبو شكك، بوظتلي الليلة "

يضحك وهو ينظر إلي وأنا " قرفان "

" يا عم ما تكبرش الموضوع "

لا اتكلم

" طب بص، أنا حرسيك "

" اتفضل "

" الجنس لست مش زي الرجل، سخن كويس وكثير، حتبسطك، اقلبها وخش في الموضوع حتقرفك "

" وأنا المفروض أجمع اللي أنا قلتة دة "

" بص، شفت افلام ابيحه قبل كدا "

" سكس قصدك، طبعا "

" يا سلام عليك يا هارشهم "

" طبعا يا ابني، امال جايب كمبيوتر العب فيه حرب امبابة "

" طب ما انت وحش اهوه "

" عماد "

" ايه "

" انت بتزحلقتي في الحوار دا "

" اه صراحة "

" خلاص سيبني وأنا حتصرف "

" طب مكان من الاول "

" قلت اسنك يمكن يكون عندك جديد "

" ماشي يا سيدي "

ندخل علي طريق العين السخنة

" احنا قدامنا اد ايه ونبقي هناك "

" ساعة "

" طيب "

" مبسوط يا خالد "

" أكيد "

" تخيل ماكنتش سمعت كلامي، كان زمانك لابس طقم التوحيد والنوم وقاعد تحسب

الشركة اشترت كام لباس "

" خلاص يا عم، عرفنا، بلاش زيطة "

" ماشي يا عم، بس خليك فاكر أنت اللي بتعمله دة بتعمله ليه "

" فاكر "

" ضميرك وجعك بعد الخمرة "

" صراحة، تقريبا لا "

" تعتقد ليه؟ "

" مش عارف، أنت عارف؟ "

" ممكن ما أخذتس منها اللي أنت عايزه "

" ممكن "

اسكت لثانية

" مش عارف، أنا أنبسطت ، بس مش عارف ليه محستش بالندم "

" عشان إيمانك ضعيف، محتاج وقت "

" إيماني بإيه إن شاء الله "

" بالذنب "

" ذنب إيه "

" الذنب اللي يخليك تشعر بالندم، وتطلب الغفران "

" الناس كلها بتطلب الغفران "

" بتطلب ربنا يغفر لها لأسباب مالهاش علاقة بالايمان، طمعاً في رزق، أو لو أصابتهم

مصيبة، خوف من عقاب، لكن ندم على ذنب، مش أي حد يروح لربنا بيها "

" وأنا اللي مابعملش ولا حاجة في دول، حروح على دي علي طول "

" أنت فاهم كل حاجة، مش محتاج تضحك على نفسك "

" ماחדش بيعرف ضميره فيه إيه "

" قصدك ماחדش بيدور ضميره في إيه، دة أسوأ حاجة في الدنيا، أنك تواجه ضميرك

"

" ليه؟ ما أنت مواجهه "

" مين قال لك، أنا عايش حياتي أتفاداه "

" هو إيه ؟ الضمير !! "

" جرب صور نفسك فيديو أسبوع كامل في حياتك، في كل حاجة بتعملها، أكل شرب

معاملات سكر حريم صلاة، واتفرج بعد كدة عليه، حبيقي أسوأ فيلم رعب تشوفه في

الدنيا، وأكد مش حتكملة "

يخرج سيجارة ويشعلها

" أنت لو شفت نفسك بعينيك، حتتجنن أنك أنت بتعمل كدة "

" أنت مكبر الموضوع يا عماد "

" جرب اتفرج على نفسك وأنت بتتكلم مع حد، حتلاقي نفسك غير ما أنت شايفها "

يسكت لحظة

" أو مال أنت ليه فاكر يوم الحساب حنشوف حياتنا كلها بتمر من قدامنا، عشان تعرف

قد إيه أنت حقير يا خالد "

وينظر إلي

" أنت حقير يا خالد "

" وأنت ابن كلب يا عماد "

" شكرًا يا خالد "

نسكت ثانية، ثم نضحك سويًا

" بالمناسبة، أنا عامل حسابك وجايب condoms كثير يا عم، هيص "

" تشكر يا عرب "

" وجايبك Delay كمان "

" ايه delay دا "

" اسمه مبيفكر كش بأي حاجة "

" Delaaaaay "

" ايواااااا، ما انت شاطر اهوه "

" بس أنا مش محتاجو "

" ليه يا وحش "

" أصلي مش مستعجل على حاجة، أنا رجل صبور "

" انت كنت جربت قبل كدا "

" اتفرجت بس "

" خلي معاك يمكن تفرط منك ولا حاجة "

" تفرط "

" اه و المواضيع تبقي بسرعة "

" اه وممكن تخدني مخالفة "

" والقيك طالع من الاوضة معلق مخالفة على البرابريز "

" يا ريت تبقي في البرابريز مش حنة ثانية "

يضحك تلك المرة ضحكة عالية، ليست معتادة

" عجبتك يا خويا "

" آه صراحة، الميزة الوحيدة اللي فيك، أنك ساعات بتبقي كوميدي "

" سوق طيب خلينا نشوف آخرة المشي وراك فين يا عم الشيخ "

" إن شاء الله خير "

" منين دة ؟، اذا كنا رايعين نعط "

" يا ابني سكتي كلها مكسب "

" ما أنا شايف أهو، على الله المرحلة اللي بعديها تجيب عبد الله ينام معايا "

" عيب عليك، وأنا أضيع الفرصة دي على نفسي "

ابتسم، ويعطيني علبة سجاير

" خليها معاك "

" شكرًا "

نستكمل الرحلة، حتى نصل إلى هدفنا، قرية سياحية، أو منتجع، مش مهم نصل إلى

هناك، يقود داخلها حتى نصل إلى شاليهات أو فيلات، لا أهتم بالمسميات، المهم

المضمون،

" وصلنا "

" لا والله "

" يلا "

نمشي حاملين حقائبنا حتى نصل إلى الفيلا، " شكلها فيلا "

يرن الجرس، ثلاثين ثانية وتفتح الباب أفروديت " سمر " مرتدية " شورت حار "

فوق مايوه، إذا ارتدت نقاب فسيظل صدرها مزار سياحي لكل رواد البحر الأحمر

" هاي، اتأخرتوا ليه "

" سي خالد يا ستي، معلىش بقي "

يقبلها و يدخل، فتتنظر إلي

" ينفع كدة يا خوليو "

" معلى بقى؁ حعوضهاك "

أءل القىلا؁ أنىقة؁ بسىطة؁ جمىلة

" إءنا كنا لسة راءىءن البءر "

عماء يعطىها حقىبءىن كءار فى ىءه

" حطى الءاءة فى الءلاءة "

ءنظر ءاؤها

" واو "

ءأءهم وءسىر؁ ءقىقءىن ونسمع ضءكة؁ عبء الله والءءوة هىام ىنزلال السلم

" إىه ىا عم أنء وهوال ءأءىر ءة "

أرء ءلك المرءة

" معلى الءأءىر علىا "

هىام؁ " كءة عنءىنا اءنىن أفروءىء؁ بس المرءة ءى واءءة بىضا "

" هىام؁ أعرفك ءالء "

" أهلا وسهلا فىك "

أفروءىء من الشام؁

" ىا أهلا بىكى "

ءلك الاءءسامة البلهاء الءى ءءعل كل من ىصافءنى ىبءسم؁ سواء أراء أم لا

" ىلا بىنا على البءر "

ىضع ىءه على كءفاها وىنءلقان من الباب الأمامى للقىلا؁ أنظر إلى عماء

" هما إءواءنا أهل الشام عنءهم المقاس ءة؁ ولا هوال طالبها سبشىال اورءر "

" بفلوسه "

" على رأىك؁ معانولو كان قالى؁ كنىء نزلء ءبءلول واءءة من الموسكى ملعب نازلال

باءنىن Sand bag هءىة؁ ومكنءش ءءكلفه ءمس ءى "

ينظر إلي لحظة

" أنا واخذك مؤدب، ومكنش في الكونتركت اللي بينا أنك تبقي سافل "

" معرفتك طلعت الوسخ اللي جوايا "

يبتسم

ثم تظهر

ترتدي بكيني، القطعة العليا بيضاء والسفلي تركواز، ساحرة في كل شيء

ابتسامتي البلهاء

" إيه إيه إيه "

تبتسم باستغراب

" إيه "

" هو أنتِ إمتي مابتبقيش حلوة ؟ "

" كتير "

" يعني أنتِ ممكن تكوني دلوقتي كدة و مش حلوة "

تبتسم

" كفتجي "

" اللي أنتِ عايزاه "

" إزيك يا عماد "

كان هو يضع الشنط ويشعل سيجارة، وأتى حاملاً زجاجة بيرة، يسلم عليها وتقبله في

وجنتيه، " وأنا جاي أتفرج بس "

" إيه مش جايين البحر "

عماد يرد

" اسبقينا واحنا حنلبس ونجيلكوا "

أنظر لها

" آه روعي عشان عماد حيساعدني ألبس المايوه "

تبتسم بمرح وتضيف

" طيب..... ربنا يوفقك يا عماد "

وتذهب من نفس الطريق خلف مازنجر والأفروديتين

فأضيف وعيني تلاحقها

" ربنا يكرمك وأنت اللي تقلعهولي "

ينظر إلي رافعًا حاجبه

" أنت روحت مني خلاص "

" مش أنت اللي قلتيلي لازم تروح لأحمد الشيخ عشان ترجع للشيخ وعملتلي فيها

علي جمعة "

" أيوة بس أنت كدة رايح لطارق الشيخ بشغل البوابين اللي بتعمله دة يا بابا، امسك

نفسك، اتقل "

" حاضر "

يصطحبني إلى غرفة، ألبس المايوه المزركش مثل سجادة جدتي، وأنزل

دقيقة، وينزل هو الآخر

" واو، دا خوليو صاحبي اللي أتشرف بيه "

" يلا يا بابا "

لم يكن باب للأسف، لكنه باب البلكونة يطل على جنينة تطل على البحر، نأخذ آيس

بوكس به زجاجات بيرة، يضرب هواء البحر وجهي، أخرج زفير حرمان سنين من

لقاء البحر، مدفون كنت بين الفواتير والدفاتر والإكسل

" عماد "

" هاه "

" شكرًا على كل حاجة "

يبتسم

" العفو، متقولش كدة، أنا مستمتع بصدافتك يا خالد "

وينظر إليّ ونحن نسير

" أنت مسلي برضو "

" كويس إنك لقيت فيا حاجة كويسة "

يضحك ضحكة صغيرة

" مسخرة "

نسير ببطء كموج البحر الأحمر

" الحمد لله أنا الوحيد اللي معايا واحدة طبيعية بدل مرضعات الشيطان التانيين "

" بس يا ابني أنت، أنت لسه حتى ما أقنعتهاش بنفسك "

أقف وأوقفه، أفتح الآيس بوكس وأسحب زجاجة بيرة

" حقتنع "

وأفتحها وأشرب بينما هو يتحدث بصوت منخفض " أكيد بيشتمني ويشتم نفسه "

مازجر وأقروديت في البحر، سمر تنتظر عماد، هادية تتمد على كراسي البحر أو

كنب البحر "

أذهب إلى الكرسي الذي بجانبها وأجلس وأخرج زجاجة بيرة، أناولها إياها تنظر إلي

وتأخذها بابتسامة أجمل من البحر ذاته

" اتقل " صوت عماد داخلي يرن

أتمدد جانبها، بحر، سماء، بيرة ونساء، جنة الأرض التي تصحبك إلى جحيم الآخرة

لا أتحدث، أتركها حتى تفتتح الكلام

" ساكت ليه ؟ "

" بنبسط يا أخت هادية "

" مميم، سوري إني قطعت عليك انبساطك "

" وجودك جنبي عامل أساسي في الانبساط "

" زي البحر مثلاً ؟ "

" لا..... أقرب للبيرة "

" أو الآبسينث "

" خلاص بقى، أمي فضت التلاجة "

" وحطت مكانه إيه ؟ "

" عناب "

" مميم "

صوت البحر وصوتها يجعلاني أشعر بالنشوة أكثر سرعة من كؤوس الخمر التي
شربتها من قبل

" إيه أكثر حاجة بتبسّطك يا خوليو ؟ "

" مش عارف، أنا ما بنبسّطش بسهولة "

" ليه ؟ "

" شغلي وحياتي خلوني عملي زيادة عن اللزوم "

" يعني ما فيش حاجة بتبسّطك قوي ؟ "

" ما عنديش حاجة معينة، أنت إيه أكثر حاجة بتبسّطك "

" أنا !! "

إيه الاستعباط دة ؟ أي حد بيسألك سؤال بيبقى مستني تسأله نفس السؤال، حتعملي

مندهشة ! طب أنا حزيط

" آه، قولي لي إيه الحاجة اللي بتفجر جواكي الانبساط "

تفكر لثواني ...

" تصدق ! .. مافيش حاجة برضو "

" شفّتي! أدينا شبه بعض "

" ودي حاجة وحشة "

" أكيد أي حاجة تشاركها مع البكيني دة مش وحشة "

تضحك وتقوم من على الأريكة البحرية

" إيه أنت فهمتيني صح؟ "

ينعقد جبينها وتبتسم

" إزاي "

" حتديني البكيني "

تضحك

" مش دلوقتي "

وتنظر إلي

" أنا نازلة البحر "

" أنا قاعد شوية أستمتع بالجو "

"enjoy "

تبتعد وأنظر لها

" البت وقعت، وقعت، دي واقعة من زمان "

لن أنزل للسباحة، على الأقل ليس وجميعهم في البحر والواضح أن الجميع يسبح

بمهارة، أنا من مدرسة عوم الترع والمصارف

سجائر، زجاجة بيرة تانية، دغدغة العقل اللطيفة، هم في الماء أكثر من نصف ساعة

تخرج هي أول واحدة،

"إيه رايحة فين؟"

" الأوضة "

" تحبي آجي معاكي؟ "

تنظر إلي وتبتسم

" أنت شايف إيه ؟ "

أقف وأضع يدي بكل جرأة على كتفها

" ما عنديش أوبشن تاني "

نذهب إلى القفلا سوياً، نصعد إلى أعلي،

" حاخذ شاور وأجي لك "

" مستنيكي "

بدون زجاجتين البيرة، لك أن تعلم عزيزي القارئ أن هذا الموقف لأي شخص مقبل

على هذا الحدث، مثل انتظار نتيجة الثانوية العامة أمام الكمبيوتر على الإنترنت

وبجانبك أبيك يداعب شبشب الحمام كأنه قط صغير منتظر انتهاء كلمة " جاري

تحميل النتيجة "

لا أعرف ماذا عليّ أن أفعل، أخلع التي شيرت الذي ارتديه وأتمدد على السرير واضعاً

قدمًا على الأخرى عاري الصدر أنتظرها،

ماذا سأفعل؟

أخرجت هاتفني، أقوم بتشغيل مشغل الأغاني " ليستر يونج سيكون أنسب شيء لتلك

اللحظة، " I can't get it started "

أقف على الأغنية وأنتظرها

خطوات أقدام، تفتح الباب مرتدية فوطة الحمام البيضاء، شعرها مبلل كحورية خرجت

من البحر

تجلس على أول السرير تجفف شعرها بفوطة أخرى، هي اللحظة

أشغل الموسيقى، وهي تعطيني ظهرها، وأبدأ في تقبيل كتفها الأيمن، طعم لحمها مع

ماء البحر أطيب من أي شيء تذوقه فمي من قبل، حين تسمع الموسيقى تتهد تنهيدة

رضا وإعجاب، تترك الفوطة جانباً، ألمحها تغمض عينيها، فأبدأ في خلع الفوطة عنها

لتصبح جالسة كالتماثيل الرومانية القديمة، كذلك هي، لم تخلق من طين، بل صنعت

من عاج، انحناءات جسدها المثالية، جسدها البارد من الماء والبحر الذي كلما قبلت جزء منه ينفجر بالدفيء، عظامها التي تكاد تراها من لون جلدها الوردي، أنتقل من كتفها الأيمن إلى الأيسر وأنا أداعب ظهرها وأدلكه بخفة، تكاد من رقبتها أن تشعر أن جسدها من زجاج، تخاف أن تضغط عليه فينكسر، ثم أصعد إلى رقبتها فتحركها لتعطيك أكبر مساحة للتقبيل، أسمع آهة خفيفة تصدر من داخلها تنتهي قبل شفيتها، أقبل أذنها فتبتسم ابتسامة خفيفة وتحرك رأسها قليلاً بخفة لكي تبعد أذنها عن شفتي فأطاردها، فتعاود الابتسام، تلك المطاردة الأعذب في التاريخ، حتى تضحك وتلتفت إلي فأنظر إلى عينيها، ووجهها للحظة، ثم تقبل هي شفتي، فتقل ذلك اللهب الذي بداخلها إلى داخلي، انفجار دافئ داخلي، يدفن برود قلبي ويخرج البرد من عظامي المتهالكة، ليدب الشباب فيها مرة أخرى، لن أتذكر كم قبلة قبلتها، أمسكها بذراعي لتنام على ظهرها،
ثم ...

ينتهي الوعي

الفصل الحادي عشر
الجانب المظلم من القمر

ما زال هو يُرسل طمعًا في الإجابة
وما زالت هي لا ترد
والحياة لم تقف
لهذا لم يفقد هو الأمل
حتى الآن

الساعة الثامنة والنصف

مساء

أركب السيارة مع عماد في هدوء، بينما ينظر إلي مبتسمًا

" قولنا حنبي وأدينا بنينا السد العالي "

ويضحك وهو يعني

" إيه حاسس بآيه يا وحش "

" أنا سعيد جدًا بمعرفتك يا أستاذ عماد الدين "

" لا واضح، عملت إيه "

" عملت اللي ماعملوش أبويا وأبوك "

" اللي هو؟؟؟ "

" نمت مع واحدة حلوة "

ونفجر في الضحك كلانا

" لا يا عم أنا ماي حلوة "

" وأنا أمي رشا- تون، أكيد حلوة "

" بيت أم آتون يا عم "

يسكت للحظة لناخذ نفسنا من الضحك

" واستخدمت Delay "

" كان نفسي أرشه على الساعة والوقت "

" أوبا يا خوليو وأنت شاعر "

" شاعر بوساخة "

" وحاسس بياه دلوقتي "

" بعد الجنس؟ "

" أيوا، حاسس إنني عايز تاني "

" مش ندمان؟ "

" قالك الواحد بعد ما ياخذ اللي عايزه من الست بيحس بندم "

" وأنت حاسس بندم؟ "

" اللي قال الكلام دة بجم "

" يعني مش حاسس بالحرام "

" أكيد جوايا حاجة بتزن، بس شوية وحتسكت "

يسكت مركزا في القيادة الليلية إلى القاهرة

" قالك لازم عشان توصل للشيخ، تروح ناحية أحمد الشيخ، أدينا خرمننا أحمد

شخصياً "

" لما تفقد اللذة حتندم "

" مش عارف يا عماد "

" حوديك للشيخ ماتقلقش "

" أنا مش قلقان، إيه أقصى حاجة ممكن تحصل "

" ما فيش "

" بالظبط "

بدأت أخاف، لأنني أصبحت لا أخاف من شيء
ما اكتشفه داخلي أصعب مما كنت أتخيل
يقود إلى القاهرة ونعود كل منا إلى بيته وحياته
ولا شيء يصاحبني سوى الخوف،

من أنا ؟

من أصبحت ؟

لا أعرف ..

حقا لا أعرف

يمر شهر...

ويتغير الحال عن المعتاد

أصبحت أراه مرتين أو ثلاثة أسبوعيا، وأنام مع هادية كلما طلبتني، ارتدي ملابسني
كأنني متوجه إلى العمل، ولكن أذهب إليها من أجل سعادة لن أجدها في أي امرأة
أخرى

بعد أسبوع تسافر إلى زوجها مع أبيها لتسوية العلاقة، لتظهر غيرها، أيضا صديقة
أخرى لعماد، لم أصبح مدمنا لمخدرات أو خمر، بقدر عشقي لجسد المرأة
ويبدأ شعور القلب بالملل، لا ندم

مجرد ملل،

أعود إلى البيت كل يوم

لا أتحدث أنا وسامية التي قد مد زوجها الرحلة شهرا آخر

لعله هو أيضاً يخونها، لا أعرف ولا أحكم
الحياة والغريزة يتحدان في المثل

أذهب إلى عماد بعد شهر لنجلس في الشرفة، بكؤوس الفودكا
" إيه يا خالد، مالك يا ابني "

" مش عارف يا عماد، فعلا مش عارف "

" ما جربتش تستغفر من ذنب؟ "

" أنا مش حاسس بالذنب أساسا، أنا ميت يا عماد "

" لا أنت مش ميت، أنت بس مش هو دة الذنب اللي حيغيرك، أنت محتاج تفهم نفسك
أكثر "

" إن شاء الله "

يتركني ويدخل دقيقة ويعود مرة أخرى

" مش يمكن يا خالد أنت عايز حاجة تاني "

" بانجو "

" لا مفيش حاجة حتبسك من الحاجات دي، أنت أكيد لو جربتها حتعجبك وتدمنها،

لأنك بطبيعتك بتحاول أي حاجة لعادة بس مش أكثر "

" أمال إيه اللي ممكن يرجعني أو يغيرني تاني؟ "

" غير إن أنت تقرر من نفسك أنك تتغير، ودة طبعا الحل اللي فشلنا فيه قبل ما نروح

بعيد قوي زي دلوقتي، حاجة تخليك تقرر تتغير "

" كانت هادية غيرتني "

" هاديه اديتك حاجة غريزتك كانت عايزاها، مش أكثر، أنت عايز حاجة أكبر من

كدة "

" زي إيه يا عم الفالح "

يمد يده إلي وهو ضامم قبضة يده، ويفتحها لتظهر ورقة

أمد يدي، وأفتح الورقة

رقم هاتف ومن تحته اسم صاحب الرقم

" نادية "

الاندهاش يصفع وجهي بقوة

" أكيد، دة كان هدفك من الأول "

" بس إزاي "

" اللي أنت كنت فيه الفترة اللي فاتت دي كلها، هو اللي حيساعدك "

" أيوة دي واحدة منقبة، أقولها إيه رأي الشرع في الجماع بوضع الكلب "

" عشان أخلص القصة، لو هي لسة بتحبك حيحصل حوار، مين يشد مين فين، دي

مش بتاعتي "

نأظر له وأنا أجمع الكلام فيستطرد

" قبل كدة لما هي قالت لك أنا حضيع منك، قعدت تلطم واختفيت، دلوقتي أنت فاهم

حاجات كتير في الستات، وحنفضل وراها لحد ما تشوف، حتقولك نتجوز، ولا

حتسيبك كدة، كل الحالتين ممكن يغيروك "

" فهمتك "

وأنا أهز رأسي كيونس شلبي

" طيب أنا المفروض أكلها أقولها إيه "

" متكلمهاش وأنت فايق "

يرفع الكاس أمامي

" خلي الشيطان اللي يتكلم "

" مmmmmmm "

اسكت دقيقة

" هي الساعة كام؟ "

" سبعة ونص "

" أنا حنزل أكلها تحت "

" بس ما تتأخرش، في صديقة جاية على ثمانية ونص "

" تلفون وأمشي يا عم "

أنزل إلى الأسفل أملاً كوباً من الفودكا، بدون ماء أو ثلج، أشربه على أربع مرات

جاهز، احنا معانا طلقة واحدة، ولازم تصيب

أمسك هاتفك، الشحن ممتلئ، الرصيد يسمح بمكالمة لمدة يوم

أكشن

الرقم مشغول

مرة ثانية

كول تون أغنية للفنان المتدين سامي يونس

ولا مصطفى يونس، مش دة بتاع كرة باين

هو كان اسمه إيه

" السلام عليكم "

" وعليكم السلام ورحمة الله وبركاته "

" الو "

هي إيه لازمة الو والسلام عليكم مع بعض، واحدة فيهم كفاية، هي الو أصلها كان

هالو بس اعتبروا هالو طويلة شوية فاختصروها، حرف واحد طولها قوي كدا، إيه

الكسل دة، هما الامريكان أصلهم أفارقة، آااااه عشان كدة فيهم زونج زنود

كتير

" الو "

" الو "

" في إيه يا ابن المسروعة "

" كلمتها واديتني فرصة أقول اللي عندي، بس قلتلي 10 دقائق وأكلمك "

" كويس، دا معناه إنها حتسمعك "

" ماشي أقول إيه يا فالح "

" قول اللي عندك "

" وحياة أمك "

" ما تكلمهاش عن نفسك، كلمها عن نفسها "

" آه وأقول لها إن المستقبل مفتوح وإن الأفضل مستنيها، والأفضل دة اسمي الدلع "

" أنت شربت قد إيه فودكا "

" كوياية "

" عشان كدة مريل على نفسك "

" مريل مريل، إيه علاقته باللي بكلمك فيه دلوقت "

" بص لنفسك وأنت تعرف إيه علاقته "

أنظر إلى المرأة، نظيف وليس بي شيء، فالتفت له، فيستكمل

" أنت بتشرب فودكا، وهي بتشرب دين، بس في الآخر أنتم الاتنين عندكم مشاكل وعايزين تنسوها، لما قتلتك أنت فيك حاجة غلط صدقت على طول، نتيجة طبيعية للظروف اللي أنت فيها، وهي كمان، لو اخترعت لها مشكلة وهمية فيها هي حتصدق، مش لأن في مشكلة، بس الحالة اللي فيها حتخليها تصدق، طول ما محدش قالها بصي على المراية "

" أول مرة تبقى الريالة مفيدة "

يرن الهاتف

" طب إيه المشكلة اللي حقولها لها "

" قدامك نص ساعة وتروح، أنا حظبت الأوضة عشان الضيفة "

ويصعد، تاركني بمفردي

" الو "

" الو السلام عليكم "

تأني، الكلمتين مع بعض تأني

" أيوا يا نادية "

" ها يا خالد، اتفضل قول كل اللي عندك "

" أكيد "

أخذ نفساً طويلاً وأخرجه بتنهيده

" احنا حنتكلم على حقائق، أنا عمري ما حببت الف وال دوران، وأعتقد إنك عرفاني،

كان في يوم ما بينا حاجة، وكانت حاجة جميلة وبريئة، لكن ما اتكتبلهاش إنها تكمل

بسكتها الطبيعية، وافترقت الطرق وكل واحد راح في حته، وأنا عمري ما فكرت

أوصل لك طول ما أنت متجوزة، رغم إنني لسة جوايا حاجة، بغض النظر إن الحاجة

دي مالهاش أمل، بس فضلت جوايا، دلوقتي أنا مابقولكيش نرجع ونحب بعض ولا

أي حاجة، ولا أنا استاهلك حتى، كل اللي بقوله إن إحنا عندنا فرصة نبتدي صداقة

زي زمان، تجربة تجربتها، أنت صغيرة يا نادية، مش حتكملي حياتك لوحك أكيد،

وأكيد أنت دلوقتي بتموتي من الملل، أكيد في فراغ كبير في حياتك، وبيوسع كل يوم،

أنا مابقولش إنني حملاه، بس بقولك إديني 10 سنتيمتر في حياتك أكون فيهم

كصديق، مش أكثر، والمستقبل دة بتاع ربنا، إحنا مانعرفوش "

لعبة الملل، سلاح قاتل لو أمسكته، سأصطادها به

" وحتعمل إيه في الـ 10 سنتي دول يا عماد "

" حلكمك على الموبايل من فترة لتانية، أسمع صوتك وأطمئن عليك "

تصمت لثواني

" موبايل بس؟ "

أخرج وأتمشي لأركب سيارة أجرة، صرفت أكثر من الميزانية بشيء طفيف
أذهب إلى البيت كالعادة،
أدخل، لا أحد بالمنزل، حظي رائحة الخمر تفوح لدرجة أن سائق التاكسي كاد
يتقيئ على قدميه،
أدخل لأستحم، وأخرج إلى غرفة النوم، رسالة على الهاتف
نادية
" موبايل وبس "
" مش محتاج أكثر من كدة يا شربيات "
أرمي نفسي على السرير
XXXXXXXXXXXXXXXXXXXXX

أستيقظ وأذهب إلى العمل كالعادة، لم أعد نشيطاً كما كنت، إذا كنت نشيطاً أصلاً
قررت أن لا أحدثها لفترة ثلاثة أيام بلا حتى رسالة، اليوم الرابع، قررت أن أكلمها
أصنع كوباً من القهوة نظراً لعدم توافر الخمر، أجلس على السرير
نفس عميق، زفير بهدوء
اتصال
" الو "
" الو السلام عليكم "
" وعليكم السلام يا خالد "
" إزيك "
" الحمد لله "

" إيه فينك مش باينة "

" أهوه، في الدنيا "

" إحكي لي عن يومك يا نادية "

إذا أردت أن تشعر شخص بالملل، اجعله يتكلم عن حياته، الاستراتيجية أن نضخم حجم الملل في حياتها،

" مافيش عادي، عند ماما، في البيت في التجمع، بخرج أروح الدرس أو المقرأة "

" ماشاء الله "

" كدة عادي يوم واحدة طبيعية "

" مافكرتيش تشتغلي "

" قالولي إخوات جوزي أنزل المحل شوية، بس أنا رفضت، مابفهمش "

" بس حيقتل لك الفراغ الكبير اللي في حياتك "

" الحياة مش صعبة كدة قوي "

" الحمد لله على كل حال "

" وأنت بتعمل إيه يا خالد "

" من البيت للشغل للبيت، مافيش أحداث إلا في الشغل "

" مافكرتش تتجوز "

" ماما فكرت كثير "

" وبعدين "

" لقت نفسها كبرت على الموضوع دة، وإن مافيش رجل حيملي حياتها زي بابا "

أسمع صوت ضحكتها، كنت قد نسيته

" أنت لسة زي ما أنت "

" إيه اللي حيحصل، حيطلعلي دراع تالت مثلاً "

" تتغير شوية "

" لا صعب، أنت عارفة أن مش سهل الانخراط في المجتمع "

" أكيد..... سامية عامله إيه "

" جوزها مسافر ومتلقحة عندنا شوية "

تضحك تاني

" أنا بعز سامية جدًا، أكثر واحدة كانت بتسأل عليا "

" لا وهي تتعز الأمانة "

" أنت مالك، قارش ملحتها "

" لا عادي، بتقفش بس على كلام أهبل "

" ربنا يخليكوا لبعض يا خالد "

" ويخليكي لينا يا قمر، يا ست الكل "

صوت ضحكتها

الجنس ليس كل شيء، هناك نشوة لا تعرفها النزوات والرغبات

" ماشي يا عم "

" حسم صوتك قريب "

" إن شاء الله ... باي "

" باي "

سعادة، مجرد مكالمتها سعادة، القلب يرى ما لا تراه جميع الجوارح والحواس

واستكمل يومي المعتاد

خمسة أيام بعدها

" الو السلام عليكم "

" وعليكم السلام "

" إزيك يا حاجة نادية "

" يا هلا بيك "

" بارك الله فيكي يا حاجة "

" وأنت كمان يا ظريف "

" عاملة إيه في حياتك "

" الحمد لله ... وأنت "

" أكيد سعيد طول ما بسمع صوتك، حاسس إن في حاجة جديدة في حياتي "

" طاب كويس أنا كدة كمان مبسوفة "

" الحمد لله "

" لسه متخافق مع سامية "

" لا عادي "

" أكيد مش عادي "

" حنتصالح مسألة وقت "

" تحب أكلها لك "

" دة لو مش عايزة تسمعي صوتي تاني "

" لا خلاص "

" بالظبط "

" أنا عندي مشوار ممكن تكلمني بعدين عشان عند ماما وحتستعجلني "

" أكيد "

" باي "

" باي "

يومين تاني

" بس أنت ما حبتش حد طول الفترة دي "

" أكيد "

" غير أمك وأختك "

" طبعا "

" مين "

" صابر المكوجي "

يوم آخر، هي التي تتصل

" أنت ما بترجش يا خالد "

" أو مال كل حنة ممكن يكون فيها بقالة أمي بتوديهاني "

" لا برة "

" الشغل بخرج معاهم كتير، خصوصاً الشباب الصاعد اللي عارف كل حنة في البلد "

استطرد

" إيه نفسك تخرجي؟ "

" أكيد "

" تروحي فين؟ "

" أي حنة أو بن إير "

" ممكن أكون أنا فيها "

" ممكن يا خالد "

سهلة جداً، ترمي لها بسقف المثل وترمي لها حبل علاقة قديم، لتصنع مشنقتها
بنفسها

بركاتك يا شيخ عماد

" بس حنخرج بطقم النينجا اللي بتلبسيه ده ؟ "

" لا ما أنا قلعتة ولبس عادي "

" شوفي أنت عايضة تروحي فين وأنا أستناكي "

" التجمع، عارف الداون تاون "

" أكيد "

" في هناك محل اسمه بول، استناني عنده "

" الساعة كام ؟ "

" بكرة الصبح..... آه أنت في شغل أنا اسفة "

" اعتبريني أجازة "

" بجد مش حتضايق "

" أكيد لا "

" بكرة الساعة 11 "

" خلاص تمام "

" باي "

" باي "

أغلق الخط، وأقف للحظة

" كنا حنبي و أدينا بنينا السد العالي "

أغني وأنا أسير في الشقة

سامية

" أديني مابروحش في حته، اتبطيني "

" يا رب على طول "

" قفاشة كلبة متسلطة "

" رخم "

وتضحك، ربنا هداها

غداً يوم ليس عادي

جلس في پول

الساعة الحادية عشر، لم تظهر

خمسة دقائق لأجدها تتمشي تجاهي

كما هي، كالنبيذ كلما مرت عليه الأعوام كلما زاد جمالاً وقيمة

ترتدي فستاناً أسوداً واسع وحجاباً أسوداً يجعل لونها الأبيض كالحليب

تبتسم، بداية مبشرة

أقف لها وأشد كرسياً

" خالد "

" عيون خالد "

هي بنظرة تحذيرية

" نعم "

" مش قصدي، بس اتفاجئت "

" إيه عشان اتغيرت "

" أنت ما اتغيرتيش نهائي "

" بكاش "

" وحياة پول ماحصل "

تضحك لتزداد السماء شمساً

" عامل إيه "

" مبسوط لآخر الانبساط "

" الحمدلله، وأنا كمان "

" أنت ساكنة قريب "

" في الشويقات "

" فين يا ماما "

" شارع مشهور هنا، خمس دقائق من البيت "

" كويس، بس إيه سبب الانفارحة دي "

" حسيت إني مليت يا خالد، وأنا لوحدي، لو هنا أو عند ماما، برضو لوحدي "

" الملل أسوأ شيء ممكن يصيب الواحد "

" بالضبط "

" حنطلب إيه "

" اطلبني لنفسك واطلبيلي وأنا حدف "

واضع قدم على قدم بشكل كوميدي، فتضحك

تضحك كأنها لم تضحك من قبل

" أنت مسخرة "

"الله يخليكي بس أنا والنعمة ما فاهم المطعم السيس دة فا اطلبني أنت حاجة على

ذوقك "

" ماشي يا سيدي "

نتحدث هذه المرة بحرية، هي كانت مكبوتة، ووجدت ضالتها فيا

تنتهي الخروجة التي استمرت ساعتان وأنا أركب مواصلات تلك المرة توفيرًا
للمواصلات

أمسك الموبايل وأتصل بسبب السعادة وأصرخ فيه عندما يرد

" عماءاد "

" أبو شكك "

" أنت فين يا رجل "

" أبو أهلك "

" وأنت واحشني أكثر "

" عايز إيه "

" أنا كنت خارج مع نادية "

" أووووه، دة أنت موهبة وأنا مش عارف "

ويضحك كثيرًا

" أنت فرحان ليا طبيعي، ولا دة عيد تعامد الشمس على وش أمك أنت الثاني "

" يا عم ربنا يوفك "

" شكرًا "

" وحتوصل لحاجة "

" ربنا يسهل "

" مع نفسك قصدي "

" لو هي دخلتني في حياتها، أعتقد إن ربنا حيهديني، هي ملتزمة جدًا "

" طيب كويس، يبقي كدة شكك حتروح للشيخ "

" وكله بفضلك يا عم الشيخ "

" بركة، أنا بركة يا ابني "

" طب مش حتيجي معايا للشيخ "

" ربنا يسهل وأحصلك "
" ماشي يا سيدي، مستنيك "
" سلام يا خوليو "
" عماد الدين، تصحبك السلامة "
أغلق وأتجه إلى البيت
أتمني للسعادة الاكتمال

نخرج مرتين بعدها، كلها في الداون تاون
أريد أن أحكي لسامية، لكن ليس الآن، حتى أتأكد من نادبة أولاً
أصبحت أفضل مزاجاً وأشعر بالراحة
بدأت بالصلاة عند الاستيقاظ، والمواظبة قادمة إن شاء الله
الحياة على الطريق
الهاتف يرن وأنا عائد من العمل بعد أول لقاء بعشرة أيام
نادبة
" الو "
" خالد "
صوتها متوتر للغاية
" في إيه يا نادبة "
" ممكن تيجي البيت "
" ليه في إيه "
" ممكن تيجي "
" التجمع "

" آه "

" في السكة "

" حبتك العنوان مفصل في رسالة..... باي "

" باي "

ماذا حدث، قلبي يشعر بعدم الاطمئنان

أغير وجهتي إلى هناك، أخذت ساعة حتى وصلت إلى التجمع، طبعًا اضطررت من هناك لركوب تاكسي حتى يوصلني إلى العنوان، أتوه قليلاً ولكنني أصل في النهاية فيلاً أخرى أنيقة تعيش بها، تشبه فيلاً عماد الدين،

أصل بها فتغلق المكالمة، وتفتح البوابة الحديدية وتقف عند الباب، مرتدية ملابس عادية للخروج، يظهر عليها التوتر، أدخل أولاً وأجلس على أول كرسي يقابلني، وتجلس هي في المقابل لي،

" في إيه يا حبيبتى "

" أنا تعبانة يا خالد "

" مالك طيب بس، إهدي و فهميني "

" تعبانة "

كم التوتر يوحي بأن هناك شيء ليس طبيعي

" إهدي، خدي نفس "

تحاول ان تنفذ كلامي

" احكي لي بالراحة "

" كنت عايزة أجيب حاجات، قلت أنزل أجيبها "

وتسكت

" وأنا راجعة في واحد فضل ماشي ورايا، أعدت أمد أمد أمد، وهو ورايا، دخلت

البيت، فضل يلف حوالين البيت، أنا خائفة قوي يا خالد "

" ما فيش حاجة، أنا جيت أهوه، اطمني وإهدي "

" ححاول "

تجلس في هدوء وهي تحضن نفسها،

وفجأة

تقوم وتندفع وتحضني بقوة

الهلح هو أقل ما يمكن أن يقال عليها

" ما تسبنيش يا خالد "

" مش حاسيبك، تحبي أروحك عندنا المنطقة "

" لا، ماتسبنيش "

قلبها يدق كطبول الحرب، تفضل متعلقة بي كطفلة خائفة في حضن أبيها،

تهدأ بعد 15 دقيقة كاملة

وهي مازالت متمسكة بي

أنظر إليها وهي تحتضن ذراعي، وأقبل جبينها،

فتنظر إلي

و تقبلي

شفاه في شفاه

أحاول أن أبعد شفتي عنها فتحتضني أكثر

" في إيه يا نادية، إهدي "

لا ترد

فقط تقبلي

وتشد الحجاب عن شعرها وتبدأ في خلع ملابسها وأنا احاول أن أمنعها، لو أنني كنت

مخمورًا لكان الوضع مختلفًا، لكنني طبيعي، أحاول أن أثنىها عما تريد

تنظر إلي بغضب

" أنت مش بتحبني يا خالد "

" مابحبش حد غيرك "

" خلاص سييني "

لحظة ضياع بالنسبة لي، إن رفضتها فقد أخسرها للأبد، وإن تجاوزت معها قد تندم

بعد ذلك وأيضاً سأخسرها للأبد

بينما أفكر كانت قد بدأت تنظر إلي نظرات ترعبني

فحملتها وسرت وهي توجهني إلى غرفة النوم

وبدأت تخلع ملابسها، في عصبية،

أقلع ملابسني وأرغمها على النوم على ظهرها، محاولاً أن أدلك ظهرها لعلها

تسترخي،

وشم كبير على ظهرها وعلى مناطق مختلفة

من هي؟

تلتفت إلي وتنظر بنظرة شهوانية بحتة

"أنا مستنياك من زمان "

ثم

لا وعي

وعي

بعدها بساعة

تجلس في حضني وتنظر إلي براحة مستسلمة،
بينما أنا من يشعر بعدم راحة غير طبيعي،
لماذا؟

صورتها التي رسمتها دمرتها هي لي
وما تلك الوشوم؟

من تلك التي تنام بين ذراعي عارية
" انبسط "

" آه "

" شكلك ما انبسطش "

" لا انبسط "

تضحك

" ابسطك تاني "

" شكرًا "

" مالك يا خالد "

" مش مرتاح "

ينعقد جبينها

" ليه؟ "

" أنا أكيد كان نفسي في دة، بس كان نفسي نتجوز "

" نتجوز؟ أنا عمري ما حتجوز تاني "

ينعقد جبيني

" أو مال إحنا مستقبلنا إيه؟ "

" زي ما إحنا كدة "

أجلس على السرير وقلبي يكاد يقف

" يعني إيه ؟ "

" يعني أنا استحالة أتجوز تاني، ولو بتفكر كدة إنساني أحسن يا خالد "

أنظر إليها، لا أستوعب أي شيء حتى الآن

" اخترت إيه يا خالد ؟ "

لا أتحدث

فقط أقف وأبدأ في ارتداء ملابس

" خالد..... رد عليا "

لا أرد، الذهول جعلني لا أستطيع التحدث

" خالد رد بقي "

تبدأ لهجتها في عصبية

لا أرد فتبدأ بالصراخ

" رد .. رد .. رد "

" أرد على إيه، على الصورة اللي اتدمرت قدام عنيا، منقبة ومتدينة، وعايضة تكلمي

حياتك معايا على السرير، زي أي واحدة رخيصة، وأنا اللي كنت عايز أصونك "

عينيها تدمع

" أنا رخيصة..... أنا "

" اللي بتعمله يخليك كدا رخيصة "

تتكلم والدموع تطل من عينيها

" أنت أول واحد ادخله شقتي "

أرد بعصبية

" أنا ما أعرفش الكلام دة، أنا ماشي يا نادية "

" أنا عمري ما عملت كدة إلا معاك "

عينيها تنهمر بالدموع بينما الغضب يعصف بي

الفصل الثاني عشر

اغفر للماضي

رسالة

أرد عليك أخيراً
يا من كنت روح الفؤاد
يا من كنت في القلب..... عماد
انتظرتك كثيراً
وانتظرت أن تتغير وتغير سمعتك
حتى تتقدم لي لنعيش الأبدية الهائلة
لكنك لم تتغير
وغيرتني
آمنتك على نفسي فخننتني
راهنك عليك بكل شيء
والآن وقد خسرت كل شيء
سأ تزوج
شخص قد لا أحبه ولا أفهمه
ولكنه سيكون طريقي لأنساك
وأنسى فشلك وفشلي
أرسل لك كل خطابتنا سوياً
مع نادية

فأنا قد مسحتك من حياتي
أنت الآن بالنسبة لي
لا شيء سوى سراب

سامية

.....

قرات الخطاب عشرون مرة
و مازالت عيناى لا تصدقان،
أركب سيارة أجرة متوجهاً إلى البيت،
سأقتلها أولاً ثم أذهب لأفصل رأسه عن جسده
عماد وسامية
جسدي يرتعش، لن أفكر في شيء
هل العلاقة لازالت قائمة
من سيجاوبني،
لن أستمع لأحد،
الموتى لا يدافعون عن أنفسهم
أصل إلى المنزل، أحاول أن أتمالك نفسي، لا أريد أن تشعر أُمى بشيء، قد تقتلها
الصدمة
أدخل البيت وأنا أترنح قليلاً
سامية وحيدة في البيت
تقف في المطبخ

أدخل إلى المطبخ أسحبها من ذراعها إلى غرفتي
" في إيه يا ابني أنت "
أمشي بدون أن أتحدث
" أنت اتجننت "
ندخل إلى الغرفة،
أضربها بكفي على وجهها، ليطير وجهها ثم يعود إلي وأنا أمسك الجواب
أعطيها الجواب
تنظر إلى الجواب وعيناها تجحطان
تنظر إلي، والدموع بدأت في الانهمار لا إرادياً من عينيها
" اتكلمي "
" أقول إيه "
" أنا ما يهمنيش اللي مكتوب قد يهمني حاجة واحدة "
امسكها من ذراعها بقوة
" لسه ما بينكم علاقة ؟ "
تنظر إلي بحزن شديد ونظرة تدعو للشفقة
" أنت السبب "
أدفعها إلى السرير
" نمتي معاه يا وسخة "
تصرخ في
" أنت السبب "
وتقف على السرير وتصرخ
" انت السبب "
" وأنا اللي اخدتك ليه يا سافلة ؟ "

تسقط على ركبتيها

" عماد كنا بنحب بعض زمان، كنت مش عايزة منه غير إنه يبطل الفساد اللي بيعمله
عشان نتجوز، عشان اقلعوا بيه، هو حاول كتير الصراحة، وفشل في الآخر،
وجابني كمان معاه "

تنظر إلي

" وأمك عارفه الكلام دة، ولما اتقدملي وحيد، أمك أجبرتني أتجوزه عشان أبعد عن
عماد، عماد اتجنن، حاول يعمل كل حاجة عشان يوقف الجواز، لما ماعرفش، سافر
مع أهله "

تسكت وتمسح دموعها

" كل مرة كان بيجي كان بيحاول يتصل بيا، يقتعني إنه أتغير، وإني لو اتطلقت
حيتجوزني، بعثلي الكلام دة مع نادية، بس أنا كنت قاطعة عليه كل حاجة "
وتنفجر في البكاء

" لحد ما أنت جيت قلت لي أنك ماشي معاه، وقتها ماعرفتش أعمل إيه، خفت عليك
تروح معاه في نفس السكة، كنت عايزة أحذره وأبعده عنك وعني، كان ممكن أكلم
نادية وأقولها تكلمه، بس نادية بقت مش طبيعية من ساعة ما جوزها مات، جوزها
جبلها حالة نفسية، ومش عارفة أعمل إيه، وأنت بتستحمي، أخذت رقم موبايله من
تلفونك "

ثم نزلت لتجلس على السرير وتضع يدها على رأسها

" وكلمته من موبايلي ويا ريتني ماكلمته "

" أنا ما بقولش إنني مش غلطان، بس وحيد ما بيفهمنيش ولا مهتم بيا، كل حياته
شغل وكلام عن الحاج، ونادرًا أساسًا ما بيلمسني، وعماد الحاجة الوحيدة اللي حبتها
في حياتي وكنت بحاول أهرب منه طول حياتي "

تسكت و تنظر إلي بعصبية

" أنا روحته البيت كذا مرة يا خالد، كنت محتجاله، بس أنت حتفهم منين، مخك
الجزمة والأناية ضيعوا منك نادية، ضيعني أنا كمان بالمره "

تنظر إلي وتصرخ

" اتفضل، وريني تعمل إيه "

أنظر إليها في ذهول

" أنا ما كنتش معاكوا في نفس البيت "

عيناى تدمع، العالم ينهار من حولي

عماد، أنت ميت

أتركها وأذهب إلى الباب

" رايح فين يا خالد "

" حقتله 1000 مره "

تناديني في لهفة

" استنى يا خالد بلاش جنان "

أنزل السلم مسرعاً، أجري في الشارع كالمجنون

أوقف أول سيارة أجرة أجدها، وانطلق إلى بيته

لن أستطيع أن أواجه الحياة مرة أخرى وهو فيها

ضحك علي وفتح لي باباً إلى الانحراف ونام مع أختي

لقد دمر حياتي إلى آخر ما فيها

أغلي

دمي يغلي

أصل إلى منزله، أنزل وأترجل حتى باب القبلا، الباب مفتوح

أدفع الباب وأدخل لأجده واقفاً على البار وحيداً

" خوليوووووو "

أدخل بهدوء وأغلق الباب وأسير ناحيته بخطوات بطيئة

" سامية كلمتني وقالتلي أنك جاي تقتلني "

ويستطرد وهو يصب كأس

" وهي بتسلم عليك وبتقولك اعقل "

جنب الكأس هناك مسدس

" اقعد يا خالد على الكنبه "

يمسك المسدس ويضعه في جيبه، يصب كاسين من الفودكا، يضع واحد أمامي

ويمسك الآخر، ثم يجلس على الكرسي المواجه للأريكة التي أجلس عليها

"منفعل ليه يا حبيبي؟"

" تعتقد ليه؟ "

" عشان نمت مع نادية، وقتلتها إنها رخيصة، ماقلتش الكلام دة ليه لهادية مثلا؟

رايح تقوله لحب حياتك؟ "

" أنت عارف؟ "

" كلمتني، أنا أساسا كنت عارف هي كان نفسها فيك أكثر ما أنت نفسك فيها، جوزها

كان سيء لأبعد الحدود، كان بيعذبها وبيراقبها على طول، متسلط وسادي، جالها

بارانويا وبتتعالج نفسياً، واضح إنها تعبت كثير بعد ما أنت سبتها تتجوزه "

يشرب من الكاس ويشاور إلي أن أشرب، أحتاج مخدر، وما في يدي هو الأنسب

أشرب معه وأنا أرمقه بنظرة احتقار وغضب

" أنت عايز تنتقم ليه أستاذ خالد "

" مش محتاج شرح "

" لا محتاج، عشان أنت غبي كالعادة، او ممكن أقول أناني "

يقف

" إيه اللي أنا عملته غلط معاك "

يمسك الكأس ويرشف منه ثم يستكمل
" نمت مع أختك، شفتني بنام مع واحدة أخت واحد صاحبي وما سمعتش اعتراض،
أختك متجوزة وجوزها مسافر، هادية متجوزة وجوزها مسافر "
ينظر إلي ويشاور بأصبعه
" أنت نمت مع هادية وما حسنتش بتأنيب الضمير ولا الذنب ولا أي حاجة، ليه
عايزني أنا وسامية نقعد نبكي ونطلب منك صك غفران "
كلما تكلم كلما زاد الضغط وارتفع الدم في رأسي
" إيه الحاجة اللي تحاسبني عليها "
" أنت برئ يا عماد، ما خدعتنيش ولا خنتني ولا أي حاجة؟ "
" ما خدعتكش، أنا علمتك الحقيقة وواجهتك بيها وأنت نفسك المفروض أنك قادر
تفكر وتفهم، إيه المانع إن أختك تنام معايا، طول ما أنت بتنام مع نادية وهادية، كدة

"Fair

يقتلني ببطء شديد
" ولا أنت شايف إيه "
أرد بهدوء
" أنا مش شايف حاجة "
يصرخ مرة واحدة
" عشان فاشل، وغبي وما بتفهمش، اللي عايزك تفهمه أنت وأختك، إن لما تكون
بايظ ومدمن، صعب أنك تبقى إنسان عادي، بتحتاج حد يشدك، وهي حاولت تشدني
فعلاً، ولما نمت معاها قبل ما تتجوز، كان عشان أربطها بيا أكثر، لكن اتجوزت وأنا
اتعدلت، بطلت مخدرات وبطلت كل حاجة، عارف بطلتها ليه يا جحش؟ "
ينظر إلي باحتقار
" عشان ندمت على إنها ضاعت مني، وكان نفسي في فرصة تانية "

يشاور إلي بالزجاجة ويظهر أنه شرب الكثير من عدم اتزانه
" أما أنت يا فاشل، شفت حبيبت عمرك تمشي ما جريتش وراها، وعدت أكنها
القهوجي اللي بياخد من قدامك الكوبيات الفاضية، أخدها ومشى ولا أنت حاولت تمد
إيدك حتى، وحتضيعها تاني عشان أنت رغم كل الخطايا اللي عملتها، ماكفتكش، لسة
شايف نفسك أحسن مني ومن أختك ومن نادية اللي لما رمت نفسها في حضنك
عشان تحس بالأمان شفتها رخيصة "

" أنت فاشل بالفطرة "

يصرخ ويبدأ في أخذ زجاجات البار ويلقيها علي وعلى الأثاث بشكل عشوائي
أقفز خلف الكنبة وأنتظر مرور الزجاجة القادمة، أجري ناحيته وأقفز عليه لنقع كلانا
على الأرض
المسدس يطير بعيداً

باب القيلا يطرق بعنف، صوت سامية في الخارج
أجري ناحية المسدس وأمسكه، لم يقم ولم يحاول أن يسبقتني إلى المسدس، بل جلس
على ركبتيه ينظر إلي وأنا أصوب المسدس إليه
إعصار في مخي، ما بين كل ما حدث لا أعرف ماذا أفعل سوي أن أنتهي منه
" افتح يا خالد .. يا عماد "

صوت سامية ويبدو أن أحدهم معها يحاول كسر الباب
عماد ينظر إلي بحدة وابتسامة
" القتل ... الخطيئة الكبرى التي لا تغفر، تعتقد هي دي اللي حتهديك "
أنظر له ولا أعرف ماذا أفعل، عضضت على شفتي فجرحت من فرط الغيظ،
ماذا أفعل ؟
يبتسم إلي

" للمعلومة صدر أختك قريب من صدر سمر، بس يمكن أطرى شوية "

أنظر إليه بغضب، فيضحك
" ما أنا كدا كدا حنام معاها تاني "
أضغط الزناد
قفل السلاح مغلق، فأفتحه ببرود وقد أتخذت القرار
يبتسم إلي ويفتح ذراعية
" أهلا بيك على قمة الخطيئة "
لا أشعر بشيء
لم أسمع صوت الطلقات
هو فقط غارق في دمه
الباب ينكسر
سامية تجري الي الداخل
تتركني وتحتضن جثة عماد و هي تصرخ باسمه
لا أسمع شيئا
فقط أسقط على ركبتي
والدموع في عيني
ولا شيء آخر

الساعة السادسة والنصف صباحًا
لا منبه
لا شيء
سوي أربع جدران رمادية وسقف
ومصحف وسجادة للصلاة
عرفت الآن معنى الندم
خسرت كل شيء
أكنت محتاجًا إلى كل تلك الصدمة ؟
وكان عماد كان يعرف
القاضي كان رحيم بي
آثار بصمات عماد على الزجاجات المحطمة وعلى المسدس ونسبة الكحول في دمه
جعلتها تبدو كالدفء عن النفس،
فكان الحكم مخففا
عاد وحيد، وحصلت سامية على الطلاق
لم تزرني منذ أن أتيت هنا
لا ألومها
نادية زارتني، وهي تشعر بالذنب بأنها السبب، ووعدتني بأنها ستنتظرنني
أجلس اليوم كله أحاول التقرب إلى الله لعله يغفر لي ذنبي
الآن فهمت
فهمت أن لا عيب في الذنب، بل العيب فيمن يراه
عرفت أن الخطيئة قد تعلمك أكثر عن الخير
وأن لا أحكم على أحد بأي شيء
فالنهاية

ليس نحن من سنحاسبه
حكمت على سامية بالفساد ولم أقدر أنها كانت مثلي معلقة بحبها الوحيد،
أخطأت مع عماد، كما فعلت مع نادية
حكمت على نادية بالفساد و لم أر أنها تهرب من جحيم الماضي وتبحث عني
استغللتها حتى تعيدني إلى الصواب، فدعوتها للخطيئة
حكمت على كل من حولي بالفساد
وأنا الفاسد الوحيد

لا أريد شيئاً
لو عاد بي الزمن لتركت السلاح وقبلت يد عماد
كم اشتقت لحكمته ومزاحنا سوياً
سأنتظرك
سأنتظرك يوم القيامة لأعطيك ما أم لك من حسنات لعلها تساعدك يوم الحساب
أنا آسف إنني قطعت أعمالك
لعلك كنت ستتوب يوماً ما
أنا آسف إنني لم أكن لك كما كنت أنت لي
أنا آسف
يا عماد،
يا سامية،
يا نادية
أنا نادم .